

ريهام حلمي

EXPIRED

” من أجل علاقات لا تنتهي صلاحيتها “



الرواق للنشر والتوزيع

مكتبة فريق_متميزون)
لتحويل الكتب النادرة الى صيغة نصية
قام بالتحويل لهذا الكتاب:



كلمه مهمة: هذا العمل هو بمثابة خدمة حصرية للمكفوفين، من منطلق حرص الجميع على تقديم ما أمكن من دعم للإنسان الكفيف، الذي يحتاج أكثر من غيره للدعم الاجتماعي والعلمي والتقني بحيث تعينه خدماتنا هذه على ممارسة حياته باستقلالية وراحة، وتعزز لديه الثقة بالنفس والاندماج بالمجتمع بشكل طبيعي.

وبسبب شح الخدمات المتوفرة للمكفوفين حرصنا على توفير خدمات نوعية تساعد الكفيف في المجالات التعليمية العلمية والثقافية وذلك بتسخير ما يتوفر من تقنيات خاصة لتحويل الكتب الي نصوص تكون بين أيديهم بشكل مجاني، ويمكن لبرامج القراءة الخاصة بالمكفوفين قراءتها.

مع تحيات: فريق (متميزون) انضم الى الجروب

[انضم الى القناة](#)

اكسبايرد

EXPIRED

من أجل علاقات لا تنتهي صلاحيتها

ريهام حلمي

عن الكتاب..

المتوقع من العلاقات الإنسانية إنها تبقى مربحة وسبب لسعادة الإنسان.

لكن واقعيًا العلاقات المميزة الحقيقية العميقة بقت نادرة، وبقي الغالب على حياتنا وجود علاقات بتستهلك طاقتنا... في الكتاب ده هنتكلم عن قواعد إدارة العلاقات في خطوط محددة بتساعد إن علاقاتك تبقى صحية، بتديك تنبيه إنك ما تقعش في فخ العلاقات المرهقة... وبتشرح لك طريق السلام عشان تبقى طرف في علاقات صح، تملك من جوة وتنور حياتك. العلاقات من غير إدارة سليمة ممكن تبقى سامة، تهد فيك وف غيرك أكثر ما تبني لما يبقى عندك وعي بإدارة العلاقات هتحقق علاقة تسمح لك بالحياة، مش علاقة تبقى هي "الحياة"... فتبقى جوة العلاقة مستقل وحرّ وفاعل مش مفعول به، وتكون علاقتك تعيش وتزدهر مش علاقة منتهية الصلاحية.

∞ ∞ ∞ ∞ ∞



إهداء..

لهؤلاء العابرين..
الذين مرُّوا من خلالي..
والذين استوطنوا فتركوا أثرًا محفورًا في روحي..
لولاكم ما فهمتُ أن العلاقات تُروى حتى لا تفتنى..
بمُروركم فقط تذوّقتُ حقيقة الحياة..

∞ ∞ ∞ ∞ ∞



التقديم العلاقات..

تلك الدائرة التي ننسجها حولنا بالكثير من الخيوط وبمختلف الألوان لتمثّل
مختلف الطبائع التي نحب أن تظل معنا وحولنا..

ننسجها فطرياً كي نشعر بالأمان والدفء والطمأنينة والقيمة..
نسجناها حولنا منذ الصغر..

ربما ونحن في السنة الرابعة من العمر..

وكنا كُلِّما تقطعت خيوطها وصلناها على الرغم من الألم وعلى الرغم من
عهود قطعناها ألا نعود، وبالنهاية عُذنا..

فلم يكن لدينا اختيارات أخرى، كان ذلك هو الاختيار المعبر عن طفولتنا
البريئة..

ومنذ ذلك الحين، ما زلنا بين الأمان والألم ننسج خيوطاً ونقطع أخرى.

ونراقب في صمتٍ أو نثور لنقطع ذلك الصمت بالهروب بعيداً عن تلك الدائرة
التي نسجناها لتكون يوماً ما مصدرًا للأمان والراحة، متسائلين: كيف تحولت
إلى دائرة للألم أو المعاناة؟!

ونحن بين الأمان والألم، ما زلنا نصارع ونختار ونوصل خيوطاً، وتتقطع بين
أيدينا أخرى.

نختبئ من مشاعرنا خشية أن نفقد من نحب لنكتشف أننا بذلك نختبئ من
الحياة كلها..

نبتعد طلباً للراحة لنعاني الوحدة..

ونقترب طلباً للأمان ليعاودنا الألم..

لأننا ما زلنا نختبئ.

إن ذلك الألم هو العلامة التي تنبّهنا لمشاعرنا المكبوتة..

ولقد آن الأوان أن تتحوّل أفكارنا ووطنونا ومشاعرنا إلى صوت مسموع أو
كلمات ندوّنها لكل من حولنا..

إن تلك المشاعر، ولو بدت بسيطة، سوف تعبّر عن أعظم الحقائق التي نريد
أن نخبر بها الآخرين..

إن كنا حقًا نقدّر كل العلاقات التي اخترناها لأنفسنا فنحن في حاجة إلى أن نتعلم كيف نعبر عن كل شيء..

عن الغضب، عن الألم، عمّا نظن بدلًا من الكبت أو الهروب..

وأولى تلك الخطوات هي الإدراك..

من أجل ذلك، كان تقديمي لتلك الصفحات القيمة التي بين أيديكم للكاتبة ريهام حلمي، ليكون بمثابة إشارة إدراك وأداة للتطوير والاستثمار في العلاقات.

استطاعت الكاتبة، بطريقة سهلة وكلمات بسيطة، أن تصف أفكارنا وتعبر عن أحوالنا الشعورية في دوائر العلاقات ولم تكتفِ بالوصف والرصد، بل وضعت بين صفحات ذلك الكتاب الكثير من الحلول وكتبت عن الكثير من المفاهيم المغلوطة وناقشت طرق الحل لتكتمل الفائدة في تلك الصفحات من تحديد للمشكلة وصولًا إلى الحل، ليكون الكتاب بمثابة تدريب عملي لرفع الوعي والاستثمار في دوائر العلاقات من حولنا، متمنيًا لها التوفيق والنجاح، وللقراء الأعداء النفع

والفائدة.

أيمن عبد الله



المقدمة

وجود الناس في الحياة يبخلي ليها طعم ثاني.. ويبضيف ليها سعادة وراحة وسلام..

معاهم بتلاقي الحب.. الأمان.. الاطمئنان..

بتلاقي التقدير.. الاحترام.. السند.. الدعم..

بتقضي معاهم أجمل أوقاتك فتحس باستمتاع وشغف.. وونس ودفا.. وجودهم يبسهل عليك الحياة!

ده المُتَوَقَّع من العلاقات.. إنها تبقى مريحة وسهلة.. وتبقى سبب لسعادة الإنسان.. لكن واقعياً العلاقات الحلوة الجميلة بقت نادرة.. وبقي الغالب على حياتنا وجود علاقات بتستهلك الطاقة ويتحرك زي الماريونيت..

وبقيت مُستنزف في معظم علاقاتك.. فلما بتتعبك تهرب منها وتكوّن علاقات جديدة يمكن يتحقق فيها اللي بتتمناه..

وفي أوقات كثير بتفقد شغفك بتكوين علاقات تانية وتتوصل لمرحلة الاكتفاء بنفسك.. ويملاك شعور الوحدة والاعتراب..

هي ليه العلاقات بقت صعبة ومرهقة؟

ليه مفياش المعاني الإيجابية اللي كل إنسان بيحتاجها عشان يعيش حياة طيبة فيقدر ينجز أكثر؟

بتبقى شايف إن العيب من الأطراف التانية.. حاسس إن محدش فاهمك.. محدش حاسس بيك.. محدش بيحبك كفاية.. محدش مهتم..

خيبات الأمل المُتتالية بقت أكبر من قدرتك على التحمل ومعدكش طاقة تحاول وتكمل في علاقاتك..

تصوّرت إن العلاقات أمر مكتسب مش محتاج إدارة للتقارب والتكيف والتفاهم.. علشان تحل المشكلات اللي بتسبب ألم..

ألمك اللي عمّال يتكوّن جواك محتاج منك وقفة تفهمه وتتعلم منه؛ لأنه بيقولك رسالة مهمة عن علاقتك بيهم.. بيشرح لك المشكلة فين.. فلما تعرف المشكلة بتقدر تحلها بشكل واقعي يخلي العلاقة أقوى..

العلاقات مبنية على فكرة الاستثمار عشان تعيش وتنمو وتزدهر.. بتحتاج مفاهيم ثابتة تديرها من خلالها، فالعلاقة تبقى مساحة أمان لكل الناس مع بعض يقربوا من خلالها.. ويلاقوا المساحة اللي تجمعهم في علاقات صحية..

في الكتاب ده هنتكلم عن قواعد إدارة العلاقات في خطوط محددة بتساعد إن علاقاتك تبقى صحية.. بتديك تنبيه إنك متقعش في فخ العلاقات المرهقة فتؤذيهم وتتحول علاقاتك لعلاقة منتهية الصلاحية.. وبيشرح لك طريق السلام عشان تبقى علاقة صح تنورك.. وتنور حياتك..

الباب الأول هيكلمك عن كام نموذج لإشارات الخطر اللي بتهدد العلاقات.. وبتسبب اهتزاز نفسي ليك فتأثر على رؤيتك لنفسك وبالتالي بتأثر على شكل علاقتك بيهم..

الإشارات دي مش أنماط شخصية.. ولا سمات حتى في الشخصيات.. هي مجرد إنك ساعات بتتصرف غلط مع الطرف الآخر فتؤلمهم نفسياً وهم كمان ممكن تصرفاتهم تؤذي نفسك وشعورك بذاتك من غير وعي.. لما بتدرك مواطن الخطر بتقدر بسهولة بعدها تحمي نفسك وتحميهم منها..

الشعور بالوجع وعدم الراحة هو الإشارة اللي بتقولك: «انتبه».. العلاقة بدأت تؤثر في ذاتك وبتستدعي منك نفور أو بتستبيح نفسك على مدار الوقت..

ومش كل الإشارات معناها إن العلاقة نفسها غلط.. عدم رؤية الخطر بتخليه يتمكن منك أكثر والعلاقة تؤثر فيك سلبيًا.. إنما لما بتنتبه بتدير نفسك وبتدير علاقتك بيهم فبتعدي التحدي وتقربوا أكثر لبعض.. وساعات لما بتلجأ للحلول بتلاقي مفيش تغيير من الطرف الآخر.. فساعتها بتدرك إن الخطر نابع من عدم إدارته هو لنفسه..

المهم متقراش بعين الحكم على غيرك.. اقرأ بعين المكتشف لحالته الشعورية جُوه العلاقات.. لأنها معاني غلط تفضل جواك من غير ما تتغير لمعاني سليمة وصحية.. ومحتاج تقراه برضه بعين الفاعل.. ممكن تكون أنت اللي بتسبب الحالة دي لحد غيرك.. حد في علاقاتك القريبة أو البعيدة.. لما تشوف وجعهم بسبب التصرفات دي ممكن يساعذك تاخذ وقفة مع نفسك وتقرر إنك تتعامل بشكل أريح.. عشان شفت شكل العلاقة لما بتبقى غلط وعرفت الطريقة الصح اللي ممكن تخليك تستعيد عافية أي علاقة رغم وجود تحديات أو صعوبات..

الباب الثاني والباب الثالث هما أساس العلاقات الصحية.. العلاقات بتتصلح على محورين.. من جواك بتصحح نظرتك لنفسك.. ومن براك بتصحح نظرتك لطريقة إدارة العلاقات..

الباب الثاني هو العلاقة الأهم، وهو علاقتك بنفسك.. مش بس عشان نجاحك في العلاقات.. عشان كمان تعرف تعيش بسلام نفسي قدر الاستطاعة.. وده بيحصل لما تتعرف على الأصوات الداخلية السلبية اللي اتراكمت بسبب

الصدّماٲ.. والعلاقات القديمة من الطفولة لغاية دلوقت.. وده مدخلك الأساسي علشان تعيش قوي وتتغلب على أي هشاشة نفسية جواك.. فتحقق أحسن صورة من نفسك لنفسك وللناس..

الباب الثالث هيكلمك عن المعاني والمفاهيم اللي لو طبقتها في علاقاتك هتبقى عملت المجهود المطلوب في استثمارك فيها.. وبالتالي العلاقات بتعيش ويتواجه التحديات وتتكمّل.. بتبقى فعلاً سند وراحة زي ما بتتمنى.. ولو حتى علاقة عملت فيها اللي عليك والطرف الآخر واقف مش بيبدل فيها.. هتقدر توصل لتصالح نفسي يخليك تحدد مكانهم فين في حياتك..

وبكده الكتاب بإذن الله هيفضل معاك في كل حالة جواك أو براك بتمر بيها بسبب العلاقات ويخرّجك من الوجد للسلام.. هترجع له عشان تثبت معاني تساعدك تتحمل أكثر.. لأن العلاقات فعلاً اختبار.. ولو منتبهتش بتخرج أسوأ ما فيك.. وبتأثر على رؤيتك لذاتك واستقرارك النفسي..

إدراكك إن في إيدك مسؤولية إدارة علاقاتك بيفتح باب أمل إنك تقدر تحقق علاقات جميلة صحية تسعدك في حياتك.. والأمر كله بيدأ بإدارة سليمة لنفسك.. وإنك تبذل في استثمارك في العلاقة عشان تفضل ماشية بشكل صحي.. مع انتباهك لإشارات ممكن تضر بسير علاقاتك وتخليها مرهقة..

العلاقة مبنية على وجود طرفين.. فتعمل اللي عليك بشكل يخلي وجودك في العلاقة سلام لكل اللي حواليك.. وأنت كمان تكون جُوّه العلاقة دي محقق استقلالك وحرّيتك مش عروسة ماريونيت..

فتبقى تحملت مسؤولية نفسك في الجزء الخاص بيك.. وكمان اتعلمت تحمي حدودك كويس في الجزء الخاص بهم.. فالعلاقة متسببش ليكم إرهاب.. كفاية أوي إرهاب الحياة وتحدياتها..

العلاقات من غير مجهود ممكن تكسر فيك وفيهم أكثر ما تبني.. محتاج تفهم إن أنت عايز علاقة تسمح لك بالحياة.. مش عايز علاقة تبقى هي «الحياة».

∞ ∞ ∞ ∞ ∞



الباب الأول إشارات خطر

هذا الألم الذي يملؤك في جوارهم لم يكن سوى إشارة لك للتوقف والانتباه!
ألم بداخلك بلا إدارة.. أداة هدم لذاتك وللعلاقات.

علاقات كثيرة بقت مرهقة.. وساعات توصل إنها تبقى مؤذية جدًا..

أغلب الناس في التعامل مع العلاقات المرهقة يعملوا حاجة من الاثنين: يا إما ييلوموا أنفسهم أوي على اللي بيحصل فيها.. عشان بيحملوا أنفسهم مسؤولية كاملة إنها مش ماشية بشكل مريح.. فيفضلوا يبذلوا فوق طاقتهم لغاية ما روحهم بتخلص بكل معنى الكلمة.. يا إما بيشفوا إن كل المشكلات سببها الطرف الثاني.. هو اللي خذلهم وتعبهم وضايقهم.. وبس.

وللأسف، النظرتين بيوقفوا نمو العلاقات بشكل سليم.. العلاقة رايحة جاية بينك وبينهم.. حقوق وواجبات.. إدارة مستمرة عشان تقدر تعدي بيها المتغيرات والتحديات.. كل مطب بتعديه بيقرّبكم لبعض.. وبيقرب لكل واحد صورته عن نفسه فيشوفها كويس ويقدر يغير ويقيم محتاج إيه عشان يحقق نفسه بشكل أقوى ويحافظ على علاقاته..

والمشكلة إنك بتفقد نفسك في دوامة تصرفاتهم المرهقة.. وبتبقى مراية عاكسة لكل أذى.. عشان أنت مكنتش شايف الإشارة الخطر من كل تصرف مينااسبش حياتك وذاتك..

∞ ∞ ∞ ∞ ∞



لازم تنتبه لما تتوجع!

هل أنت شايف الإشارة الخطر اللي بتهدد علاقاتك؟
وهل بتعرف تشوف الإشارة بشكل ما يهدش من نفسك؟
هل رغم الوجع والتهديد النفسي من العلاقات المرهقة بتعرف تشوف نفسك صح؟

أصلك لما بتشوف نفسك صح.. بتعرف تدير علاقتك بشكل ناضج وواعي..
التغيير بيدأ من عندك.. لأنك متقدرش تتحكم في غيرك.. تقدر بس تغير رؤيتك.. وتدير نفسك ومسؤولياتك.. فتعيش في سلام داخلي وسلام خارجي مع اللي حواليك.. وتعرف برضه تدير الإشارات المؤلمة اللي بتنذر إنك داخل دوامة والعلاقة بقت مرهقة..

فالعلاقة لو مشتغلتنش عليها وانتهت للإشارات الخطر اللي فيها بتتحول لعلاقة مرهقة ليكم انتو الاتنين.. مع الضغوط من برّه زي المسؤوليات اللي بتجد كل فترة.. ومع الضغوط اللي جُوّه زي الاحتياجات اللي بتتغير وبتلج علينا عشان نليها.. لو مش منتهيين هنقع من بعض ومش هنكمل..

لما تحس إنك تعبان في أي علاقة.. لازم تفهم إنها إشارة إنك محتاج تقيمها وتقيم رؤيتك ليها.. متفضلش ماشي بنفس طريقك ونمط تصرفاتك القديمة ومتخيل إنك هتوصل لنتيجة مختلفة..

وأنت ممكن تكون اللي بتبعت إشارة الخطر لغيرك.. فلما تقرأ الإشارات تتحرر من نظرة اللوم.. من الحكم على الآخرين.. إحنا بنوصف المشاعر اللي اتحست بسبب الإشارة عشان نحررها ونوصل لمعاني تخلي قلوبنا تتسع لغيرنا أكثر..

وركز، هل أنت ممكن تكون سبب في إيلام غيرك؟ لما بتقرأ استقبال الناس لتصرفات كنت متصور إنها مش مؤلمة لحد.. بيدأ إدراكك يساعذك إنك توقف وتتغير..

إشارات الخطر بتبقى بسبب نواقص نفسية بيتم استمداها من العلاقات فتبقى عبء على الطرف الثاني.. أو بتكون بسبب الاختلافات في الشخصيات اللي بتخلي كل واحد بيعبر جُوّه العلاقات بأسلوب ممكن يتعب..

إدارة الإشارة بشكل صحي هي الطريق الوحيد إن العلاقة تتحرك بيكو في اتجاه صحي.. عشان كده العلاقات واحتكاكنا بالناس بيكون أكبر مُعلم لينا عن

ذواتنا وعيوبنا.. لما بتركز إنك تفك شفرة الرسالة وراء الألم.. بتقدر توعى
للإجراء المطلوب لإدارة العلاقة.. فتقوي منها متضعفهاش..
وبكده بقى الخطر.. هو سبب الأمان.. سبب تغييركم انتو الاتنين للأحسن.

∞ ∞ ∞ ∞ ∞



اختطاف

توقّف عن التطلّع للنجوم.. على الرغم من بريقها الساطع الذي يخطف قلبك.. ستظل في قُربها تتوهج وتحترق.. حتى تهوي بداخلها.. فتحوّل إلى ثقبٍ أسود يبتلع كل شيء.. تلك حياة النجوم.. من نور يضيء لك.. إلى جاذبية تسحّك.. فلا تقترب..

ومن حيث لا تدري بتلاقيهم في حياتك منورينها..

فجأة وقتك كله اتملى بيهم..

وأفكارك كلها بقت بس حوالِيهم..

تحس إنك مليون سعادة وتفاؤل وإقبال إنك تعيش..

الصراحة الإحساس اللي بتحسه معاهم ميتنسيش!

مُبهرين بشكل رهيب.. مبتزهقش معاهم.. مفيش ملل..

بكل معنى الكلمة الحياة حوالِيهم إثارة وتشويق ومتعة..

اهتمام فوق الوصف.. حنية رهية تملك دَفاً.. ونس مستمر عشان حواليك
باستمرار..

غير لما يتكلموا معاك عنك ويبصوا لك بانهار.. ويظهروا لك إنك حاجة كده
محصلتش!

وطبعًا أنت من غير ما تشعر.. أنت أصلًا مبتلحقش تفكر.. أنت ارتبطت.. انت
اتعلقت بعلاقتك بيهم.. كانت صحاب أو حب.. مبقتش شايف غيرهم في
عينيك!

سحبوك من كل دنيتك.. سحبوك من كل اهتماماتك..

بقى أي شيء عايز تعمله.. مش عايز عمله إلا لو هما معاك.. عايز تشاركهم
كل كبيرة وصغيرة في حياتك..

بدأت تبادلهم الاهتمام.. بدأت أنت كمان تتواجد بشكل أكبر.. بدأت بمنتهى
البساطة إنك تحبهم.. وبقيت عايز تديهم.. من كل قلبك..



جمال البدايات

المشهد ده رغم جماله.. ورغم إن كلنا لما بندوقه بنعشقه.. وبنتمنى يحصل على طول لينا.. مُرهق على المدى البعيد..

كلنا عارفين جمال البدايات في العلاقات.. وهو ده اللي بيخلينا نُقبل على توسيع دوايرنا والتعرف على ناس جديدة.. لكن مشكلته إنه بيلغي العقل تمامًا ويبسحبك لدرجة إنه بيزحلقك.. بيزحلقك لدايرة علاقات المفترض قريبة وانت أصلاً مش مجمع إيه اللي يحصل.. ولا تقدر تقول إن علاقتكم ببعض ناجحة في الوقت القصير ده.. عشان ينفع تقربوا كده..

العلاقات بتبني بالاستثمار.. تبقى متوازن ما بين استثمارك في نفسك واستثمارك في العلاقة.. فتأخذ وقتها وتتحرك براحتها.. لأن كل موقف يمر بيكو بيعرفكم ببعض.. بيوريكم التحديات اللي باستثماركم وإدارتكم ليها بتقوي علاقتكم أكثر..

لما العلاقة بتبني بس على هرمونات الإثارة والتشويق والمتعة.. بتبقى بالظبط شبه اللي أخذ حقنة بنج.. كأنه أخذ مسكن.. أو أخذ مادة مخدرة تخليه مبسوط وسعيد وتلهيه عن الحياة!!

بدون الاستثمار والرعاية.. العلاقات لا تنضج وتظل مسجونة في سحر البدايات.

وده بالظبط اللي بيعطلك.. إنك اتلهيت تمامًا عن الواقع وعشت الحلم معاهم.. والحلم مش بيكمل..

الواقع بيدخل وبيطالبك تكمل في مسؤولياتك.. وبيطالبك تكمل في حياتك.. وبمجرد البداية ما خلصت.. الحقنة هديت.. وفجأة تتصدم إنك مفتقد جدًّا شكل علاقتكم دي.. ومش قادر تتقبل التغيير.. وكأنك تخيلت إنهم بعدوا أو اتغيروا.. مقدرتش تستوعب إنك أنت بس اللي اتعلقت «بمرحلة» واحدة من العلاقة.. عشان نسيت عن طريقها الحياة ومرارتها.. فمش عايز ترجع للواقع ثاني..

زي الطفل لما بياخذ أجازة وتوديه الملاهي.. وبعدين المفروض تصحيه ثاني يوم يروح المدرسة!!

عشان كده دي من أكثر الإشارات اللي بتعبر عن خطورة رهيبة..

ليه؟

لأنها بتضرب التوقعات في السماء.. بتفصلك عن الواقع وبتخليك تحس بأحاسيس صعب تلاقيها ثاني في نفس العلاقة بعد فترة بنفس الشكل كده.. بتنسيك نفسك وإدارتك ليها.. وبتبقى معتمد بس عليهم كمصدر للسعادة..

بتعرضك للتعلق وعدم التوازن في باقي دوائر حياتك وعدم القدرة على فعل المسؤليات..

بتأثر على نفسيتك.. وبتخليك في شبه حالة اكتئابية فاقد الشغف لكل شيء ما عدا علاقتك بيهم..

وزي ما بتشغلك عن كل حاجة.. فهي بتشغلك عن استثمارك في نفسك.. فبتفضيك أوي من جوّه.. وبيبقى بس مصدر امتلاك العلاقة دي.. وده بيخليك مستنزف.. زي اللي مستني الجرعة بالطببط.. بقت علاقة إدمانية..

سحر البدايات يفسد التوقعات ويسبب التعلق وفقدان الشغف بالحياة من دونهم

الطبيعي إن فيه درجة من درجات سحر البدايات.. عشان بريق الجديد مهما عملت وتوازنت بيكون له لذة..

بس الفكرة كلها إنك لما تبدأ تحس بعوارض التعلق.. يبقى تنتبه جدًّا لنفسك.. إنك توازن.. ما بين نفسك وبينهم.. ما بين علاقاتك كلها وعلاقتك بيهم.. ما بين مسؤلياتك واستمتاعك معاهم..

كده هو الطريق الوحيد عشان العلاقة تكمل صح.. البريق ميخفطش عينك ويزغلك ويعطلك على احتياجهم همّ وبس!

والمفترض إن الطرف الآخر مش هيعترض لأن برضه عنده حياته.. وعنده مسؤلياته.. فده شيء طبيعي في منحنى العلاقات.. بتبدأ بتركيز جامد أوي عشان يحصل ارتباط نفسي بينكم.. وبعدين الدنيا بتهدى بدخول الوقت والمسؤليات... إلخ.

∞ ∞ ∞ ∞ ∞



الرسائل المتناقضة

فالإشارة الأولى للخطر إنك اتزحلت بسبب إن لذة البداية شغلتك..
الإشارة الثانية اللي ممكن تتعرض لها.. إصرار الآخر إن كل ما تتوازن..
يزحلقك!!

ولا يؤلم القلب مثل تساؤلاته: هل هو حبيب قريب، أم مجرد عابر طريق؟
أيوه بالظبط كده.. وكأن الشريط بيحيب من الأول.. كل ما تحس إنك عايش
ومستقر.. تلاقي جرعة نشطة من الاهتمام بتشدك تاني تعيش نفس
المشاعر.. اللي هو القلب مش بيستحمل تعريضه المتغير بين السخن أوي
والساقع أوي كل شوية بشكل يصدمه!

فبتنقلك من لذة البدايات للرسائل المتناقضة.. دي مرحلة بتخليك فاقد القدرة
على التركيز..

لأنك بتبدأ مش قادر تحدد شكل العلاقة.. إحنا قرييين أوي ولا إحنا علاقتنا
بعيدة؟

لأن فجأة يحصل قرب شديد بدرجة عالية من الحميمية.. وفجأة تحس ولا
كأنهم موجودين..

العلاقة بينكم مش مستقرة.. ومفيش علاقة طبيعية بتفضل تدور بين بعد
جامد أو إثارة وتشويق ومنتعة.. صعب إنك تمر بإحساس زي ده مع شخص
واحد وتبقى عاقل كفاية إنك تدير نفسك وتوقعاتك..

فبيحصل لك نوع من أنواع الذبذبة.. الشوشرة على كل أجهزة استقبالك..
وغصب عنك بتبدأ تلف في حلقة مفرغة من التساؤلات..

مينفعش تحس بإحساسين متناقضين من نفس الشخص..

مينفعش يبقى الشعور بالأمان مرهون بس بوجودهم.. ولما يختفوا الأمان في
علاقتكم ينعدم وتحس بتوهان..

حقك لما تبدأ تحس إنك متلخبط.. إنك تطلب توضيح..

الوضوح يُنهى اللعبة.. يُنهى المرح.. ويضع الآخر أمام مسؤولياته..

ولو لقيت الطرف الثاني مش بيعينك.. مش بيرد.. ومرتاح أكثر في الملاهي
اللي معيشها لك.. يبقى ساعتها افهم إن هو متلذذ بإنه بيأثر فيك بالشكل ده..
مبسوط إنه قادر يآثر عليك.. قادر يبقى سبب سعادتك وتعاستك..

قلوب عندهم مشكلة في إنهم يملوا أنفسهم باستثمارهم فيها.. فبیتملوا على حساب تحکّمهم وسيطرتهم في شعور غيرهم بهم.. شعورهم إنهم بیتحکّموا إمتى تقربوا وإمتى تبعدوا بيملاهم ويحسّسهم باستقرار نفسي..

للأسف الشخص اللي كده معندوش مشكلة في اللي بيعمله.. فمتتوقعش منه إنه يفهمك.. هو مرتاح كده.. بيتملي كده بشكل لا واعي واللي بيحركه استمتاعه الكثير في سلوكه.. إيه اللي يخليه يتغير؟

لكن في إيدك إنك تكسر الحلقة المفرغة.. متفضلش عايش بس رد فعل ليهم..

∞ ∞ ∞ ∞ ∞



اظبط علاقة

علاقة زي دي عشان تتظبط... لو اتظبطت، محتاجة منك إنك تبقى المُبادر..
تبقى قوي كفاية إنك تقرب وقت ما أنت كمان تحتاج وتبعد لما تبقى عندك
مسؤولياتك.. وعندك باقي الدواير ومحتاج تتوازن..

ولما تقرب أوي.. متلزقش!

متنبسطش أوي من دفا القرب.. وحاول إنك متتوقعش الاستمرار..

خليك طبيعي لما تحس بحاجة قولها واعملها.. وضح ليهم شخصيتك وأفكارك..
قول احتياجاتك..

oo oo oo oo oo



الكون لا يدور حولهم فقط..

فاللي عايزك ببدا غصب عنه ينصاع إن العلاقة مش بس بتلف حواليه.. بدأ يستوعب إن فيه آخر.. فتبدأ العلاقة ترجع صحية.. لأن بتعاملك الصح علمته ازاي يتعامل معاك.. بالذات إنك مش قاعد بتلوم وتعاتب وهو للأسف مش مدرك للمعاني اللي بتتكلم بيها.. الصح إنك تظبط له التعامل بإنك تبقى مراية لنفس شكل تصرفاته..

ومع الوقت، ابدأ وضح في كل تصرف يضايقك إنك اتضايقت.. بشكل فعّال وفيهوش معاني سلبية وبمنتهى الوضوح والموضوعية بتطلب احتياجاتك..

الوضوح بينجي العلاقات.. يقرب بينكم المسافات.. فلو العلاقة فيها عشم عالي وقرب.. ولسه متعرضة للزحقة كل شوية.. ده شيء متعب.. مطلوب منك تحطهم في دايرة المعارف.. ما هو مش كل واحد في حياتك قربت له هيفضل ليك قريب.. اللي بيكملوا بقرب دول اللي بيذلوا زيك في بناء العلاقة..

لكن اللي يقرب بس وقت ما يحس بأنه عايز يستمتع.. لو ده مناسب معاك.. يبقى خليه في دايرة المعارف اللي تحب تستمتع معاهم وبس.. متحملش علاقتك بيه معاني أكثر من كده أبدًا.. تغيير زاوية نظرتك ليه هيساعدك كثير تخفف وجعك..

وطبعًا عشان تنقل نفسك من توقعك ليهم في دايرة لدايرة بيكون مش سهل.. بيكون برضه فيه وجع غصب عنك.. لأنك كنت تتمنى قربهم.. تتمنى استقرارك معاهم.. بتحبهم!

فعشان كده بتسمح لنفسك تتنفس.. حقك تتوجع.. وأنت بتقلل توقعاتك منهم.. بس معلىش الوجع هو بس اللي بيعلمنا نتعامل ازاي بشكل صح في علاقاتنا.. بيحدد الناس في دواير صحية.. تخلي حياتنا متوازنة مفيهاش غموض يتعب ويعطل..

الغموض الزايد ده هيخليك متشتت.. ومش قادر تحدد تتصرف ازاي.. فتفضل بس بتلف في عالمهم.. وتفقد نفسك شوية بشوية.. من كتر ما تحس إنك دخلت نفق مظلم مالوش أول من آخر!



الغموض

خوف وقلق يدمران سلامك الداخلي.. ولا تستطيع الفرار..
كلما حاولت أن ترى الطريق يتغشاك الظلام فتفقد الرؤية..
الواحد يبوحس بتهديد نفسي رهيب لما يبقى مش قادر يفهم اللي قدامه
يفكر ويوحس بإيه.. ولا ليه مش بيتكلم ويتواصل ويشرح اللي جواه!
تحس إنك عايش فيلم من الغموض غير المُبرر غير إنه يقلقك.. ويخلي
إحساسك عالي بالخطر..
حاسس إنه بيبعد.. حاسس إنك هتفقد.. حاسس إن علاقتكم بتنتهي..
تحس إنك تعرفه أوي.. وبرضه تحس إنك متعرفوش..
تحس إنك قريب ليه أوي.. وفي الوقت نفسه تحس إنه بعيد.. وإنه حلم وأنت
بس اللي مصدقه!
يوم ما يكلمك.. يسبب لك كلمة واحدة مُبهمة تفضل تخليك تتشقلب في
معاني تفزعك وتعطل طريقك في الحياة..
تطلب منه يوضح لك.. يسببك من غير توضيح!
تطلب منه يطمئنك.. يبص لك ويغير الموضوع..
قلقك جواك عمال يتكؤم.. لغاية ما يقلب معاك بفزع.. علاقتك معاه بتخليك
مُستنزف في معارك غامضة بسبب الغموض الشديد اللي محاطك بيه..
ومن شدة وجعك، تحس العلاقة اتحولت لمجرد سراب من الوعد بالراحة
والسعادة.. أنت مش قادر تفهم أنت مُنتظر إيه.. وليه بتلف في نفس الوجع..
ليه مش بتقف وقفة تريحك وتنتهي الموضوع!
ولا كأنك أسير حبهم.. أسير احتياجك لوجودهم.. أسير من شدة ما لمست
روحهم من جُوه فحبتهم.. فمش قادر تبعدهم عن الطريق..
تفضل مستحمل.. مرة تتخانق.. ومرة تعذر.. مرة توضح وتبين.. ومرة ترجع
تتغافل.. يمكن!!
أصبح الظلام يستنزفك.. ولم تعد تجد مخرجًا للنور.
والحقيقة أنت حياتك بقت عبارة عن كم تساؤلات مبتخلصش.. وكل شوية
تلاقي تساؤل جديد بيقتضي على نفسك وراحة بالك.. ومش قادر تحكم أنت
إيه بالنسبة لهم..

لو كل ده مكنش إشارة ألم.. إشارة خطر واضحة ليك إن دي علاقة مرهقة..
يبقى أنت اللي هتبقى اخترت تؤذي نفسك بإيدك..

∞ ∞ ∞ ∞ ∞



درجة الغموض الطبيعي

الوضوح في العلاقات هو السبيل عشان يحصل تقاُرب بين اتنين شخصياتهم مختلفة.. كتر غياب المعلومة عن الأفكار والمشاعر اللي بيحسوها.. تخلي العلاقة عايمة جدًا.. مش مسنودة على شيء قوي.

الطبيعي إن فيه جزء من الغموض بيبقى موجود في العلاقات بسبب إن كل إنسان مشغول بحياته.. فيبقى جزء خفي من حياة الآخر غامض بتحب تدور عليه وتكتشفه.. ده بيساعد في تجديد الشغف بينكم.. إن كل فترة يبقى فيه جديد بتحاول تفهمه.. جديد بتحاول تعرفه عنه.. جديد بتكتشفه..

وعشان كده فيه ناس بتعرف تحتفظ بتجديد الشغف في علاقتها بانهم محافظين على المسافات.. عارفين إن الثقل صنعة.. فبيتقلوا بس عشان تفضل شغوف بيهم.. بيلاعبوك بس بشكل مش موجه.. بشكل يخلي العلاقة فيها شغف وتجديد.. لأن برضه مينفعش نفضل مدلوقين مع أصحابنا.. لازقين لهم على طول.. بنحكي كل حاجة.. فتحول نفسك لدايرة أمان كاملة تخليهم يزهدوا فيك.. النبي آدم بطبعه بيزهق.. العلاقة المملة اللي مفيهاش أي أحداث تخليه يفكر ولو بشكل بسيط إنه محتاج يستثمر عشان يحافظ على وجودك..

المفترض إنه طبيعي جدًا لما تكون محافظ على إنك تملى نفسك⁽¹⁾ أول بأول.. ده هيخليك بشكل طبيعي مش مُفتعل.. مشغول بنفسك وإدارة حياتك وبياقي دوايرك.. فيتحقق عنصر التشويق بشكل طبيعي..

لأن مع الحياة والوقت هتتغير وهتبعد عشان تخلص مسؤولياتك وتقرب.. وكله بشكل طبيعي بسبب إنك إنسان مش فاضي لعلاقة واحدة وبس.. وده الشكل الصحي جدًا والمتوازن بين الغموض والوضوح.. بيتخلق لوحده بس لما تتوازن وتنشغل بإدارتك لذاتك..

∞ ∞ ∞ ∞ ∞



درجات الغموض

الغموض ممكن يكون درجات.. فيه درجة ممكن تهدد كيان العلاقة اللي مبني على الوضوح.. بس هو غموضه جزء من شخصيته.. طبعه كده.. بيرتاح لما يبقى كلامه قليل.. وميحكيش كثير عن نفسه.. مبيظهرش أفكاره.. مبيطلبش طلباته وتكاد تكون مش مستوعب احتياجاته..

خطر الغموض اللي بالشكل ده إنه بيهدد أمانك.. أنت مش قادر تدرك هو محتاج إيه.. فبالتالي أنت ممكن تكون مش مريحه وهو مش بيتكلم! معندوش الاستيعاب إن قلة كلامه خطر..

التواصل هو الذي يُريح العلاقات ويجعلها آمنة من تقلبات الاحتياجات ومتغيرات الحياة.

والمشكلة الأكبر إنك ممكن ترتاح أصلاً بغموضه.. تحسه شخص مريح.. معندوش طلبات.. ولا عنده اعتراضات كثير.. ومع الوقت تكتشف إن العلاقة بينكم دبلت أوي.. وإن المساحة وسعت أوي.. أكثر ما ممكن تتصلح.. بقيتوا اتنين منفصلين تمامًا.. لأن بمجرد ما بريق البدايات بينتهي.. كل واحد فيكو بتاخده الحياة.. فحقيقي ممكن العلاقة تنتهي من سكات..

عشان كده التواصل يبقى فعّال في العلاقات.. التوضيح والبيان.. التعبير عن الاحتياجات.. التقارب في الأفكار.. تتكلم مع بعض ونعرض أفكارنا ومنخفض نختلف.. الاختلاف بيقرنا عشان يفهمنا بعض أكثر..

فمتسيبوش للغموض.. حاول تتكلم معاه.. حاول تشرح له بوضوح إن لو مفيش بينكم تواصل.. العلاقة ممكن تموت غصب عنكم.. غالبًا هم بس بينقصهم مهارة التواصل والتوضيح.. وممكن يتغيروا لما تصرح ليهم بالمشكلة.. فتلاقوا حل وسط يقربكم لبعض..

فيه شكل مختلف للغموض.. اللي هو مجرد قناع بيرتاح فيه.. غالبًا ده شخص اتعلم يحافظ على حدوده بشكل مبالغ فيه.. عشان بيحس بتهديد نفسي لو حد عرف عنه شيء.. الشخص ده بيكون محتاج بس وقت.. وثقة تبني بالراحة.. عشان يبدأ يثق إنه يتكلم معاك ويحكلك اللي جواه..

بتقدر تحدد إنها حيلة دفاعية.. لو لقيته لما تحاول توضح له إنك قلقان.. اتضغط وظهر عليه إنه اتضايق.. أو حط حدود خط أحمر كده عشان متفتحش الموضوع ثاني.. أي علامة لعدم ارتياح هتظهر.. لأنه حس بتهديد ثاني لمحاولتك سبر أغواره..

عشان كده، بالوقت والصبر وتثبيت الثقة، بتبث له أمان يخليه يبدأ يفتح لك أكثر.. المهم إنك تتفهم إنه غصب عنه.. ومتضغطش عليه.. بس في نفس الوقت متسيبش العلاقة يغلفها الغموض.. حاول واحدة واحدة تساعده إنه يتكلم معاك..

هو بس بيستعمل الغموض كوسيلة دفاعية يحمي بيها كيانه من تهديد تطفل البشر.. ومش بيكون قصده يؤدي حد.. بس هو مرتاح أوي إن محدش معاه في أفكاره(2)..

لو شخص في حياتك كده مضطر تكمل معاه.. عندك حل إنك تطالبه يلاقي طريقة يطمئنك بيها تريحه.. من غير ما تبقى هددت له الحماية الذاتية المتصورة دي.. وفي نفس الوقت تنصحه يروح لدعم متخصص.. لأن ده غالبًا محتاج تعديل مفاهيم عن طريقة إدارة الحياة.. لأنهم بيعزلوا أنفسهم عن الحميمة في العلاقات.. ودي من أهم احتياجات الإنسان مينفعش يعيش من غيرها.. فيتعبوا أكثر مع مرور الوقت.

اتغير ووافق، كان بها.. متغيرش ومضطر تكمل معاه.. ولا بد تعرف تشوف غموضه في حيزه صح.. متاخدوش على نفسك.. افصل من غموضه وطمئن نفسك..

عشان نفسك بتحس بتهديد.. ابدأ كلم نفسك برسائل تأكد لك إن مفيش في إيدك حاجة تعملها.. وإن اللي عايز يتكلم بيتكلم مش محتاج منك ضغوط.. وابدأ ثبت رؤيتك لذاتك.. واستثمر في نفسك واملاها كويس(3).. واستثمر في العلاقة بأنك تزود من جرعات الحب غير المشروط(4)..

غالبًا العلاقة دي لو فيها خير.. لو الإنسان ده بس مجروح.. وخايف من جواه.. جرعات الإيمان والثقة اللي هتبثها في العلاقة.. هتخليه يتخلى مع الوقت عن حذره ويبدأ يسمح لك بالقرب والتواصل الواضح..

المهم إنك تعرف تدير قلقك.. تعرف تدير خوفك عليه.. تعرف إمتى تقول لنفسك كفاية محاولة في التدخل في اختياراته لنفسه ولحياته.. كل واحد مسؤول عن إدارة مشاعره.. لما حد بيزود جرعة الغموض ويرفض يوضح.. خلاص تطمئن نفسك إن ده مش بإيدك.. وإن دي مسؤوليتهم في إدارة أنفسهم.. لو مطلبوش مساعدة متفضلش موجود وبتلج على إنك تساعده.. سيب مساحة.. طمن نفسك كده إن مفيش حاجة ممكن تعملها.. وانهم عليهم إدارة أنفسهم..

كل طرف في العلاقة مسؤول عن إدارة مشاعره.. تعلم متى تتوقف وتنسحب لتنجو.

∞ ∞ ∞ ∞ ∞



الفيلم

فيه غموض بقى من نوع مختلف..

معيشك فيلم من الإثارة.. في الأول ممكن يكون جذاب ويشدك.. بس دوام استمراره بعد ما علاقتكم استقرت بتخليك حاسس إنك بتلف في دوامة.. مش عارف تنقذ نفسك منها.. فهتغرق في الآخر فيها..

فيه ناس عرفت إن طريقة الغموض بتساعدها تعزز مكانتها عن الطرف الثاني.. فوجود نواقص كثير جواهر مش بيعرفوا يتعاملوا معاها بشكل صحي.. مش بيملوا أنفسهم.. فيبدأوا يستمدوا شعورهم بالأهمية والقيمة من إنهم يلاعبوك بالغموض.. بشكل لا واعي..

هو بيغذي أوي شعورهم بالذات إنك تبقى قلقان وملهوف.. همّ من جواهرم بيحسوا بأهميتهم لما تدمنهم.. فبنفس طريقة شغف البدايات في الرسائل المتناقضة بيقتربوا.. ويرجعوا يبعدوا.. بس المرة دي القرب والبعد في التصارح والحكي وإنهم يشاركونك حياتهم بتفاصيلها.. تلاقيك مع الوقت لفيت حوالهم وده بالضبط اللي عايزينه عشان يحسوا بقيمتهم في العلاقة..

∞ ∞ ∞ ∞ ∞



ازاي أعرف؟

هتقدر تعرف لو الشخص بيلاعبك كده.. لو لقيته كل ما يلاقيك اتضايقت رجع تاني يهتم.. رجع تاني يحكيك.. وكأنه بيديك الجرعة بالضبط عشان تآمن وتقرب.. ويرجع تاني للغموض.. فتتشد أكثر!

أول العلاقة بيكون جرعة من التوضيح عن أنفسهم وأفكارهم ومشاعرهم عشان ترتبط بيهم.. وبعدين يبدأ الغموض يزيد واحدة واحدة لغاية ما يبلغ علاقتكم.. ويرجعوا يكسروا الغموض عشان يجددوا شغفك بيهم بس..

إدما نك ليهم وإنك تبقى تحت سيطرتهم هو ده بالضبط اللي هما بيحبوه وعازينيه..

بيرتاحوا لما يحسوا باهتمامك واستمرار شعورك بالخطر.. وانهم بيحسوا إن دي الحاجة اللي هتخليك تفضل موجود.. ومتمشيش!

البعض لا يجد سعادته.. سوى في استنزاف سعادتك دون وعي أو تقدير.

اللي بنقوله هنا مش مجرد طبع ولا قلة مهارة في التواصل.. مش مجرد بير بس غميق.. لا، ده نفق مظلم.. متبقاش شايف أبدًا نهاية الطريق..

والعلاقات محتاجة نور.. عشان تقدر تنمو وتزدهر.. وتقوى..

الضلمة بتعطل التقارب والوجود..

لكن النفق المظلم اللي معانا هنا.. كل ما تطلب منه نور.. يضلها في وشك أكثر بالسكوت!

كل ما تطالبه بالوضوح.. غموضه بيزيد أكثر..

ساعتها.. أنت تفهم إن دي علاقة مرهقة.. وباستمرارها هتكون مؤذية!

∞ ∞ ∞ ∞ ∞



ليه كده؟ أتصرف ازاي؟

للأسف النوعيات دي من التصرفات بتساعدكم يحسوا بقيمتهم وأهميتهم بشكل سلبي عن طريق الاقتيات على انفعالاتك.. على اهتمامك بيهم.. وكل ما بيزودوا الغموض بيديهم إحساس بسيطرة أكبر في حماية ذاتهم وتزويدها بالشعور بالأهمية والحب..

عشان كده أنت محتاج تدرك لما الغموض يزيد ويرفضوا التوضيح، إنك تحددهم في دايرة أبعد في عقلك.. تشيلهم من حيز اهتمامك.. مينفعش تفضل متخيل إن دي علاقة بتغذي جواك الأمان.. والراحة..

ممکن تكتفي بيهم في معاني الاستمتاع.. في معاني تجمعكم يقدرُوا يقوموا بيها.. من غير ما تتأذى بجوانبهم المظلمة..

اللي هو اعرفهم من بعيد لبعيد.. مش يبقوا جُوه حياتك.. جُوه اهتماماتك.. متخيلش إنهم سندك وقت ضعفك.. حطهم في مكانهم جواك صح.. فتستمتع باللي فيهم جميل.. وتبعد عن أذاهم..

لو فضلت تزود الاهتمام وهم في غموضهم.. أنت كده بتغذي في التصرف السلبي.. فيزيدوه..

ادبهم مساحة.. بعد ما حاولت مرتين ثلاثة الوضوح..

واتأكد.. إن لو أنت مهم فعلاً في حياتهم.. هيقربوا هما ليك.. زي ما بالظبط لما عملوا في أول علاقتك بيهم..

لو محاولوش يقربوا.. محاولوش يرجعوا جرعة الاهتمام ويحافظوا على الوجود والبيان بشكل صحي يطمنك.. يبقى خلاص.. أنت عملت اللي عليك في استثمارك في العلاقة.. دلوقت المهم إنك تعيش براحة.. مش مطلوب تعيش في كل التساؤلات دي.. فنزلهم من محور اهتمامك.. ولو عايشين معاك.. متخيلش اختيارهم ده يوجعك.. سيبهم براحتهم.. والوقت بس يا يقربكم.. يا يبعد المسافات..

∞ ∞ ∞ ∞ ∞



عِد الجمائل

أثقلتني..

أنت لا تُعينني أن أؤدي لصنيعك ما يستوفي الشكرا

أتعبتني بكثرة عطاء لا أطيق له ردًا..

عمرِكَ جَرَّبت تبقى حوالين إنسان ظاهره معطاء وجميل وبيرحك وتلاقي
جواك شعور باستياء مش مفهوم؟

كل ما يزود تصرفاته في راحتك.. كل ما تحس بجبل على قلبك.. كأن كل
تصرف يقوم به حقيقته لوم وإنك تتحط في موقف سلبي.. إنه بيعملك.. إنه
بيرحك.. وأنت بقى دورك إيه؟

همَّ بيدوك.. وأنت حاسس إن جواهم مشاعر لوم إنك بتاخذ.. أو مشاعر علو
إنهم بيدوك..

بتحس بيها بشكل غريب.. بتبدأ توصلك على شكل تهديد لذاتك أنت.. وتبدأ
تتوتر عشان تدافع عن نفسك.. بتبقى حاسس اللي هو محدش قالكم تدوا
والله..

بتحس بضغط نفسي شديد عشان محطوط في ركن مثلاً الأناني.. اللي مش
مقدر أبدًا عطاءهم..

أو تبدأ الضغوط تزيد إنك مش قادر توفى حقوق اتحطت عليك بسبب فاتورة
عالية من عطاء مطلبتوش..

أحبيني كما أريد.. ليس كما تريد فقط!

المشكلة إنك حاسس إنك متغرق بالعطاء.. محاصر بيه.. بشكل مبالغ فيه..

وغالبًا اللي بيخلي الإحساس بالعبء النفسي يتولد جواك إن عطاءهم ليك
في أمور أنت مش محتاجها.. فعشان كده بتحس إنه مش بيعمل كده ليك، ده
ليهم..

بتبقى عايز تقول: طب أنا مطلبتش، طب أنا مش عايز ده، وفي نفس الوقت
هو أكيد محدش يكره إن حد يديه.. بس الإحساس اللي جواك بيخليك
مخنوق.. وكان عليك دين بالظبط!

وبتبقى ما بين إحساسك بالذنب.. وإحساسك إنهم في الآخر مش بيؤذوك..
المفترض يساعدوك..

بس مينفعش تهمل إحساسك ده.. مينفعش تكتمه وتتجاهله.. هو متولد بسبب
معنى معين حسيته.. فمحتاج تتعامل معاه وتديره بشكل ميخليكش حاسس
إنهم بيحملوك جميل.. وكل ما يدوك تحس إنك بتعد الجمال!

والمشكلة إنك صعب تبقى واضح وتتكلم في الموضوع ده لأن ظاهرياً
بيتصرفوا بشكل معطاء.. وهيبقى شكلك بتطعن في نوايا وخلص..

∞ ∞ ∞ ∞ ∞



طب وبعدين؟

طيب لو افترضنا إن فعلاً دي حقيقة.. هما بيدوك بمنتهى الصدق.. بمنتهى الحب.. مش عايزين حاجة في المقابل.. طب لو ده حقيقي ليه بتحس بعبء كده؟ يمكن عشان أنت مبتحبش حد يجاملك؟ يمكن مش متعود حد يخدمك؟ حد يساعدك؟

عشان كده مهم جداً إنك تتعامل مع إحساسك بطرق مختلفة من جميع المحاور..

يصح عطاؤهم منفراً لك عندما تجد له فاتورة مؤجلة أنت مُطالب بتسديدها!

∞ ∞ ∞ ∞ ∞



اتعامل مع إحساسك صح

حاول تغير جواك المعنى وتحسن فيهم الظن حتى لو مش مرتاح.. أنت متضايق عشان مش حاب تحس بعبء إنك ترد جميل مش في استطاعتك.. فيبقى محور تركيزك على نفسك وإحساسك مش على هما بيعملوا كده ليه وإيه اللي ورا تصرفهم.. ده أسلم لقلبك.. ونحاول نبعد عن افتراض إنهم قاصدين يعملوا كده عشان يشيلوك جميلة..

الحقيقة إنك أكثر شيء بيخليك تستغرب إن فيه ناس تانية لما فعلاً بتخدمك أي خدمة بتحس بشكر وراحة حقيقية.. طب إيه الفرق؟

الفرق ممكن يكون في صدق العطاء عندهم اللي بيتأكد لك لما تيجي لقطة إنك مطالب ترجعه وترده يا إما تبقى خاين وندل... إلخ.. لكن لو مش بيطالبوك برد العطاء بشكل يعجزك يبقى تدير شعورك من جواك أنت وتغير معنى تلقيك لعطاءهم وتفهم إن دي طريقتهم في الحب والوجود ليك..

فلما يبدأ يظهر عليهم الخذلان إنك مبتردش العطاء بالشكل اللي متصورينه.. أصبح إحساسك بأن اللي بيديهولك عبء نفسي مفهوم دلوقت لأنك بقيت مطالب برد جميل مطلبتوش..

في ناس لما بتعمل العطاء.. بيكون جواها مشاعر إثبات الذات في تصرفاتهم.. بيقوا بشكل لا واعي بيرسموا ذاتهم عن طريق اللي بيعملوه غيرهم.. وكأنهم بيحسوا بس بقيمتهم لما هما اللي يعملوا وأنت لأ!!

كسلك.. تباطؤك.. عدم استطاعتك قدام مجهودهم هو اللي بيخليهم ينوروا للأسف داخلياً.. عشان كده بيدوك في محاور أنت مش طالبها.. هما شايفين بيعرفوا يعملوها كويس.. عشان كده بتحس بتهديد لنفسك في كل تصرف ليهم معاك..

البعض يصنع لذاته أهمية عن طريق مساعدة الآخرين، لكنهم يحيدون قليلاً عن الطريق وتصير مساعدتهم عبئاً عندما يشيرون إلى جودة صنيعهم طوال الوقت..

لو أنت بدأت تحس بإحراج من كتر الجمال.. اطلب منهم بوضوح إنك مش عايز تتعبهم.. وإنك بتتكسف من كتر العطاء.. بحيث إنك تساعدهم يفهموا شخصيتك.. بلغهم إنك لو محتاج حاجة هتطلب بوضوح تام.. عشان تسهّل عليك وعليهم..



اشكرهم وبس

فيه طريقة ثانية تساعدك في تجويد علاقتك بالشخصيات(5) اللي بتأكد لنفسها إحساسها بذاتها عن طريق العطاء.. بإنك تبقى مستوعب أهمية عطاءهم ليهم.. فتحسسهم بأهمية عطاءهم ليك.. ويبقى ده تقدير كافي جدًا لذواتهم.. بحيث إنك تبقى اتعاملت مع الدافع اللي وراء عطاءهم بشكل يملاهم ويريحهم وفي نفس الوقت بطلت تحس بتأنيب ضمير أو تحسس نفسك بإنك مطالب برد الجميل.. بشكل أنت متقدرش

عليه..

∞ ∞ ∞ ∞ ∞



مش مضطر تدفع!

عشان كده نقول خرينا صادقين في تصرفاتنا.. بلاش نحمل الناس فواتير إحساسنا.. أوجع شيء إنك تقرر إنك ترد العطاء.. ومع الوقت بناءً على اختيارك تحس إنهم بقوا عبء عليك.. فتبدأ تلومهم بشكل مش مرئي.. فتتحول العلاقة لحقل ألغام..

أنت أصلاً مش مطالب تمامًا إنك ترد الجميل.. هما مسؤولين عن مشاعرهم.. مسؤولين إنهم لو قرروا يدوك يكتفوا بتقديرك لما أخذت ويديروا جواهر مشاعرهم من غير تحميلك معاني عطاءهم.. كده مبقاش عطاء.. كده بقى دين.. بس للأسف أنت مطلبتيوش.. هما قرروه بالنيابة عنك.. فساعتها متحملش نفسك فوق طاقتك.. فُكك من شعورك بالذنب.. كل واحد بيختار قراراته.

وبالنسبة لك..

ادي لما تبقى قادر..

ادي بحب من غير انتظار مقابل..

ادي ابتغاء مرضات ربنا..

بس اوعى تدي عشان أخذت عشان تخفف تأنيب الضمير.. لأنه بيحمل جواك معاني الاستياء والشعور بالتهديد.. والأعباء النفسية بتزيد..

لما بندي واجب.. بتتحس جدًّا.. ولأن كل نواقص ذاتك بتقتات على عطاءك المشروط بعطاءهم.. وبتربي استياء صعب الكلام فيه بين الاتنين.. والفجوة تكبر..

لأنك اتحولت لنسخة من أفعالهم.. بقيت بتدي عشان يتشاف إنك بتدي وتبقى عملت اللي عليك!

حرروا عطاءكم من رؤية النفس عشان متتحولش العلاقات لعلاقات مرهقة مستنزفة.. العلاقات الصحية بتقوم على رؤية نفسك مع رؤية غيرك في نفس المعادلة بشكل يرضيكم اتوا الاتنين..

وحتى لما الواحد بييجي على نفسه.. بييجي على نفسه وهو مليون.. فيكون شعبان.. مش بيتملي قدام عطاؤه بمشاعر سلبية تدمره وتدمر اللي قصاده..

لما تلاقي كفة الميزان بتعلى ناحيتك.. عشان مصلحتك أنت.. ساعتها صدقني أي فعل بتعمله مغلف بمعنى حب هيبقى جواه مشاعر سلبية بتتحس عند الطرف الثاني.. فمش هتقربكم، هتبعدهم أكثر..

اصدق في تصرفاتك.. عشان تحس بحلاوة علاقاتك!

∞ ∞ ∞ ∞ ∞



الغيرة

وكم تألموا..

مشاعر مرهقة استنزفت قلوبهم..

حين وجدوا مكاتتهم يتشارك فيها آخرون..

لقد فقدوا معاني القرب والاحتواء..

صاروا مثل الجميع.. دون تمييز.

فيه ناس الحب بالنسبة لها يعني أنت بتاعي وبس!

بتحبك تلف حواليك وأنت تلف حوالها.. تشاركك تفاصيل يومك..

يحبوا يعرفوا كل حاجة في حياتك.. ويبقوا أولوية على قائمة انشغالك..

ومش بيستحملوا تعاملك مع حد غيرهم.. ولا يقدرُوا يتقبلوا اهتمامك بشخص
أخر!

أصل من وجهة نظرهم الغيرة بهارات الحُب..

هما متصورين إن كل ما بيحسوا بغيرة عليك ببينولك مدى اهتمامهم وحبهم..

بس الحقيقة الغيرة بتوصّل الإنسان إنه يحس بتهديد نفسي وإن مالوش
مساحة يتحرك فيها ولا يتنفس..

الغيرة مش شعور.. الغيرة قرار اتاخذ في عقلك بناء على معاني ادتها
للموقف من وجهة نظرك.. الإنسان لما بيغير فده معناه إنه حاسس بتهديد
شديد ويبحرکه الغضب الشديد.. إحساس بالتهديد عشان حد اقترب من
ملكية له.. يعني أنت بقيت ملكه!!

ومن هنا تيجي المشكلة.. هو إحنا بنتملك بعض؟

∞ ∞ ∞ ∞ ∞



الخطر

إمتى بنحس إن الغيرة إشارة خطر؟ لما تخرج من حيز التعبير عن الحب..
لحيز الاستحواذ كل ما يظهر طرف آخر في الصورة..

ممکن يبقى طبيعي الشعور ببعض التهديد لما يحصل تقارب لحد بيحبوه.. لكن
اللي مش طبيعي إنهم يفضلوا محبوسين في معاني الغيرة.. والعلاقة توصل
لمرحلة عالية من التهديد عشان مش عارفين يستحوزوا عليك بشكل
يطمنهم..

الغيرة تُشعرك بتهديد.. تُشعرك بقيود.. تدفعك للهروب.

تبدأ الغيرة تاخذ حيز مش طبيعي لما تقلب لمرحلة التملك.. وده بيظهر في
شكل الغضب الشديد.. الخناق الرهيب.. الخصام.. والعقاب.. كل ده مؤشر إن
الشخص بيعاملك إنك من ممتلكاته.. وكده خرجنا من حيز العلاقة الصحية
لحيز العلاقة المرهقة.. وساعات بتبقى

مؤذبة..

oo oo oo oo oo



ليه بنغير؟

لما يكون الإنسان بيملى نفسه بنفسه بشكل يشبعه على طول.. ده بيخليه أقل عُرضة إنه يتعرض لشعور الغيرة.. لأن الغيرة زي ما قلنا ممكن تكون بسبب الشعور بالحرمان من شيء تملكه.. أو ممكن تكون خوف شديد من فقد العلاقة فمعناه إنسان مش مطمئن لمكانه في العلاقة معاك ومش حاسس بأمان..

وممكن يكون باطنه تهديد للذات.. حد مش حاسس بقيمته.. فوجود أي شخص تاني في الصورة بيهدده جدًّا فيحس باحتياج شديد لتثبيت قيمته.. بس للأسف بدل ما بيثبتها من جواه.. بيثبتها بإنه يفرض على غيره إنه يبقى موجود لوحده في الصورة!!

لو أنت...

فلو أنت اللي بتحس بغيرة شديدة.. محتاج تقف مع نفسك وقفة.. ممكن تكون مش بتعبر عن غيرتك.. بس هي جواك.. بتخنقك.. بتقضي على سلامك النفسي..

وجودها جواك دلالة على إنك محتاج تثبت نفسك بشكل قوي.. تعرف قيمتك.. تعرف إن مفيش حد ممكن يستبدلك أبدًا.. لأن ليك بصمة مُنفردة في أي علاقة..

المشكلة إننا لما بنحس إننا ممكن نستبدل بنتعامل بشكل يفتقر للثقة.. وده بيظهر في أسلوبنا على شكل توتر.. قلق شديد.. وشعور إننا مش كفاية!!

فبالتالي اللي قدامنا فعلاً بيحس بإحساسك.. بيحسك مش كفاية!!

أصل لو أنت مش واثق في نفسك ليه متخيّل إن الآخر هيثق فيك إنك هتكفيه في العلاقة؟

إدراكك إنك مميز.. استثنائي.. يملؤك ثقة بأنه لن يستطيع الآخرون استبدالك.

∞ ∞ ∞ ∞ ∞



إيه اللي بيشدك في الناس؟

هتلاقي نفسك بتتشد للشخص المُكتفي بنفسه.. الشخص اللي تحسه واثق في نفسه وفي قدراته.. بيظهر على طريقة حركته وكلامه..

تلاقيه لما تتعامل معاه موزون في ميزان القرب والبعد.. متوازن في إدارة حياته فده بيديه ثقة كبيرة إنه يقدر يعيش بالناس أو لوحده.. شخص عارف قيمته كويس.. عارف قدراته كويس.. وعارف يدير دواير حياته بشكل يسعده..

فلما بتجيله مشاعر تهديد لأن ده شيء طبيعي إنه يحس بيها.. كل المعاني اللي عايش بيها من امتلاء جواه وقدرة على الحياة باستغناء بتثبته تاني.. فيطمئن..

فالغيرة تفضل في مستواها الطبيعي.. اللي هو تشعر الآخر بتميز مكانته عندك.. بس متحسسوش بشدة افتقارك واحتياجك ليه فيحس بتهديد لمساحته الشخصية!

الغيرة لو سببها كمُعبر عن الحب.. هتنمو معاه مشاعر عدم الثقة بشكل يهدد العلاقة ووجودكم مع بعض..

ولو حتى في أول إظهارها الطرف الثاني كان بينبسط.. لو حس إنها عدت درجة إنك بتحبه وبتحسسه بالتميز.. لدرجة إنك بتخنقه وبتتحكم في حياته وبتسيطر على معارفه هيحس بلا شك باختناق شديد.. وتبدأ العلاقة بينكم يبقى فيها شد كثير وممكن مع الوقت تدبل!

∞ ∞ ∞ ∞ ∞



لو الغيرة عليك...

١. أكد له مكانته عندك المميزة:

الغيرة شعور بتهديد نفسي.. كثير يكون حله إنك تساعد الآخر إنه يعرف مكانته عندك..

ممكن ده يكون إشارة على عدم شعوره بالأمان في العلاقة..

ممكن تكون بتعكس له إحساس إنك مستغني لدرجة سلبية بتحسسه بعدم أمان..

من مسؤوليتك في العلاقة إنك تثبت قيمة الآخر فيها عندك..

توريه الجزء اللي بيملاه في حياتك ومحدث يقدر أبدا يملاه غيرهم.. تفهمه إنه متميز ومختلف في عينيك.. ده كفيل إنه يهدي الشعور بالغيرة.. ويخليها في معدلها الصحي.

٢. خليك واضح لما الغيرة تزيد عن حدها:

لو الغيرة مستمرة بشكل مانعك تعيش حياتك بشكل يريحك ويريحهم.. مهم تتواصل معاهم بشكل صحي.. تشرح لهم إحساسك..

تأكد لهم مكانتهم وأهميتهم اللي محدش بيملاها غيرهم زي ما قلنا في أول نقطة.. وثبت ليهم معنى إنك محتاج مساحة وهما محتاجين يشتغلوا شوية على تطمين نفسهم وعدم بناء سيناريوهات على افتراضات جواهرم إنك ممكن تبعد عنهم عشان فيه حد تاني في حياتك مثلاً..

∞ ∞ ∞ ∞ ∞



إشارة أمان

فلما نعرف نتعامل مع الغيرة على إنها إشارة بتخلينا نأكد لبعض معاني الأمان.. نأكد لبعض أهمية المساحات والحرية في العلاقات مع عدم التعدي على الحقوق.. بتخلي العلاقة تقرب وتقوى..

الطبيعي إنك مش عايش بس لشخص واحد.. من واحنا صغيرين كنا بنتعرض للغيرة بسبب قلة نزوجنا وشعورنا باحتياج تثبيت ذواتنا عند أهلنا..

الأب والأم حبهم بيسع أكثر من طفل.. كل طفل بياخذ حيز معين من الحب والإعجاب والاهتمام.. كل واحد بيتحب بشكل خاص بانفراده وتميزه عندهم..

بس الأطفال بيحسوا بالتهديد ويعبروا بيه بشكل غير غاضبة.. وده بيبقى شيء كويس جداً.. عشان منه بتقدر تثبت لهم معاني التميز والاختلاف والتنوع.. فتبقى ظبطت منظورهم في معاني مريضة بتلبس للغيرة..

يبدأوا ينضجوا على مدار الوقت وبمداومة التطمين والتأكيد المستمر لمكانتهم عند الأهل.. قدرتهم على استيعاب وجود حد ثاني في حيز اهتمام ماما وبابا من غير ما يحصل تأثير سلبي هيزيد من غير أي انعكاس على ثقتهم في أنفسهم.. وبكده معاني الحب تنضج بشكل صحي مفهوش استحواذ ولا تملك..

وكالعادة مش الكل نضجت عنده معاني الحب بشكل صحي..

فده اللي بتحتاج تثبته لنفسك جواك لو اكتشفت إنك بتحمل معاني غير سلبية عشان حاسس بالتهديد.. وبتأكد مكانة الآخر عندك هتساعد كمان غيرك ميحسش هو بالتهديد!

لكن عمر ما بيكون الحل زيادة الاهتمام.. ده بيمرض المنظور أكثر ويعلي الاحتياج للتملك!

ولا بيكون الحل بالغضب إنك خانقني وتاعبني.. ده بيكسر الآخر أكثر وبيزود عدم ثقته في نفسه معاك في العلاقة..

ولا الحل إنك تتجاهل وتفرح باهتمامهم اللي على شكل غير.. فتسبب الثاني قلبه بيمرض.. لغاية ما يبدأ يتعبك في العلاقة قتبداً تضايق.. وساعتها تبقى حاسس إنه لوحده اللي غلطان..

العلاقات من أجمل ما فيها إنها بتبقى مراية تورينا عيوننا اللي بنشوفها بس لما بنحتك مع الآخرين.. فبتتعلم كثير عن نفسنا.. وبتبقى محطة ممتازة لإعادة امتلاء النفس وتثبيت المفاهيم اللي تعيشنا مرتاحين..

∞ ∞ ∞ ∞ ∞



سوء الظن

هم لم يسيئوا بك الظن..

هم زهدوا في الرغبة في الفهم..

فالأولى معبرة عن اهتزاز الثقة..

والأخرى تعكس أن وجودك عندهم.. عدم!

أسوأ شيء إنك تتعامل مع شخص من منطلق عشم وإنكم تعرفوا بعض كويس.. تعرفوا بعض لدرجة تخلي للعلاقة قدسية الأمان والمساحة للخطأ والغفران..

تبقى متخيل إن العلاقة بينكم ليها شعور آخر.. وبعدين تخبط في الواقع وتلاقي كل تصرفاتهم بتعلي الحدود والحواجز..

واللي كنت فاكره إنه عشم بينكم يسمح لمساحة من الخطأ.. مساحة لغشومية تحت الضغط.. يطلع إنه عشم مش في محله.. هو مش حاسس بكده، فكل تصرف منك بعشم بيتشاف بشكل ثاني خالص.. وكل تصرف غلط بيكبر جدًّا بشكل يهد من العلاقة..

وجع رهيب إن الواحد يحس إنه في علاقة مش مسموح فيها بالغلط.. وإنك بس مقبول على شرط إنك تتصرف صح..

وده لو أنت أصلاً كنت غلطاً!

تخيل الوجع الأكبر في إنك تتفهم غلط.. إنهم كمان مش بيدوك مساحة للبيان.. مش بيدوك مساحة للتفسير.. على طول سوء الظن بيك بيحكم علاقتكم.. فيحسسوك إنكم متعرفوش بعض.. في لحظة من غير ما تشعر بقيت غريب.. والعلاقة اللي كنت فاكرها قدسية.. اكتشفت إنها أساطير.. خيال مالوش دعوة بالحقيقة.. الحقيقة إنك سهل أوي تتخون.. من إنهم يحاربوا عشان يفهموا ويكملوا!!

الغلط اللي بنقع فيه لو حد أساء الظن فينا هو الاستمرار في التبرير.. وبيبدأ شعور الضحية يمسكنا.. وبقى حاسين بالجرح الشديد وعدم التصديق.. فنتقوع بعيد عنهم..

فبعد التبرير.. تبدأ مرحلة الابتعاد.. وفقدان العلاقة بالتدرج..

ظهور العيوب من الآخرين يسمح بنمو العلاقة وتقارب أطرافها، وليس سببا لانهارها.

∞ ∞ ∞ ∞ ∞



سوء الظن.. شطارة؟

العلاقات مبنية على الأمان.. على الثقة.. لما الثقة بتتهز.. العلاقة بتتهد بالبطيء.. وده كله عشان بدل ما ندير سوء التفاهم استسلمنا لمشاعر الجرح أو الغضب لظن سوء ومستثناش له أي تبرير..

أنت عارف إن من ضمن باكيدج القرب لإنسان: التصادم مع عيوبه؟!

يعني متتخيلش إنك هتعيش بس في المميزات اللي شدتك.. طبيعي إن العيوب تظهر.. وده علامة على مدى القرب اللي وصلت إليه..

فبلاش إنك أما تلقط عيب.. تبروزها له وتحطها في وشه في كل سوء تفاهم أو مشكلة..

عشان كده لو أنت اللي بتحس بسوء الظن في علاقاتك، محتاج وقفة مع نفسك وتبدأ تعدل التفكير.. شايف نفسك كسبت كثير؟ ولا بتخسر كل علاقاتك؟

سوء الظن للأسف بيكون بسبب الشعور بالخوف من الواقع.. كتر خيبات الأمل بتخلي الإنسان معندوش طاقة يفكر ويلتمس لحد أي عذر.. فبتخلية على أقل حركة يحسها عذر..

هو بيدي شعور مزيف بالأمان.. كأنك عملت حسابك واتجهزت للضربة قبل ما تاخذها!!

في ناس بتعتبر سوء الظن نوع من أنواع الذكاء.. والشطارة إنه يقدر يفهم غيره بيفكر في إيه وبيتصرف ليه.. أيًا كانت الدوافع لسوء الظن من الآخر هو يبهد كل دواعم العلاقة..

هو مش سامح لك تغلط ولا تسيء التصرف.. كل تصرف بتعمله بيديه ألف معنى.. ويبقى متأكد من ظنه.. محسسك إنه عارفك أكثر من نفسك.. وكأنه مدرك كويس أوي أفكارك ومشاعرك وأنت بتتصرف!

سوء الظن بيضر صاحبه؛ لأنه مش بيسمح له يعيش في علاقة مليانة طمأنينة وأمان.. مفيش حد يحب يفضل حوالين الناس قلقان! مفيش حد يحب يفضل عايش مترقب أحسن يتأدى.. ومن أقل حركة يحس بخيانة..

الافتراضات والظنون عمرها ما كان محلها أنها تتصدق.. وجودها بيخلي الواحد يعيش في حالة من القلق مستمرة مش بيعرف يوقفها أبدا.. لأنه حتى مش سامح للطرف الثاني إنه يشرح ويوضح.. بيني على أفكاره وبس..

بيمنع نفسه يحس بعلاقة مكتملة من كل جوانبها.. يعطل علاقته من أنها تنمو بشكل صحي.. العلاقة بقت مرهقة بشكل رهيب ليه وللآخر..

إشارة خطر رهيبة.. لما تلاقي على طول تخوين.. لما تلاقي وقوف على غلطتك.. تكبير عيوبك.. لما تحس إن مفيش مساحة لممارسة بشريتك.. صعب تفضل في علاقة مبنية بس على حسن السير والسلوك! والمشكلة الأكبر لما رؤيتك لنفسك تتهز بسبب رأيهم فيك!

∞ ∞ ∞ ∞ ∞



شوف طرف ثالث:

كل ما سوء الظن يبقى من دايرة أقرب.. من دايرة بتحب تشوف نفسك في عينهم.. طول ما هتحمس بوجع رهيب.. وممكن مع الوقت تبدأ تصدقهم.. وتختل رؤيتك لذاتك..

عشان كده مهم جدًا تثبت رؤيتك لنفسك.. تحس باستقرار جواك إن رأيهم مش لازم يكون معبر عنك.. تاخذ من كلامهم اللي ينفعك وتسبب اللي يضرك..

مش كل رأي.. مش كل ظن بيكون صحيح.. غالبها مبني على افتراضات ناتجة من تجارب الآخر مع الحياة..

عشان كده متاخدش كلام الناس عنك حق يقين.. مهما كانوا قريبين..

اعقل الكلام.. خد رأي حد ثالث متوازن تثق فيه.. عشان تقدر تتحرر من رؤيتهم وتخليها مجرد رأي مش يعبر عن شخصك أبدا..

لما بتاخذ رأي حد ثالث.. ده بيساعدك إن لو فيه نصيحة حتى لو باطنها سوء ظنهم.. تقدر تقوم بيها وتغير من نفسك لأحسن صورة منك.. لكن في نفس الوقت مش عشان في نصيحة تستحق رؤيتها إنهم بسوء الظن يوجعوك..

مفيش حاجة بتبقى في إيدك لو اللي قدامك بيسيء بيك الظن.. غير إنك تحاول وتشرح.. عشان أنت بتحسن الظن إن ممكن يكون حصل تلبيس في الموقف.. فبتبين وتوضح.. وتدي مساحة للي قدامك هو اللي ياخذ القرار..

oo oo oo oo oo



لو لسه مصمم على الأحكام:

المشكلة إن من موثيق القرب بين اتنين.. الستر على العيوب وعدم إبرازها للتجريح.. واللوم والتأنيب..

حد سمحت له يقرب منك ويشوف ضعفك قبل قوتك.. يروح بدل ما يقول لك على أجمل ما فيك ويعكسها لك.. بيعكس لك غلطاتك.. بيعكس لك اعترافاتك له بالأخطاء والمساوي..

ده طريق وجع وتجريح.. ازاي حد يبحب أي شخص ويعكس أسوأ ما فيه له؟! لو فعلاً يبحبك.. كان شاف مبرراتك وفهم أسباب غلطاتك.. كان عرف يحسن الظن في تصرفك.. كان شاف ظروفك.. كان قَدَّرَ ضغوطك..

وللأسف في عالمنا غالبًا مش هتلاقي بسهولة اللي يقدر يفضل يبحبك مهما أخطأت.. ويفضل جنبك مهما اتصرفت غلط.. وهي ديه المواقف اللي بتظهر فعلاً مين يبحبك.. من مين علاقته بك سطحية..

صدقني.. أنت محتاج حد يبحبك بعيوبك قبل مميزاتك.. لو فضلت قريب لشخص واقف على عيوبك وبس.. مع الوقت هتصدق الوحش اللي فيك.. وهيغلب على شخصيتك.. واللي كان ممكن يكون عيب مؤقت.. ممكن بإصراره على عكسه ليك يحفره جواك فيتحول لعيب فيك مدى الحياة..

ومش معنى كده إنك تريح وتبرر لنفسك غلطاتك.. تشوف غلطاتك وتحاول تشتغل عليها.. وتتصالح مع نفسك لو هي أخطاء مؤقتة بسبب ظروف أو ضغط.. فتعاهد ربنا مترجعش ليها تاني..

مش مطلوب إن كل الناس تتقبلك بعيوبك.. المطلوب إنك تشتغل على تحسين نفسك.. وعلاقاتك تسمح لك بمساحة من الأمان إنك لما تغلط ينصحوك بشكل مش منقّر.. بشكل يغيرك للأحسن.. فتحاول غيرها وتتصالح مع نفسك وأنت شايفها بتغلط..

أما لو كرهت نفسك وكرهت غلطاتك.. أنت متخيل إنك بتكره الغلط اللي فيك.. وهما مطلوب منهم يحبوه ويتقبلوه؟

لما تحب نفسك.. هتلاقي الحب اللي يليق بك..

وفي الآخر لو محاولش يعدي التحدي بشكل يقربكم.. لو مسمحش لنفسه إنه يلاقي مساحة الثقة اللي بينكم.. صعب أنت تعيش على طول في حالة من التبرير والاتهام المستمر..

سبب مساحة.. وخلي الوقت يحطه معاك في دايرة متخيلش بينكم جو يسمح
بتفسير تصرفاتك بشكل سلبي.. أو باحتكاك زائد يطلعك غلطان..

بنحافظ على العلاقة.. وبنحافظ على أننا نعيش في علاقات تسمح لنا بحرية
التصرف.. من غير اتهام..

∞ ∞ ∞ ∞ ∞



العقاب الصامت

التجاهل يسيطر على ميزان القوة في التعاملات..
هم يعلمون إن بعقابهم الصامت.. يستطيعون تحريكك كيف ما شاؤوا!
ولكن هل بالسيطرة تُبنى العلاقات؟!
يبعدوا عنك بالأيام.. وكمان بالأسابيع.. من غير ما تعرف ليه وحصل إيه..
فجأة اختفاء كامل.. وتعمد لعدم الظهور.. عكس تمامًا خط سير علاقتكم اللي
كانت قريبة ومفيهاش جفا!

هم كده اتغيروا.. من غير ما يفهموك سبب التغيير..
بتفضل تدور على سبب لتغييرهم جُوه عقلك.. هو أنا غلطت في شيء؟ هما
ليه يبعدوا؟

وتيجي تحاول تقرب.. تحاول تفهم سبب البعد المفاجئ.. تحس كأن فيه حيلة
مبنية مش قادر تعرف إمتى اتبنت ومين حط الحاجز.. بس هو شيء جواك
مانعك.. تسأل وتستفسر..

وكأنك لازم تفضل قاعد مستني.. لغاية ما كله بيان!!

امتى متعرفش!

كم الوجد اللي بتحس بيه مبيتوصفش.. مشاعر مؤلمة بتختلط عليك ما بين
شعورك بالخذلان.. شعورك بالهوان.. شعور بخوف رهيب لتكون هتفقدهم
ومن غير ما تفهم الأسباب.. شعور إن روحك بتتسحب منك.. حاسس بشتات!
صعب أوي لما حد يبقى في مكانة قريبة منك يقرر يعاقبك.. عقاب صامت!!
فميتكلمش!

وكل اللي بتبدأ تفكر فيه هو إنك ممكن تكون فعلاً غلطت.. أنت السبب إنهم
يبعدوا.. ويبدأ عقلك يستحضر كل وقت فات ومضى عليك.. واتعرضت فيه
لنفس النوع من الأذى!!

وتبقى متلخبط.. هما اللي بيؤذوني ولا انا اللي بأذيتهم؟

وشوية وتحس بغضب.. ليه بيحرموك الوجود.. ليه بيحرموك حقك في
الوضوح!

هو اللي بيحب حد بيقدر كده يفارق من غير كلام؟

هو اللي بيهتم بحد يقدر يسببه ينام بكل الوجد ده والخذلان؟

طيب هما بيتوجعوا زينا؟ ولا أنت رخيص ونسيانك أسهل شيء..
تساؤلات بتفضل تلف جواك.. ومتبقاش عارف لك طريق..
أنت مش مهم:

مشكلة العقاب الصامت إنه بيضرب عندك أهم احتياجات.. احتياج إنك تحس بأهميتك عند الطرف الثاني.. واحتياجك إن علاقتكم تبقى متينة قوية مميزة تحس فيها بانتماء..

فلما بيقرر يعاقبك هو بيلغي أهميتك.. أنا أهه أقدر أعيش كويس أوي من غيرك.. وده أكبر شعور ممكن يوجع طرف في علاقة إنه يحس إن وجوده زي عدمه!

وبيقتل عندك شعورك بالأمان.. إن ممكن الشخص القريب يبقى بعيد.. من غير تفكير.. فيحسسك بخوف شديد.. ويملاك بضباب.. يعطلك عن التفكير.. العقل لا يستطيع استيعاب كيف يستطيع من هو له مبلغ أمانه إنه يختفي دون مقدمات.

العقاب الصامت ممكن يوقف لك كل دواير حياتك.. بيضرب جواك بشكل عميق.. وكل ما يبجي من شخص في دايرة أهم وواحد من حيز اهتمامك كثير.. يبقى سبب إنك متعرفش تستمر إلا لو حصل بعض الوضوح.. لو حصل بينكم كلام عشان يهدي كل الوجود..

سكينة العقاب الصامت سكينة قاتلة.. وللأسف الناس اتعلمت تستعملها عشان تحقق أهدافها من العلاقة!!

هو مش خصام.. لأن الخصام بيكون بعد خناقة واضحة المعالم.. تقدر حتى يبقى عندك فكرة إيه السبب!

العقاب الصامت بيكون بعد ما تكون اتصرفت تصرف من وجهة نظرهم يوجع بشكل أو بآخر.. ما دام التصرف مش عاجب يبعدوا من غير ما يعاتبوك حتى.. حين تُصدم إنه يستطيع الحياة من دونك.. يتزعزع داخلك كل معاني الارتباط.. وتحيا في شتات.



بيواجهك ولا بيريك؟

في نوعين من العقاب الصامت.. الناس اللي مبتحبش المواجهة.. مبتحبش تعاتب.. مبتحبش الصدام.. ممكن يبعدوا عنك لغاية ما الدنيا تهدي جواهم.. هما مش بيحبوا المشكلات.. بيعرفوا يتعاملوا مع مشاعرهم اللي اتوجعت.. وممكن يكونوا بيرجعوا بحسن ظن.. ويرجعوا مش متضايقين.. أخذوا وقتهم لغاية ما الدنيا هديت جواهم ورجعوا يكملوا عادي معاك الطريق.. فهما ميقدوش يعاقبوا.. قد ما بياخدوا هدنة من كتر الضيق!

وفي نوع بيستعمل العقاب الصامت عشان بيريك!

أبوة كده زي ما قررتها.. اللي هو اتصرفت بشكل مش عاجبهم.. طب أنا هوريك..

هحرمك من وجودي.. مش هيفرق معايا وجودك..

هحسسك إنك مش مهم وأني اقدر أعيش من غيرك..

ليه؟

عشان ده بيرجع ليهم إحساسهم الواهم بالقوة.. بالسيطرة.. بالأهمية!!

الناس دي جواهم فعلاً «مثقوب».. بيحسُّوا بالتهديد من حاجات كتير.. فلما بيحسوا في لحظة في العلاقة إن مبقتش تحت سيطرتهم.. مش حاسِّين فيها بأهميتهم بشكل ما.. مش حاسِّين فيها إنك بتلف حواليتهم.. يدوقوك العقاب الصامت.. عشان لما يرجعوا.. تعرف بقى قيمتهم ولما تصدق إنهم رجعوا.. وتخاف يبعدوا.. فتزوّد اهتمامك..

من وجهة نظرهم أنت غلطان.. ومن وجهة نظرهم تستاهل يبعدوا لغاية ما يرجعوا يكلموك.. هما مش مدركين إن دي دوافعهم.. هما بس مدركين لمشاعر الضعف اللي حسوا بيها.. واللي مبيترتحش غير بمشاعر القوة اللي بتملاهم لما بيلاقوا إنهم بيقدروا يعيشوا من غيرك.. لما يقدرُوا يهملوك فترة.. فبترجع المشاعر بالقوة تديهم جرعة تملاهم على حساب استنزافك أنت!

وطبعا كل ما بيلاقوك قلقان.. متأثر.. موجدوع.. ده بيغذيهم أكثر من جوا.. فلما ياخدوا كفايتهم ويتملوا من رؤية أهمية وجودهم.. وأهميتهم في عينيك.. يرجعوا تاني يتكلموا!!

محتاج تتأكد:

بغض النظر عن دوافعهم هي إيه.. أنت محتاج تتأكد إن العلاقات الطبيعية مبنية على الوضوح.. وأن أي شيء عكس كده فده شيء مرهق مش

طبيعي.. والحياة مش مستحيلة وجع قلب وكل المساحة دي من التساؤلات..
خلي عندك يقين.. إن العلاقة بتتحرك وتنمو بالتواصل الصحي الفعال.. مش
بالخصام..

فتتعلم إن ده من حقك.. وتفهم إن ده مرض عضال في العلاقات متسمحش
بوجوده في أي دايرة أبدا معاك..

تطمين نفسك من الأولويات.. لأن مهما كنت بتملأ نفسك.. مهما كنت واثق
فيها.. غصب عنك العقاب الصامت هيهزك.. ويمررك بمشاعر مؤلمة كتير..
لأنه مش بيضرب ضعف جواك.. هو بيضرب جواك احتياج من حقك تحسه..
ومش من حق حد أبدا بيحبك يمررك بيه..

عشان كده في أول مرة يتعمل معاك الخصام اللي بالشكل ده.. ابدأ بالكلام..
متتظersh.. متتكسفش.. متحسش إنه هيقفل منك إنك تطلب الوضوح..

هي لو علاقة صحية عمرك ما هتحس بتهديد زي ده.. مش طبيعي إن في
علاقاتنا نفكر لو اتكلمت شكلي حلو ولا وحش؟ ولا أقلق على كرامتي!

بتوضح وتسال وتبين إنك حاسس بوجع شديد ومش فاهم ليه حصل كده..
بتطالب الآخر إنه يبقي صريح.. وأن الكلام في المشكلة يساعدكم تحلوها
فتقربوا مش تبعدوا.. وأنك مستعد تسمع.. ومستعد لو استدعى الأمر للتغيير!

∞ ∞ ∞ ∞ ∞



اكسر الدائرة المفرغة!

لو الأمر تكرر عليك بعد ما وضحت في نفس العلاقة.. ساعتها افهم إنك بقيت مصدر شحن ليهم.. وأن دي علاقة مؤذية بكل معنى الكلمة.. مينفعش تفضل سامح باستنزافك..

أكثر طريق يكسر لك الدائرة المفرغة من العقاب الصامت.. إنك تسيبهم براحتهم.. اللي يتكلم يتكلم.. واللي يبعد يبعد.. أنت أصلك وضحت مرة ليهم وفهمتهم العلاقات بتتدار ازاي.. فمعنى التكرار.. إن مفيش غير إنك تسيبهم براحتهم.. لا هتفضل تجري وراهم فيحسوا بالانتصار.. ولا هتفضل موجوع ومهموم عشان كل شوية بيبعدوا..

افهم أن دي كلها علامات على الطريق، إن إما العلاقة دي مش هتكمل بنفس مستوى القرب.. لأن مينفعش طرف واحد بس اللي بيني.. أو إنهم لما يلاقوا إن عقابهم مش جايب نتيجة يلاقوك عايش عادي.. فمفيش أي ملامح للفقد ولا التعب ولا الهجر عليك.. فيبدووا يقربوا ثاني عشان بيحسوا إنهم بيقدوك.. مش بقولك كلها تصرفات معبرة عن احتياجاتهم بس بشكل مريض!

كثير بيتعلم العقاب الصامت كوسيلة للدفاع عن نفسه لما بيتوجع.. لأنه بيحس نتيجة لما يبشوف الآخر متأثر.. لكن منهم اللي كثير بيتغير لما تتعامل بصمت تام مقابل عقابهم الصامت.. فيعرفوا أنها لعبة مش جايبة نتيجة..

واللي بيكمل في البعاد.. والصمت بينكم بيزيد.. هي علاقة بتنتهي باختيارهم.. وأكيد ده الخير ليك..

∞ ∞ ∞ ∞ ∞



بيقل منك..

ولقد اهترأ القلب من سوء ما تذوقه.. فانطفأ..

ستظل متلازمة الانتقاص منك، ذبول الروح..

مين فينا مبيحبش الضحكة الحلوة؟ مين فينا مبيحبش التهريج؟

لكن بتبقى أصعب شيء لما قعدة الضحك تتعمل عليك!

بتبقى مش عارف ترد ولا تتصرف.. غير إنك تحاول تضحك معاهم عشان ميبنش شكلك قافش.. وأنت من جواك بتغلي..

حاسس بانتقاص.. حاسس بإحراج.. حاسس بإهانة مُقْتَنَعَة.. بس مش عارف تتكلم ولا تشرح اللي بيدور جواك..

أصل لو للحظة قلت كفاية.. أو قلت إنك اتضايقت.. هيتبني على كلامك مليون معنى من تريقة تانية وانتقاص بشكل مختلف.. هيطلعوك دماغك صغيرة وكئيب.. هيطلعوك بتكبر الموضوعات.. وبتسيء الظن.. رغم إن كل كلامهم بيقل منك!

وفجأة كل حاجة ممكن تتقلب ضدك.. لو بس رفضت تمشي معاهم في مود الضحك والتهريج!

محدث بيقى مدرك كم الإحراج اللي بتمر بيه.. كم الشعور بالكسوف من النفس..

ساعات الموضوع اللي بيهرجوا عليه بيكون أصلاً ملف مفتوح جواك من سنين ومش عارف تتصالح معاه.. ملف حساس بيوجعك ومش عارف لا ترد ولا تتكلم.. ولا قادر إن حد يحسسك بالتقليل..

لأن النقطة دي أصلاً محسساك بانتقاص.. فكلامهم بيزوِّدها حقيقي عليك..

بيتبني جواك معاني سلبية كتير.. إن فيك اللي يسمح بالتريقة دي.. وكثير بتحس وسطهم إنك مش زيهم.. بتحس بغربة وأنت ممكن تكون أقل منهم.. لمجرد إن القعدة بسهولة بتتقلب أنها تبقى عليك.. وتبقى أنت مصدر تسليتهم وضحكهم.. ومحدث بيراعي شعورك.. وكله بيقى عادي في سبيل القعدة الحلوة اللي متتعوضش!

أنت لا تستطيع الدفاع عن نفسك، فالأمر من وجهة نظرهم خفة روح.



الأصعب من الإهانة..

الإهانة الواضحة بشكل عام شعور بيوجع جدًّا.. يحسس الواحد بالإحراج..
وممكن يوصلك إنك تحس بالكسوف من الذات.. الكسوف من الصفات اللي
بتخليك عرضة لتريقتهم..

التهريج اللي جواه معاني الانتقاص والسخرية.. جواه معاني التقليل
والتسفيه.. لكن معمول بطريقة شيك فمحدثش يقدر يتكلم ولا يقول إنهم
بيهينوك..

أي كلام في الموضوع يوصل إن شكلك أوحش.. شكلك طفل صغير بتزعل
على كل كلمة..

على الرغم من إن ده شيء طبيعي إن محدش يحب يبقى مادة سخرية لحد
أبدا..

الصديق أو الحبيب وجوده في حياتك مش عشان يمسك نقط ضعفك وينزل
فيها تريقة.. ساعات بيكون ده مقبول بين اتنين لوحدهم منهم لبعض.. بتبقى
مدرك كويس أوي ازاي تدير الحوار.. ويبقى واضح إنه مجرد فعلاً تهريج.. لكن
وسط مجموعة ماسكينك تريقة.. بيكون صعب إدارة الموضوع جواك..

وللأسف ده طبع موجود في العلاقات بشكل عام.. الناس متخيلة إنهم كده
دمهم خفيف!

∞ ∞ ∞ ∞ ∞



شوف نفسك صح

عشان كده مهم أوي تركز أنت بتشوفها ازاي.. هو غالبًا بيوجعك تهريجهم لما يجوا زي ما قلنا على نقطة ضعف أنت مش متصالح معاها..

من أهم مقومات شعورك بالقيمة.. إنك تتقبل ضعفك.. إنك تثبت صورتك لنفسك.. إنك تعرف تشوف نفسك بشكل صح يريحك في الحياة..

مش مطلوب منك أبدا تبقى مفيش منك اتنين.. تبقى أجمد واحد في كل صفاتك..

المطلوب منك إنك تبقى مدرك كويس أوي مميزاتك.. ومدرك كويس جدًا لعيوبك..

شغال تصليح في اللي مش عاجبك لغاية ما يعجبك ويرضيك.. ما دام شيء في أيديك تغيره.. تشتغل عليه لغاية ما توصل للي أنت بتتمناه..

لا تنسَ إن مهما كان اختيارك لرد فعلك الخارجي.. عليك تأمين نفسك داخليا وتذكيرها باستثنائيتك التي تراها أنت قبل كل البشر.

لو مش بإيدك تغيره.. بتقبله.. ده جزء منك.. وجوده مخلي شخصيتك على بعض بالصورة اللي هي عليها.. صورة بشرية طبيعية.. عمرها ما هتكون مثالية..

أصل قيمتنا الذاتية مينفعش تتصلح بالفوتوشوب عشان تبقى مفياش غلطة.. قيمتنا جوانا.. ثابتة بثبوت وجودنا.. وإحنا بس اللي بنقدر نورها لما نشوفها.. ونقدرها.. ونمتن لوجودنا..

تثبت صورتك عن نفسك في لحظات التهريج دي كفيلا أنها تخليك متاخدش الكلام على نفسك.. ولا تشوفه معبر عنك.. تشوفه معبر عن عدم تفكيرهم وتركيزهم إنك ممكن تتجرح.. هي مجرد مادة بتستعمل للضحك من دون أي دراية ولا بعد كبير..

نواياهم إيه؟

إحنا مالناش في نوايا الناس.. هل تهريجهم مقصود عشان يجرحوك؟

ولاً تهريجهم مجرد طريقة للاستمتاع الغير مقصود إنه يبقى على حسابك؟

لكن الأفضل للقلب إنك متاخدش الأمر بشكل شخصي.. وأنك لما تنشغل بمعاني الامتلاء الداخلي في أوقات شعورك ولو الافتراضي بالهجوم هيبتك..

ويخليك واثق في نفسك.. فتقدر تبقى ثابت.. وتقدر تتبسم في وش كل شيء
بيقلل منك..

الواحد لما يبقى واثق إنه قوي في نقطة معينة.. مش بيفرق معاه خالص مين
يقول إيه.. هو أصلاً مليون برؤية قوية عن نفسه..

لكن كل المشكلة بس في إنك تبقى فاضي.. وبتحلم بأي حد يملاك.. فتلاقي
الانتقاص بيهد أكثر جواك..

∞ ∞ ∞ ∞ ∞



ضحك.. وسكوت

في طريقتين بيرحوا كثير في التعامل مع الإشارة دي.. لأنها إشارة خطر..
عشان بتهد رؤيتك لذاتك لو مكنتش منتبه.. فمهم تعرف تدير نفسك من جُوه
زي ما اتفقنا.. وأنت قاعد معاهم تعرف تتعامل بشكل سلس..

يا أمّا هتضحك معاهم.. لأنك غيرت رؤيتك لمعنى الإهانة لمعنى إنه مش
مقصود.. فعادي سايرهم.. غالبًا ده بيكون أقوى رد عشان يثبت شكلك قدام
الناس.. إنك تبان مش مهزوز..

يا إما لو أنت حاسس إن ده مرفوض.. هتسكت.. وتتجاهلهم كأن محدش
بيتكلم.. لو وجهوا ليك كلام بشكل واضح.. قول لهم دماغى مشغولة بشيء
مش مركز معاكوا..

العلاقات القريبة أوي.. ممكن تتكلم معاهم بوضوح إن ده خط أحمر
بيضايقك.. لأن في ناس مش بتضايق.. هي اختلافات نفوس.. ناس حساسة
ممكن تتوجع.. وفي ناس عملية مبتشوفش الموضوع معبر عنها..

بس الحقيقة والواقع.. إن التريقة والسخرية لما تبقى على إنسان مهما كنتو
صحاب فده من آفات النفوس.. ومن الطرق السلبية جدًّا في التواصل..

تفهم إنه حقك إنك ترفضه وأن ده مالوش علاقة بثقتك في نفسك.. ليه علاقة
وبس بأنك محترم.. وبتحترم نفسك.. وأنتك مش بتسمح تبقى مجال لضحك
الآخرين.. مهما كانوا قريبين..

بلاش تتحرج توضح نفسك.. لأن لو اتعاملت مع الموقف زي ما شرحت
بالسكوت والمسايرة.. وأنت من جواك مش راضي.. مع الوقت هتحتقن..
وهتقلب بغضب شديد.. وممكن تنتهي معاك من جُوه بشعور باستياء شديد..
ورغبة في الانتقام!

∞ ∞ ∞ ∞ ∞



الاستغلال

وتسعد كثيرًا أن تكون دومًا في خدمتهم..

حتى يتبين لك كم كُنت واهمًا!

الطبيعي أننا كبشر نلجأ لبعض.. وندعم بعض.. وأكد اللي فينا بيحس بضعف
بيستنجد بأقرب دايرة له عشان تقويه..

اللي مش طبيعي أبدا.. إن يكون في حياتك نوعية من البشر.. مبتظهرش غير
لمصلحة!!

الأول بتشوف إنك بتدي ومش منتظر مقابل.. بتحس إن ربنا جعلك سبب إنك
تساعدهم.. وبعد فترة من الوقت تبدأ تحس باستغلال.. وعدم شعور بك
كإنسان إطلاقًا..

وللأسف شعورك بالإحراج إنك هتبدأ تحس بمشاعر سلبية وأنت بتساعدهم
بيكون قاتل..

وشعورك اللي بيحسسك بتأنيب الضمير إنك المفترض بتعاملهم في الله..
فتبدأ تنكر شعورك.. وتيجي على نفسك.. وأنتك مش فارق معاك رد فعلهم ما
دام بتتصرف بشكل يرضيك..

وللأسف بتتفاجئ إنك اتمليت تجاهم بنقمة رهيبة.. معدتش حتى مستحمل
تشوف اسمهم..

وتبدأ غصب عنك تكره تتعامل معاهم.. فتكره نفسك إنك فقدت عطاءك..

ودايرة جلد الذات تفضل تلف جواك.. وتفضل تكسر فيك.. وللأسف يفضل
الإنسان ده يقات على جلدك لذاتك من دون ما يشعر.. ويستغل فيك.. وأنت
مش واعي إنه مجرد إنسان متمحور حوالين احتياجاته وبس.. إنسان مقفول
على رؤيته هو عايز إيه وبس.. بي فكر في مصلحته.. بيوجد في حياتك بس
عشان ياخذ منك المصلحة ويختفي!!

oo oo oo oo



احتياج.. ولآ ابتزاز؟

أولا نفرّق بين الاحتياج لعطاءك.. وبين الابتزاز العاطفي!!

بص يا سيدي.. طبيعي جدّاً إنك تساعد غيرك.. ووقت ما يحتاجوك يلاقوك جنبهم.. وبالذات لو ده في استطاعتك.. وطبيعي بتعمل ده من غير وقوف على أي رد للي بتعمله.. لكن العلاقة ديه طول ما هي كده كويس أوي..

المشكلة بتبدأ لما يبدأ الإنسان اللي بيطلب مساعدة ده يقرب لك كصديق.. كده شكل العلاقة اختلف جواك تماما..

دايرة الأصدقاء بتتغذى منها على احتياجات معينة زي ما بتغذي أنت احتياجاتهم.. مش عطاء من ناحية واحدة.. فغصب عنك تلاقي الشخص ده أصبح عامل نفسه صديق.. وهو بيتغذى لوحده وبس!!

تلاقي وقت النكد عنده يظهر لك ويترمي عليك.. ووقت حزنك فص ملح وداب.. ولا حتى بيطمئن!!

تلاقيه مثلا يطلب يعرف كل خطواتك عشان يقلدها.. وأما يقلدها ميفرّحكش بالنتيجة.. ولا كأنه كان يبشركك في تعب الخطوات وبيزهقك تدعمه.. وتشوف فرحته.. أو نجاحه.. زيك زي الغريب كده.. ولا كأنك كنت بتخططها معاه!

تلاقيه بيعاملك بطريق معينة.. ولما تلقائك تعامله بنفس الطريقة.. يقف يستغرب أنت ازاي تعامله كده.. طب ما حضرتك اللي بدأت فأنا تخيلت إن العلاقة تسمح.. لا يقفش!!

عشان هو متعود إنك مالكش أي احتياج.. أنت بالنسبة له حنفية يبشرب منها لما بيحتاج ويقفلها وقت ما يحتاج.. ومينفعش تعمل حاجة عكس اللي بيطلبه..

يعني هو اللي محتاج لك.. وهو اللي بيملي عليك تتصرف ازاي.. هو اتعمى إنك بشر وليك حاجات بتحتاج تحسها مع أصحابك.. فتصبح علاقتك بيه مجهدة لأقصى درجة..

أصل أنت بني آدم.. وبتتوجع.. لأنك في علاقتك مع الصديق بيكون فيه عشم معين.. مش زي علاقتك بحد متعرفوش بتساعده!!

والأصعب إنه كل ما يظهر في حياتك يستنزفك نفسياً.. ويفضل يقتحم خصوصياتك.. ويطالبك تعمل له اللي محتاجه مهما كانت حالتك النفسية.. وعمرك ما هتلاقيه سالك أو اطمئن على حالك إلا مجاملة عابرة!!

متدخلش نفسك في علاقات مجهدة كده.. متخليش قيمة العطاء عندك تدخلك في دايرة ألم مع شخص مش عارف يحدد مكانه في حياتك.. هل أنت

بس دعم له ولا أنت صديق.. لأن كل دايرة ولها توقعاتها.. ومينفعش يبقى
بالاسم صديق.. وبالواقع شخص فقط بيستفيد منك..

∞ ∞ ∞ ∞ ∞



شيل العشم

لو في حياتك شخص بالشكل ده.. عشان متتوجعش.. شيل العشم تماما.. نزل توقعاتك تجاهه.. حطه أنت في دايرة إنك بس بتدعمه.. ولما يبدأ يخطي برة الدايرة ويقتحم دايرة الأصحاب بنفس الأسلوب اللي مليون ابتزاز عاطفي.. حط حدودك.. ومنتكسفش إنك تأدي دورك وبس.. عشان متفقدش قيمة العطاء تجاهه..

يبقى الحل إنك متخليهوش يغير شكل العلاقة لأصحاب مهما حاول.. لأن خلاص بخبرتك هو مش بيعاملك كصديق..

هو ممكن ميكونش إنسان وحش.. بس هو إنسان متعلمش يدي زي ما بياخد.. أو هو معاك أنت كده.. اتعود إنك أنت اللي بتسند.. مُرّقه عاطفيا معاك.. اتعود يكلمك بس لما يحتاجك ويسميها مسميات لطيفة تخليه ميتأرّمش..

الشخصيات ديه حلها الوضوح والحدود اللي تريحك أنت.. لأنه في الواقع مش فارق معاه.. بيتصرف زي ما بيحس ويحتاج وبس.. على قد ما هيعرف ياخذ منك ويستفيد من وراك حياخد.. ولا عمره هينتبه أنت بتفكر في إيه..

فحط حدودك.. متتعشمش أوي من ورا علاقتكم.. انسى إنه صديق.. واعرف إنك بس بتساعده لله.. ومفيش بينكم علاقة أكثر من كده.. وخلي عطاءك في حدود استطاعتك.. عشان متنفجرش..

∞ ∞ ∞ ∞ ∞



قول لأ..

الأمر الأول افهم إنه من حَقِّك تقول لأ في أي وقت.. مش بس لما متقدرش..
«فاتقوا الله ما استطعتم».. «لا يكلف الله نفسًا إلا وسعها» معاني تبقى في
بالك في تعاملاتك..

لما تبقى علاقة مش بتديك.. يبقى تبقى مليون أوي من جواك.. وبتاخذ من
علاقات تانية.. عشان تقدر تدي فيها من غير ما تتوجع وتحس بمشاعر سلبية..
دي طبيعتك كإنسان احترمها..

فلما تحس بضغوط شديدة.. والشخص ده أنت بتحبه بس بيتعامل بالشكل
السطحي ده.. فغصب عنك هتتوجع وتتملي بزعل لو جيت على نفسك..
عشان مش هتلاقي امتنان ولا تقدير يقابل تعبك.. وأنت مش مليون كفاية
عشان تدي عطاء من غير مقابل.. بييجي علينا لحظات ضعف كده وبنحتاج
زي ما بندي.. ده طبيعي..

فدايما ركز إن العطاء يبقى بشكل متوازن مع إدارتك لنفسك.. يطلع من
مكانه صح.. عشان ميحصلش استنزاف من جواك من غير ما تشعر..

الأمر الثاني أنت معاك رخصة في الشرع إن لو حد جه يزورك في وقت مش
مناسبك.. من غير تبرير.. ولا تقييم ليه مش مناسبك.. «وإذا قيل لكم ارجعوا
فارجعوا».. إنك ترفض يفتح بابك!

غير بقى المعاني والموروثات لقيم وأخلاق مش معبرة عن العلاقات بشكل
صح.. حَقِّك في التعامل مع الآخر إنه يستأذنك قبل ما يطلب يدخل بيتك.. قبل
ما يدخل حياتك ونفسيته.. حَقِّك في أوقات تعتذر.. لأن الوقت مش مناسب..

∞ ∞ ∞ ∞ ∞



دايرة الدعم

ولو هو إنسان مش مركز إن تصرفه ده بيحمل عليك.. غالبًا هتلاقيه متقبل إنك رفضت تساعد في أوقات.. لأنه أصلًا شايف إن ده طبيعي.. يطلب منك توافق أو ترفض..

فتكتشف نوع جديد من التعامل بينكم مبني على احترام استطاعتكم لبعض.. ودي دايرة مش وحشة في العلاقات.. دايرة معارف.. دايرة وقوف جنب بعض.. دايرة سند..

لما تتعامل إنهم في الدايرة دي.. هتحس براحة نفسية.. مش هتخسرهم أبدًا.. ولا هتديهم معاني هما مش فيها..

موصولش لمرحلة العلاقة القريبة بالشكل إلى تصورته.. فوجعك فهمك تشوفهم بأي شكل.. هو مش استغلال.. قد ما هو مجرد تبادل منافع..

∞ ∞ ∞ ∞ ∞



الإهمال

فما يفيدك أن تستشعر دفئا وسعادة ثم تُدميك جراح الفراق!
وما يفيدك أن تبكي وتتألم أمام أعينهم.. فلا يشعرون!
بل يزيدون ألمك آلاما من شدة الإهمال..

عارفين في نهايات المشاهد الدرامية لانفصال اثنين..
تلاقي شخص يحاول يخلع من اللي يبجبه صديق أو حبيب.. فيبدأ يتصرف
بشكل مش مفهوم.. بشكل مخليه يبتقطع.. يفكر ويسأل نفسه مليون
سؤال..

يا ترى خلاص ولا بس مشغول؟ ويفضل هو راكنه معاه.. وليه يقفل الباب لما
يسيبه موارد..

يفضل تعبان.. قلقان.. خايف..

حوّله بقى مفعول به.. بقى رد فعل.. حوّله بقى من غير كرامة.. وبقت حتى
الإهانة يبشوف له عذر فيها..

وتعرف إنك شلت فوق طاقتك لما توصل للحظة تقرر فيها إنك تبطل
معارفة.. خلاص تعبت..

لحظة بتحس إنك تعبت من كتر الوجع..

تعبت من كتر قلة الاهتمام..

تعبت من كتر التوقعات اللي بتنزل بيك على الأرض تكسر قلبك..

تعبت من خيبات أمل مرة ورا الثانية لغاية ما سحبت كل طاقتك وتحفيزك
إنك حتى تتنفس..

لحظة يأس لضباية الرؤية.. لوقوفك في منطقة رمادي مش عارف تخرج
منها من كتر اللغم.. فترغمك تقف مسجون جواها.. خايف.. بتترعش من عدم
رؤية مخرج.. وفي نفس الوقت عارف إن فزعك جواها أمان من إنك تخطي
لغم براها يفرقع في وشك..

خلاص تعبت.. كفاية.. مش قادر.. وليه أعمل؟ وهل فارقة؟ وهل وجودي
مهم؟

وقلبك بيقول لك بوضوح هي مش فارقة.. لو خدت بعضك ومشيت زي لو
استنيت.. قاعد ليه.. هتفضل مستني لإمتى إشارة باهتمام.. إشارة بتقولك

خليك.. متمشيش..

وأنت عايش وهمك وحدك.. لو مشيت زي لو ممشتش..

∞ ∞ ∞ ∞ ∞



كفاية كده؟

هتفضل بتفكر في نفس المعاني لإمتى؟ افهم إن المعاني دي بتوجعك عشان توجّهك.. توجهك للملاذ الخير ليك.. تنقذك من الرمادي.. تنقذك من اللغم.. تنتشلك من حطام تفكيرك..

متى ستكتفي من هذا الألم المُتجدد؟

الألم بيقولك فعلاً كفاية لغاية كده.. سلم رايات.. اللي عايزك هيحتفظ بيك.. اللي بيحبك مش محتاجك تعافر عشان يتواجد.. ما دام عملت اللي عليك.. سيها لتديبر ربنا.. متفضلش تقلق نفسك.. طمنها إنك عملت اللي في إيدك.. والباقي بتديبر الله وحده.. سلم أمرك له..

متتعيش نفسك عشان تفضل موجود في حياة إنسان.. لو العلاقة فعلاً مهمة عندهم زي ما هي عندك صدقني هتلاقي عندهم نفس الأولوية للوجود.. نفس الاحتياج لمشاركتك حياتهم..

من الآخر الإقبال على الإنسان بيوضح مدى الاهتمام.. الإصرار.. تفرغ الوقت.. كل دي أمور لما تبقى رايحة جاية في العلاقة بتحدد إن الدائرة اللي بينكم قوية ومريحة ليكم سوا..

نزلهم درجة جواك.. خفف توقعاتك من علاقتكم.. ابدأ كوّن علاقات جديدة عشان الحياة بتستمر مبتوقفش على احتياجك لإنسان أبدا.. اتعلم تعيش في وسط الناس وأنت وجودك مطلوب.. مش إنك تفضل مقضي وقتك كله مستنزف في إنك بس تبقى في حياتهم..

ريّج نفسك في علاقة رايح جاي.. ولو أنت مصمم تدي.. يبقى ادي من غير مقابل.. وانسى خالص إن دي دايرة بيجيلك منها الحب.. خلي الدائرة اللي بتسمح ليها أنها تديك احتياج دايرة بتقبل عليك.. مش سايباك بتحفر في الصخر عشان تلاقي نفسك معاهم..

إصرارك إنك تاخذ منهم الحب هيمرض لك قلبك.. اتعلم تاخذ احتياج علاقتك من المتاح واللي بيودك فعلاً..

∞ ∞ ∞ ∞ ∞



توقعاتك بتخيب؟

وتعبك معاهم علامة على إنه تخفف التوقعات.. مرونتك في إنك تفضل تغير توقعاتك وتحدهم في دواير جواك.. ده اللي بيخلي حياتك أسهل..

فعشان توقعاتك على طول بتخيب يبقى دي علامة إنك محتاج تغربلهم في الدواير.. وتبقى مرن إنك تخلق دواير جديدة في كل مرحلة.. سيدنا عمر يقول: «ما أعطي عبد بعد الإسلام خيرًا من أخ صالح، فإذا رأى أحدكم ودًا من أخيه، فليتمسك به».

واللي متلاقيش منه زي ودك له.. متزعلش منه الحياة.. بتغيرنا كلنا.. بس خف احتياجك خالص منهم.. بحيث إنك متتوجعش.. ومتقلقش عليهم.. وفي نفس الوقت تفضل العلاقة مستمرة بس بشكل مختلف يناسب المرحلة..

وبعدين في وسط كل دوشة الوجة ديه.. ممكن يبدأ يعلي تصرفات الوجة.. الركنة.. التطنيش.. التجاهل..

كله فجأة يوضّح بتصرف واحد أخير صغير، فيخلّيك تفوق من كُتر الانتظار ويورّيك الطريق..

وعلى قد ما ممكن قلبك يوجعك.. بس آخر موقف خلاص بيظهر لك قدرك عنده.. لأن وضّح خلاص عدم الاهتمام.. وساعتها بس بتحس بتحرر..

أخيرًا جاب على كل أسئلتك.. أخيرا ركنته وتجاهله بقى شيء واضح..

قطع الشك باليقين.. فسهل عليك الخلاص..

وبعد لحظة التحرر.. بتكون كأنك خلصت مرحلة التعافي وقت حيل التجاهل..

فبتكون جاهز خلاص.. لقلب الصفحة.. من غير عودة.. انتهى جواك كل شيء..

خلاص من سجن حبهم اتحررت!!

فلما تفضل في علاقة بتتعب وتحاول.. وتحس إنه مجهودك كله لوحدك.. يبقى ده وقت إنك تفهم إنك حاططهم في مكانة عندك أعلى من المكانة اللي حاطينك فيها..

كل مرحلة بتسلم للتانية.. مش كل العلاقات بتفضل في نفس الدائرة طول الوقت.. فمتفضلش محبوس في زمن فات!



الانتقام

ولا يؤذي الثأر سوى صاحبه..
يزيد جروحه نزيفا دون التثام!
الشخص الكتوم.. اللي بيضايق وميينطقش.. ولا يتكلمش!
اللي كل إشارة خطر بيحس بتهديد جواه.. وبيضايق.. ومبييينش..
بييني وجع على وجع.. بيحس باضطهاد.. بيحس بألم..
ممكن موجوع عشان العلاقة اتغيرت من الزحلقة للحظات التعود.. فحس إنه
مبقاش كفاية ليهم..
ممكن كتر غموضهم حسسه بعدم أهميته.. حسسه بعدم اهتمامهم للبقاء..
اتخفق من كتر ما الناس بتديه فيتحمل جمایل مش قدها.. بتحسسه إنه أقل
منهم..
ممكن غيران عليهم عشان مش واخذ مكانته عندهم.. وممكن مخنوق من
غيرة شديدة عليه..
كان ضحية سوء الظن المستمر اللي خلته شايف نفسه في أوحش صورة
ليه..
عانى في فترات من الخصام الغير مبرر.. من التريقة والتسفيه..
مبيظهروش إلا لما يبقوا محتاجين منه حاجة.. غير كده بيهملوك.. ويبعدوا..
كل دي معاني سلبية⁽⁶⁾ لو بتتبني جواك بسبب تصرفاتهم.. بتهز صورتك عن
نفسك.. بتكسر شعورك بالقيمة.. بتكسر شعورك بأهميتك..
وسماحك للشعور بالحرمان من كل معنى يملاك بسببهم.. بيدمر امتلاءك من
جوه.. لأنك بقيت محجوب عن ذاتك.. بتشوفها بس في شكل ردود أفعالهم..
مبقتش شايف نفسك.. فتاهت منك..
وعشان أنت محتاج تشوف نفسك صح.. بقى كل اهتمامك على البحث عن
الفاعل.. هما السبب في كل وجعك ده.. حرموك من مكانتك.. حرموك إنك
تشوف نفسك صح..
غضبك كله موجه ليهم.. وده طبعا بيتبني على فترات.. فترات من تعشيش
المعاني دي كلها جواك..

شوية بشوية تبدأ تحس باستياء.. تطيق العمى ولا تطيقهم!!
بقيت من جواك محتقن منهم.. ومش بتتكلم.. وبتحاول تتعامل بناء على
أخلاقك وقيمك بشكل صح.. فبقى اللي جواك غير اللي براك..
قلبك له سعة للتحمل.. إن لم تحميه ضاق عن كل معاني التفهم والاستيعاب.
كم الآفات اللي بتتبني جوه القلب بسبب تصرفات الغير اللي متعملهاش
إدارة.. متخيل إنك كمان ممكن تبقى حاسس بالنفاق.. لأنك جاي على نفسك
وتتعامل صح.. وإحساسك كله من جوه تجاهم مخروب بكراهية واستياء..
كل ما الوقت يفوت.. استياءك بيخليك تشوف بعين الضحية قد إيه بيسيؤوا
ليك.. كأن الاستياء اللي اتبنى جواك مش مكفيه الأسباب القديمة عشان
يتكون.. وماشي يجمع في أدلة ليك.. فبدأ يبقى سحابة بتغيم على حياتك..
وبتمنعك تشوف أي شيء بعين صحيحة!

∞ ∞ ∞ ∞ ∞



التشفي

وبعدين تتفاجأ بعد فترة بشيء غريب..

لما بيحصلهم حاجة وحشة.. بتفرح من جواك بشكل مريب!

أنت بتستغرب نفسك.. لأن عقلك يقولك ده وقت مساندة الصديق.. ده وقت المواساة.. وأنت من جواك شايف إنهم أخذوا حقهم.. يمكن يحسوا بإحساسك..

الغضب اللي تحول لاستياء.. بقى اللي بيرحبه إنه يتصرف بشكل سلبي.. وهو «التشفي» والشعور بالعقاب اللي يستاهلوه من وجهة نظر قلبك الممتلئ بكل وجع..

ومش بس هتقف هنا.. مع الوقت.. هتلاقي جواك رغبة شديدة بالانتقام.. مش بس بتفرح فيهم لما يتوجعوا.. أنت دلوقت عايز تدوّقهم من نفس الكاس.. بس بإيدك!

كل ده الصورة المعنوية لقوة الغضب.. «المتوهمة».

∞ ∞ ∞ ∞ ∞



الغضب المَرَضِي

الغضب يتصرف لأنه يبأذي الجسم.. بيخرج جواك كم من هرمونات تصيبك باختلال في وظائف جسمك.. فلما ميتصرفش بشكل سليم.. بيخرج على شكل عصبية.. زعيق..

كأنك بتنفس البخار اللي جوا..

وفي ناس مالهاش في الطرق العدوانية.. فالغضب بيتكون وفي نفس الوقت مينفعش الجسم يحتفظ بوجوده عشان تقدر تعيش..

فما دام أنت باختيارك مغيرتش المعنى لمعنى مريح يخليك تطمئه فيتحرر.. عقلك بيحميك بأنه ياخذ لك حقل.. لكن للأسف بيتربى جواك فيروسات في أفكارك تؤذي قلبك.. وتخليه مختلف عن اللي ظاهر عليك براك..

أنت تتيقن إن ربنا خلقك عشان تعيش في الحياة تحقق قدراتك.. وتحمي ذاتك.. ربنا أكرمك بذات نفخ فيها من روحه.. وشرفك قبل ما تتولد بسجود الملائكة ليك رغم كل عيوبك وأخطاءك.. فده من ضمن واجباتك إنك تحميها..

وعقلك متصمم إنه يحميها.. بس الحيل الدفاعية اللي بيستعملها هي المحفوظة في العقل الباطن.. يا هجوم.. يا هروب.. يا تتجمدا!

والثلاثة دول مناسبين أوي وقت الخطر الحقيقي.. وقت التهديد لحياتك فعلاً.

لكن لما ده يتعمل عشان يحمي ذاتك.. بناء على منظومة أفكارك أنت.. هتبقى معرّض إنك تأذي إنسان ثاني وتظلم عشان مش متحكم في إدراكك!

عشان كده مهم جدًّا نشوف نفسنا بشكل صح لما نحس بتهديد نفسي من أي شكل من اللي ذكرناه.. وهنفضل نحس بتهديد نفسي.. لأن ده الطبيعي.. ده اللي بيقوينا من جوا.. أننا نتهدد ونعرف نتعامل مع التهديد، ونديّه معنى يقوينا ويخلينا نعدي التحدي.. بقوة.. فنبني ونستثمر في نفسنا..

∞ ∞ ∞ ∞ ∞



مهمتنا ذواتنا

تضييع الجهود في الانتباه للآخر.. واللف في معاني تصرفاتهم.. يضيعنا من ذواتنا.. وبحسنا بشتات..

إحنا انصرفنا عن مهمتنا الحقيقية في إدارة ذواتنا.. وبقينا بنلف في تصرفات الناس اللي مش بإيدنا غيرها.. لكن بإيدنا غير طريقة تفكيرنا فيها.. وأهم شيء بنبدأ نغيره هو إن تصرفاتهم معبرة عن شخصيتهم.. مش معبرة عنا أبداً..

إحنا اللي بنسمح بالتجاوز.. إحنا اللي بنسمح بتعدّي الحدود.. لما نبقى مش مدركين محتاجين إيه.. ولا إيه الخطوط الحمراء.. لما نبقى مش بندي نفسنا حق التبحر في نفوسنا زي ما مشغولين بالناس.. طبيعي جداً لما ندخل في علاقات.. نحس باستباحة.. لأننا استبحنا نفسنا الأول..

العلاقات مش هتفضل تدينا من غير ما نديها.. لما بنبي نفسنا فنشوفها صح ونستثمر فيها.. ونحمي حدودنا من كل تعدي ومن كل خط أحمر.. ساعتها بس هنقدر ندير علاقتنا بقوة.. فبقى «فاعل» فيها مش «مفعول به».. إحنا اللي بنختار إطارها وشكلها.. في إيدنا نغير طريقة تفكيرنا، فقرارتنا تبقى واعية وصحية لينا وليهم..

نتعلم نستثمر في علاقاتنا.. عشان هو ده بس اللي بيقويها ويحميها من الذبول..

∞ ∞ ∞ ∞ ∞



الباب الثاني العلاقة الأهم

وإن لم تر نفسك بعين راضية..

فكيف تتصور أن غيرك عنك سيكون أراضى؟!

أغلب الناس مش بتفكر أوي في مسألة هما شايفين نفسهم ازاي..

معظمنا بيتحرك في الحياة من غير ما يركز مع نفسه.. هو ماشي بفكرة «أعيش».. و«أحقق إنجاز» في علاقاتي وفي هدفي أو شغلي.. وبس كده..

مش مستوعب خيوط أفكاره بتساعده ولا بتعطله؟

مش بيركز مع مشاعره.. ممكن يبتجها.. أو يلهي نفسه عنها.. أو يدبها مساحة أكبر فتقلب دراما..

بالتالي عشان مش شايف نفسه كويس.. بيحمل علاقاته معاني أكبر مما تستوعبها.. معاني المفروض يستمدها من نفسه.. فييضطر يستمد احتياجاته بس من براه.. فيبقى عرضة لأي انتهاك نفسي واستغلال ولو بشكل لا واعي من الطرف الآخر..

فيبدأ يدخل في دوامة ووجع مالهاش آخر.. لما بيحس إنه زي العروسة الماريونيت.. ومش عارف يخرج من الدوامة ويعوم لبر الأمان..

تخيل معايا كده إن كل علاقة أنت قادر كويس أوي على إدارتها.. إنك تعرف ازاي تقرأ العلامات والإشارات اللي معناها إن العلاقة دي أصبحت تحمل تهديد نفسي ليك.. وبالتالي بتنذر بهلاكك..

الموضوع بيدأ من جواك أنت.. عشان تقدر تتعامل مع الحياة لازم تكون مثبت أوي نظرتك لنفسك.. تبقى واعي جدًا أنت محتاج إيه.. أنت ناقصك إيه؟

إيه مصدر وجعك؟ إيه نقاط قوتك؟

ولما تدرك مداخل نفسك.. تعرف كويس أوي تقدرها.. وتمنن ذاتك.. فتثبت نفسيًا ومفيش خبطات تهزك ولا تأثر فيك.. وأنت تبقى فاهم إن الحياة هتفضل تخبط في شعورك بقيمتك، فعلى الرغم من ثبوتها كتير بتتهز، ولما تتهز بتأثر سلبا على كل قراراتك وإدارة علاقاتك.

عشان كده قبل ما تفكر في العلاقة مع الناس.. فكر في تصحيح علاقتك مع نفسك الأول.. تعرف تقدر قيمتك.. تعرف تصالح الأصوات اللي بتخلق جواك بسبب الأذى اللي اتعرضت له.. وثق جدًا في قدراتك..

الأصوات دي كلها بتعبّر لك عن جروح حسيت بيها ولسه لم تتعاف منها.. فبدأت تبقى أفكار ثابتة عن رؤيتك لنفسك.. المشكلة أنها بتهدد قدرتك على تكوين أي علاقة ناجحة مع الناس.. وممكن تخليك تؤذي الآخرين وترهقهم؛

لأن صورتك عن نفسك مش ثابتة بشكل تخليك تتوازن.. فتبقى معتمد أكثر عليهم يمدوك باحتياجاتك النفسية.. بتبقى معتمد أكثر إنك تحس بنفسك «على حسابهم».

كثير منا بيمر بالحالات دي بعد تجربة مؤلمة تهز رؤيته لنفسه.. وكثير اعتمد الحالة الوجدانية وبقي يشوف نفسه بس من خلالها.. فبقى صعب عليه يستقبل العلاقات بشكل يسعده.. هو مُرهق وبيرهق اللي قدامه.. عشان بس نظرته اتشوشرت ومنتبهش يعدلها..

لما تقرأ كل حالة شعورية.. حدد هل هي بسبب موقف حقيقي ولا هي أصوات في عقلك أنت؟

في كلتا الحالتين أنت محتاج تدير الحالة وتتعلم تخرج منها بشكل صحي.. لأنها بتأثر على رؤيتك لنفسك..

لو فقدت نفسك عشان صدقت صوت الوجد وتلبسك شعور إن ده حقيقتك.. هتلاقي علاقاتك مرهقة بتستنزفك وتستنزف الآخر..

فلما نصلح رؤيتنا لنفسنا نبقى بنينا الأساس مع بعض اللي منه هنقدر نبدأ نكمل إدارة العلاقات.. أساسنا بينطلق من رؤيتنا لنفسنا.. عارفين قيمتنا.. وواثقين في قدراتنا.. قبل ما نبدأ ندير العلاقة مع الطرف الآخر أنا محتاج أعرف إن سلامي الداخلي في العلاقات معتمد مش بس على الرؤية لنفسي السليمة.. لأ.. ده معتمد كمان على أي عندي المفاهيم الصح اللي تساعدني أني أبدأ كمان أستثمر في العلاقة..

∞ ∞ ∞ ∞ ∞



«مستحقش»

بداخلك أنت فقط يقع كل استثناء..
كل ما أنت عليه يجعل لك «بصمة منفردة» ليس لها مثيل..
تفضل المعركة هي تثبيت نفسك مهما كان الصوت السلبي عالي (من جواك أو براك).. بأنك متستحقش!
والأصوات اللي جواك عاملة زي الإعصار بيدخل على روحك يهدها..
كل عاصفة بتمر عليك.. مختلفة عن الثانية..
في عاصفة بتقدر عليها.. وفي عاصفة بتهز رسوخك..
ولما تعيش من غير ثبوت داخلي.. تبقى مُعرض دوما للاهتزاز!
كل ما مرت بقلبك عاصفة تبعثر دواخلك.. تثبيت ذاتك يقيك شر الاقتلاع..
تخيل لما يبقى الشيء الوحيد اللي هو حقيقة ثابتة عند عموم البشر.. عندك أنت.. يبقى مهزوز!
اللي هو أنت محتاج حد يقنعك إنك موجود.. إنك متشاف.. إنك مفهوم.. هو ده بالظبط معنى اهتزاز قيمتك جُوه الروح..
محتاج حد يثبتك على الأرض عشان أنت على طول حاسس بانفصال عن الواقع..
حاسس إنك مش عارف أنت مين.. ولا ليه موجود..
بتحاول تدور أنت بتحب إيه وبتكره إيه.. وللأسف مش بتلاقي جواك غير فراغ.. مفيش حاجة بتملاك.. ولا حاجة بتعجبك.. ولو حاجة عملتها بتبقى بتعملها عشان بس تخلص اللي وراك أو اللي مطلوب منك..
كل شوية بتاخذ شكل اتقال لك تبقى عليه.. بتحس إنك بتجسد صفات شخصيات مخترتهاش.. بس مش قادر تحدد ده أنت فعلاً ولا مجرد اختياراتهم ليك!!
تبحث عن السند.. عن الدعم.. ولكن خوفك يمنعك أن تُحدثهم بما يستنزف دواخلك.
بتحاول تبقى وسط الناس.. تبقى شبههم.. وغصب عنك مع الوقت بتحس بشتات.. بتحس إنك متبعثر مش عارف تلملم أجزاءك.. روحك بقت شاربة

من كل حد شوية.. بس الحقيقة الوحيدة اللي أنت مدركها.. أنت بتنسى ساعات تحس بقيمة لنفسك!

إنسان عايش.. مش مُدرك لهويته.. فاقد لكيونته.. بيبقى للأسف عُرضة لأوجاع كثيرة.. كأنه بيستقبل كل حاجة عليه.. كل كلمة بتعلم جواه.. كل نقد.. كل إهانة.. كل سوء تعامل..

كل عنف بياكل من روحك حته.. وبيخليك حاسس بضعف شديد وفزع من الحياة..

ولما بتحس إنك ملكش قيمة.. وجودك وسط الناس بيبقى عُربة.. بتبقى مش عارف تتواصل.. مش عارف تقرب أوي عشان بتتوجع.. ومش عارف تبعد عشان بتحتاج للناس عشان تشوف نفسك.. فبتبقى متعلق في النص بين طريقين مش بيرحوك..

لما تدخل في علاقة مع أي طرف وأنت مش حاسس بقيمتك.. أو بقيمة مهزوزة بسبب وجع لم تتعاف منه.. حاجة من الاتنين بتحصل.. يا إما بتحاول ترضيه بكل طريقة عشان تلاقي نفسك في عينيه الراضية.. وبتبقى متسيطر عليك تمامًا وتحت رحمة إنسان تاني.. فلما بتفقد بتفقد نفسك..

يا إما بتستنزف الطرف الآخر لو هو اللي بيديك.. عارف الشنطة لما تكون مثقوبة وتحاول تملأها بيحصل إيه؟ كل حاجة بتقع منها.. مبتتمليش أبدا..

روحك بتبقى كده بالظبط.. بتاخذ ومش قادر تحس.. أنت مثقوب من جواك!

عشان كده العلاقة الصحية مبنية على إن كل طرف بيبقى مُدرك كويس أوي إن قيمته ثابتة.. وبيتحرك من المُنطلق ده.. جزء كبير جدًا بيعتمد علينا وعلى إدارتنا لنفسنا.. أننا نفكر نفسنا بقيمتنا.. وعشان نعرف نعمل كده الأول نفهم يعني إيه قيمة ذاتية.. بتهز ليه؟ وازاي نقدر نثبتها تاني..

يعني إيه قيمتي ثابتة؟

تخيل معايا كده لو جبت لك ورقة بمية جنيه.. وسألتك دي قيمتها إيه؟ هتقول لي ١٠٠ جنيه.. طيب لو كرمشتها لك شوية ورمتها على الأرض.. دي قيمتها إيه؟ هتلاقي برضه إن قيمتها ما زال مية جنيه.. مهما اتكرمشت.. مهما كان مكانها.. هي أصلاً قيمتها ثابتة فيها!!

قيمتك الذاتية مُعبّرة عنك.. عن وجودك.. عن كونك إنسان.

قبل ما تتولد.. لما ربنا سبحانه وتعالى خلق سيدنا آدم.. شوف كام حاجة حصلت..

٣. ربنا نفخ فيك من روحه سبحانه.

٤. الملائكة سجدت لك.

٥. أَعْبَدَ عُباد ربنا سبحانه وتعالى غار بسبب قيمتك العالية أوي.. رفض أمر ربنا إنه يسجد لك.. فاتلعن من رحمة ربنا وانتقل من أعبد العباد للشيطان رجيم مبعود عن الله.

٦. ربنا خلق الجنة والأرض بس عشانك.. سخر لك فيها كل حاجة عشان تقدر تعيش فيها.. مهدها لك عشان تبقى مكان مناسب لغاية ما ترجع تاني لمُستقر في الجنة.

كل ده عشان أنت «خليفة» الله في الأرض.. أنت إنسان ليك قيمة بغض النظر عن أي تصرف ليك.. شوف كده الملائكة بتقول لربنا سبحانه وتعالى إيه لما قال لها إنه خلقك:

اللي هو هتبقى خليفة الله في الأرض، رغم إنك ممكن تغلط.. لأ وتفسد في الأرض كمان.. فكان رد ربنا سبحانه وتعالى إنه جعل الملائكة اللي بتعبده سبحانه ليل نهار.. يسجدوا لك!!

وزادك بأن وضع فيك من علمه سبحانه دون أن تطلب.. أو تسأل..

يعني أنت من غير ما تعمل أي شيء كل ده جواك.. نفخة من روح ربنا سبحانه.. ملائكة سجدت ليك.. علمك من علمه عز وجل.. علم حتى الملائكة متعرفوش.. كل دي قيمتك من غير ما تتصرف ولا تنجز في الحياة حتى!

وكمان مش هتنزل الأرض مرة واحدة.. أنت تتشحن بقيمتك وتعرف إنك مُستحق للحياة بكل ما فيها.. خليفة الله في الأرض بيفضل عايش ٩ شهور في بيئة آمنة جدًّا.. تاخذ كل احتياجاتك وأنت مريح يعني.. بتاكل وتشرب وتنام وتحس بأمان ودفء وحب لمدة ٩ شهور.. عشان تبقى جاهز لمعركتك على الأرض..

قيمتك هي كل ما أنت عليه.. من ميزات وعيوب..

تخيل نفسك قاعد لا شُغلة ولا مَشغلة.. وعمّالين يحطوا لك كل ما لذ وطاب من الأكل والشرب من غير أي اشتراط عليك إنك تتصرف أي تصرف.. هتحس بآيه؟ هتحس بقيمتك عالية أوي.. هتحس بنفسك من الآخر..

وهي دي القيمة الذاتية إن الإنسان يحس أوي بنفسه.. يعتز بيها.. يحس بـ«استحقاقها»!

عشان كده بنلاقي الطفل لما يتولد.. أول سنتين من عمره حاسس باستحقاقه لطلباته.. بيصرخ بأعلى صوت.. مش بيكتم إحساسه عشان مكسوف مثلا.. لاده بياخد كل احتياجاته بالعافية وثقة..

وبعدين يبدأ يمشي.. فتلاقيه بيكتشف كل حاجة كأنها ملكه.. تلاقيه بيتحرك براحة وأمان ولا في أي شيء على باله..

وهو ده الإنسان.. لما بيحس بذاته.. بيظمن.. ويبثق في قدراته إنه يقدر..

ذاته هي البيئة الآمنة له.. اللي منها ينطلق للحياة زي الطفل الصغير يكتشفها.. ويحس بيها..

ولما بيدخل جُوه نفسه يقدر يحس براحة مرة تانية.. عشان بيرجع يفكر هو مين.. إنسان يستحق احتياجاته!

قيمتك الذاتية هي محيط أمانك التي منها تنطلق للحياة بثقة القادر والمستطيع على فعل أي شيء.

القيمة بتتهز إمتى؟

المُفترض إن الطفل مولود بقيمة ثابتة.. وإن القيمة الثابتة دي هي اللي بتثبته أوي في الأرض.. وبتديه الأمان المطلوب عشان ينطلق في الحياة.. ويلاقي نفسه بقى باحتكاكه مع المجتمع والناس..

دور الرعاية المقدمة ليه من اللي حواليه.. إنهم بيدؤوا يعلموه قواعد الحياة.. وإيه اللي ينفع واللي مينفعش..

بيدؤوا يساعده بين اكتشافه لذاته والحدود اللي تخليه هو والناس آمنين.. وأهم حاجة إن ده بيتعمل من غير ما ينتقصوا من قيمته أبدًا.. بيتم تأكيد إنه طلباته تُحترم ويتعلم ازاي يقدر يتوازن بين طلباته وبين اللي ينفع.. من غير ما يتخط في قوالب من انتقاص أو شعور بالكسوف من الذات إنه بيطلب!

الفكرة كلها إن القيمة الذاتية رغم أنها فينا وجزء منا.. فهي أكثر جزء حساس بيحتاج حماية.. لو الإنسان منا متعلمش يحمي ذاته ويثبت قيمته من أي مشاعر سلبية أو هجوم شخصي عليه.. بتبدأ تتهز..

والطفل الصغير طبعاً بيستمد ثبات قيمته من رؤية أهله ليه.. ومن رؤية الناس.. فلو لم يتم تعديل مفاهيمه أول بأول بيحصل له نوع من أنواع الانفصال عن قيمته.. ويبدأ يبقى مش شايفها.. عشان محدش شافها ولا حد سلط عليها الضوء بشكل يخليه يتسق معاها..

القيمة جُوه ذاتنا.. هي مش محتاجة غير أننا نشيل من عليها تراب التجاهل لوجودها الغير مقصود طبعاً.. ونسلط عليها الضوء شوية.. نبدأ نستشعرها.. فتبدأ تظهر جوانا من ثاني.. وتفكرنا بوجودنا القيم.. رغم كل شيء..

أنت حتى لو قاعد في الصحراء.. ومحدث يعرفك.. والناس معدية من جنبك.. هيدوك أكل وشرب لو معاهم.. ليه عشان أنت إنسان!

وإن كان كل تعريفك في الحياة وجودك بغرفة مظلمة لا تتحرك فيها.. تظل مُستحقاً لاحتياجاتك وإن لم تنطق.. أنت إنسان.. تستحق الحياة.

لو أنت قاعد في أوضة ضلمة مبتكلمش ولا بتتحرك.. برضه ليك على الناس فرضية استحقاقك لمتطلباتك في الحياة..

تخيل لو إنسان مشلول تماماً.. الناس بتعمل إيه؟ يفضلوا برضه يخدموه ويدوه احتياجاته.. هو كده إحنا لينا قيمة حسينا بيها أو لا..

أنت ليك قيمة حتى لو مش حاسس بيها.. هي بس عاملة كأنها في أوضة ضلمة جواك.. فاللي منعك تشوفها مش أنها مش موجودة.. إن بس الدنيا ضلمة أوي.. وأنت بس محتاج تفتح النور.. فتلاقيها..

عايزك تتخيل معايا مكتبة مليانة كتب في أوضة كبيرة.. بعض الكتب مميزة جداً.. البعض نسخ نادرة كمان.. وفي حبة كتب جار عليهم الزمن متقطعين شوية.. وحبة متربين.. كل ده موجود في المكتبة..

المكتبة ثابتة في مكانها.. لما الناس بتروح «تستعمل» منها كتاب.. بتشوفها وبتشوف الكتاب.. لكن لو مشغولين عن المكتبة هل ده هينكر وجودها؟ هل وجود كتب فيها متأكلة ولا متربة.. ينفي وجود كتب تانية مميزة جداً وكمان نادرة؟

هي المكتبة عبارة عن كل ده مع بعض.. وكل اللي علينا حاجتين.. نُدرك ونتيقن بوجود المكتبة فنقدر نركز عليها والحاجة التانية نبدأ بقى نمد أيدينا نستعمل الكتب اللي فيها.. أو نصلح الكتب اللي متقطعة على قدر الاستطاعة..

كل ما هتستعمل الكتب من المكتبة.. كل ما هتعرف تنجز أكثر وتتحرك باللي اتملى جواها من معلومات..

بداخلك تلك المكتبة القيمة تحتوي على كتب نادرة وأخرى مستهلكة..

وحين تنير الضوء تستطيع رؤيتها جيداً فتستعمل ما يفيدها.. وليس عليك سوى حسن إضاءتها..

دون الإسراف في إنارتها.. فتفسد من كثرة الاهتمام والتفضيل!
تخيل بقى نفسك أنت المكتبة دي بالظبط.. جواك مميزات وعيوب زي الكتب
بالظبط اللي في المكتبة.. كل ما عينك هتشوف المميزات هتقدر تستعملها
في الحياة.. وكل ما عينك ما هتقرأ العيوب هتقدر تصلح منها..
أنت محتاج تعرف إن ذاتك فيها كل المطلوب عشان تعرف تعيش وتتحرك..
أنت محتاج توقن في وجودها حتى لو مش شايفها.. حتى لو الأوضة ضلّمة..
هتنورها بإدراكك بوجودها.. مع الوقت هتلمس طريقك في الضلّمة فأكيد
هتعرف توصلها بالمُمارسة والمحاولة المستمرة..
المشكلة اللي بتخليك تضلم كل ما تحاول تنوّرّها أصوات كثيرة بتسمعها
جواك وبراك.. أصوات بتهز من قيمتك.. بتحسسك بعدم استحقاقك للحب ولا
للاحترام.. وأنت ممكن متكونش مصدقها.. بس هي من كتر ما صوتها ساعات
بيكون عالي بيمنعك تقدر تفتح النور فتثبت قيمتك..

اتحرر من أصواتك الداخلية

للأسف تصورنا عن نفسنا مبني من زمان.. فلو أنت من زمان مش شايف
نفسك ولا قيمتك.. أو لو شايفها بس لما بتتوجع بسبب احتكاكك بالحياة
والآخرين بتفقدّها ومش بتتعلم تتعافى بشكل صح، فممكن تتهز جواك شوية..
هتلاقي صوت جواك بيقولك أنت أصلاً مين.. أنت مش عارف نفسك.. أنت
ملكش قيمة..

مهم أوي تفضل تأكد لنفسك إن قيمتك ثابتة جواك رغم كل أفعالك.. رغم أي
شيء..

ودورك إنك تفكر نفسك بده.. لما تسمع الصوت اللي بيقضي على قيمتك
توقفه وتجاهده وتقول لنفسك وتأكد لها إن قيمتها ثابتة مهما حصل..

حدث نفسك دومًا باستحقاقك لما تحتاج.

بكده أنت بتغير مع الوقت طريقة تفكيرك عن نفسك بحديثك الداخلي..

محتاج كمان تزود إدراكك عن نقاط تميزك وضعفك.. ابدأ شوف بتعمل إيه
بشكل واقعي في الحياة.. ابدأ لاحظ نفسك ودون اللي عرفته عنها.. لما
بتنيسط بتتصرف ازاي.. لما بتزعل بتتصرف ازاي.. بغض النظر عن تقييمك..
أنت تتعرف على نفسك الأول بعين شفافة مفيهاش أحكام.. عين بتشوف
الواقع زي ما هو من غير ما يتدخل فيه رؤيتك القديمة لذاتك اللي لا تصلح أنها
تبقى مصدر لحركتك دلوقت..

القيمة الذاتية مجرد إدراكك إنك مكتبة.. ثابتة في مكانها.. مهما حصل.. وكل دورك إنك تحميها من إن حد يهددها.. بتحميها وتمتنها من الأذى، وده هنتكلم عليه في الفصول الجاية..

فلما تعرف وتتيقن إن ليك قيمة.. هتحس تلقائيا باستحقاقك لأهم مطلبين لذاتك.. استحقاق الحب.. واستحقاق الاحترام..

مبدأ الاستحقاق بينع تمامًا من شعور القيمة الذاتية.. بتحسه من جواك..

فيه ناس مبيحسوش باستحقاقهم للحب أو الاحترام.. أو إحساسهم بسبب خبطات الحياة بيدأ يتملي شك ويحسوا إن العيب ممكن يكون فيهم.. فيسكتوا كثير قدام الإهانات والاستباحات النفسية من اللي حوالينهم..

أنت تحتاج إن تشعر بانتماءك لبيئة مُحبة آمنة.. وأن تشعر بأهميتك ودورك في محيطك.

والغريب إن رغم شعورهم الظاهر بعدم الاستحقاق.. ده مش بيغير إن فعلاً جواهم شعور فطري بقيمتهم الثابتة.. بس اتدفنت بعوامل التعرية والحياة.. فكونت عندهم رؤية عن ذاتهم مش مُعبرة عن حقيقة تكوينهم أبدًا.. بقوا ماشيين عكس الكتالوج.. فيحصل شعور بوجع شديد.. وبدل ما يرجعوا لذواتهم عشان ينفضوا التراب ويثبتوها.. بيزودوا في التصرفات الإرضائية أو التصرفات العدوانية المبنية على استباحة الآخر على تخيل إن ده اللي حيهديّ الوجع في العلاقات.. وللأسف ده اللي بيزودها.. ويسمح لحلقة مفرغة من الدوامة النفسية.. ودخول ناس ممكن تأذيك أو تأذيها..

عشان كده هنتكلم عن مبدأ الاستحقاق.. مبدأ أننا محتاجين نرجع نثبت رؤيتنا عن ذاتنا.. فنقدر نستقبل ثاني الحب والاحترام بشكل صحي.. شعورك بذاتك بيحتاج لأهم احتياجين عشان يفضل ثابت.. الشعور بالانتماء وأنه يحس بأهميته ودوره الفعال في الحياة..

فلو أنت مش قادر تشوف نفسك مُستحق.. مش هتعرف تثبت نفسك ولا تشوفها مهما عملت.. ولا هتقدر تستقبل من اللي حواليك معاني الحب اللي بتحسسك بانتماء.. ومعاني الاحترام اللي تستحقها.. اللي بتحسسك بأهميتك ودورك..

الأصوات اللي جواك بتمنعك تستقبل المعاني اللي أنت محتاجها عشان تفضل مثبت قيمتك..

غالب الأصوات دي بتكون مش معبرة عن واقعك.. هي من سحيق الماضي.. بغض النظر عن سبب تكوينها.. أنت بس تدرك إن مشاعرك اللي بتوجعك في العلاقات ويتضرب إحساسك بأنك ممكن تتحب.. وأنك مهم.. إنك متشاف..

إنك تقدر وتعرف.. كل معاني التقدير والاستطاعة.. لو اتضربت.. هتبقى بتعامل في العلاقات بشكل مرضي مرهق مش صحي.. وهتبقى معرض جداً للانتهاكات والتهديد النفسي.. وممكن أنت كمان تسبب الأذى النفسي لغيرك..

تؤمن إنك تستحق.. عشان تعرف تتعامل مع الآخرين.. وتقدر تدير المشكلات اللي بتتولد في العلاقات بسبب الفروق الشخصية والفكرية.. واختلاف الطباع بشكل موضوعي مفيهوش مشاعر تشوشرك..

فلما بتثبت قيمتك.. الدنيا بتبدأ توضح لك.. وتبدأ بسهولة تقرأ أكثر الإشارات والعلامات.. بتعرف تصلح أخطاءك.. وبتشوف في تصرفاتك وتصرفاتهم اللي يعلمك توصل لأحسن صورة من نفسك..

مرفوض

كثيرا ما يشفي القلب المثقوب بعض الحب الغير مشروط..
فيكون لقلبك الأمان الذي تسكن إليه..

يُعيد الحب لملمة روحك.. ويُقيم أنقاض قلبك..
ويُعيدك لنفسك ما شردت منها..

بتحس بالحب بصعوبة.. في حاجة ناقصة في حُب الناس ليك.. في حاجة بتوجعك مش قادر تفهمها ولا تُدركها..

ممكن يأكدوا لك الحُب بكل التصرفات.. وأنت من جواك محتاج تتطمئن..
بدوام التأكيد.. وبتتكسف تطلب..

وبتيجي عليك لحظات بتضلم أوي عليك الدنيا.. وتلاقي أصوات من جواك بتكلمك بتمحي كل حقيقة حواليك..

ليه محدش بيحبني؟ هو ليه محدش بيهتم بيا؟ هو ليه انا لوحدي؟

هما أصلاً بيرفضوا وجودي.. هما مش بيحبوا يقعدوا معايا..

احتياج الحب الغير مشروط لم تكتف منه في صغرك.. فأصبحت رغم نضوجك تبحث عن الحب في كل نظرة وكلمة..

ومش كلنا الأصوات دي بتبقى بنفس الدرجة عندنا.. حسب قدر الأذى.. وقدر الوعي اللي عندنا.. في مننا أصواته عالية أوي كده.. وفي بس بيسمعها لما بيتوجع في المعاني اللي محتاجها في الحب..

أصلك لما تفضل مستني الحب.. ومن كثر ما أنت مستنيه معدتش قادر تحس.. لأن مفيش حد ييملى احتياجك.. ومهما اللي حواليك عملوا مش بيرضوا توقعاتك.. سقف توقعاتك أعلى من قدراتهم..

ويأسك بيحيب يأس.. وإحساسك بالحرمان بيزيد.. فبتتوقع.. وتبتطل تدي.. فاللي حواليك يحسوا بالجفاء فيبطلوا يهتموا.. فتحس بوحدة وبمرار عدم اهتمامهم.. فتكبت.. فيحسوا بشدتك وتغيرك فيبعدوا.. وتفضل تزق كل اللي حواليك بعيد عنك.. مع إنك بتنادي من أعماق قلبك.. حسوا بيا.. متسيونيش!!

الأفكار دي كلها بتفضل تلف في عقلك.. غصب عنك.. وتبدأ تؤلد أحاسيس حزن ويأس واكتئاب.. ولو حتى أنت في وسط علاقات آمنة مُحبة ممكن تلاقي نفسك مش عارف تبقى معاهم.. عشان الشعور بالتهديد من مكانتك عندهم بيملاك..

يبدأ الواحد ينعزل ويبقى مش قادر يتواصل مع الناس اللي بيحبها أوي ويتمنى قربها.. على طول بيحس إنه مضطهد.. وأن الناس بتقصد تتجاهله أو تهمله.. تحس بهواجس إنه عبء على اللي حواليه.. بيحس إنه خايف من الرفض.. خايف من الخذلان..

عايش في خيبات أمل متكررة.. بسبب إنه محتاج جرعة كبيرة من الحب في كل موقف وللأسف مبتحصلش زي ما هو بيتمنها..

عندما تتحول العلاقات لمساحة غير آمنة للذات، يشعر الإنسان بهول الاغتراب.

من جواه بيتمنى لو يبقى محط نظر واهتمام الناس عشان يتأكد من حبهم.. جعان لكلام حب وتقدير واهتمام على طول.. وغالبًا لما حتى بياخدهم مش بيصدقها!

لما بيحب حد بيحب أوي.. ولما بيكره حد بيكره أوي.. معندوش أرض وسط.. مبيعرفش يقيم التصرفات في الحب ولا يفهم معناها..

لما حد يبدأ يهتم بيه.. بيحس إن أكيد وراها حاجة.. أكيد محتاج منه شيء.. وساعات يبدأ يتنازل عشان يقدم الشيء اللي متخيل إنه يتطلب وجوده في حياتهم عشانه..

بيتكسف لما حد يخدمه.. لما حد يجيله هدية.. لما حد يوربه أي حب.. لأن من جواه في صوت بيقوله.. «أنت لا تستحق الحب».. وكان الصوت ده بيحميه يتجرح.. وللأسف إن الصوت ده هو سبب كل الجرح..

الأصوات اللي جواك دي بتمنع استقبالك للواقع «زي ما هو».. بتلبس الواقع أحاسيس قديمة من ملفات ممكن تكون خلصت واتفنت جواك من زمان.. بس بيفضل الإحساس نفسه موجود عشان يحميك من تكراره.. يكلمك بصوت عالي.. يزعق لك كمان عشان يحميك.. وهو حابسك في زنزاة.. ومانع عنك تستقبل كل أسباب الحياة.. مانع عنك تدوق يعني إيه حب!

يصير استقبال الحب بداخلك مرهوتًا بأصوات لا تستطيع إسكاتها.

وده إما إنك أخذت حب طول عمرك زيادة عن اللزوم، فبقت معايرك للحب عالية بزيادة عن معظم البشر.. معايرك اختلفت بمعنى آخر.. فلما الحب اللي محتاج تاخده قل عن مستواه الطبيعي.. بقيت حاسس بحرمان.. أنت متعود على درجة معينة تستقبل بيها.. غير كده مش بتحس.. فبتطلب أكثر.. يمكن تحس!

والسبب الثاني إنك فعلاً مخدمتش قدر الحب والاهتمام الكافي عشان تشبع احتياجاتك في سن صغير لما كان احتياجك للحب الغير مشروط أعلى احتياج يتملي.. فلما ما تملاش بالقدر الكافي بقى على طول جعان ومبيشبعش..

مهما كان السبب.. الشعور بقى محتاج للمزيد..

ولما الشنطة تبقى مثقوبة طبيعي جدًا بتسرب كل اللي بيتملي فيها.. ليه؟ عشان اللي بيملاك مش قادر يعرف إنك مثقوب من جواك.. لكن مين بقى دلوقت اللي مدرك لثقوبك؟ أنت!!

أنت ممكن تصلح الشنطة على فكرة.. فتبدأ تتملي من ثاني.. وأنت وبس اللي هتعرف إمتى محتاج تملها.. وامتى لو اتملت تتقطع من ثاني.. فتكتفي.

عشان كده كانت أول خطوة إنك رممت كويس رؤيتك لذاتك.. رجعت تعرف إن قيمتك جواك حتى لو مش حاسس.. واهتمامك بنفسك هو اللي يخليك تنور من ثاني فتقدر تحسها من جديد..

ومن أهم الطرق اللي تهتم بيها بنفسك.. إنك تعرف إن فيه جزء منك مكسور.. محتاج ترميم مش أكثر.. بإيديك أنت.. مش بإيد حد ثاني..

اتحرر من أصواتك الداخلية

لما تدرك إن الصوت اللي جواك ده صوت مش واقعي.. صوت يعتبر مزيف.. مش سامح لك تعيش وتستقبل الحب.. واقف حاجز بينك وبين لحظاتك الراهنة.. هتقدر ساعتها بس تلقطه وهو بيكلمك..

بالرعاية والاهتمام فقط.. تجد الحُب.

محتاج تحب نفسك حب غير مشروط.. تملأها بتقبلك لعيوبها.. بأنك تديها مساحة آمنة للتجربة واحتمالية الخطأ.. والتشجيع على التصويب..

كل ما تسمعه في روحك.. خلي حديثك الداخلي مع نفسك تأكيد إنك تستحق الحب.. عشان نبدأ نستقبل.. ولما نستقبل.. هنبداً نبنى نظرة جديدة واقعية تأكد استحقاقنا.. فنقدر نتخلص من الصوت ده للأبد..

استقبل الحب

غالبًا أنت مش مُدرك يعني إيه حب أصلاً.. أنت شايف الحب بنظرة فيها خلل وشوشرة كبيرة.. بتقيس الحب بناء على صوت من تجارب قديمة بيدمر كل لذة للحب.. كل معنى حقيقي للحب بيتغير لما يوصلك.. وكأنك بتشوهه بطريقة تفكيرك فمتحسسش بيه..

عشان تقدر تعكس نظرتك للحب.. حاول تدور على معاني جديدة للحب.. حاول تدوق معنى الحب بشكل مختلف.. شوف كل حد حواليك بيحبك بأي طريقة.. مش مطلوب تحس.. مطلوب بس في المرحلة دي إنك تقدر تُدرك إن تصرفاتهم دي معناها حب..

وده ممكن يتم بس لو بطلت تدي معاني لتصرفاتهم.. بطلت تقيّم تصرفاتهم وتحكم عليها أنها ليها أسباب كتير عن أنها تكون حب..

الحب بيظهر مش بس في شكل كلمة.. ممكن في شكل وقت بتقصّوه سوا.. هدية ليك.. لمسة حانية.. خدمة بتتقدم لك..

ومعظم الناس بتقدم الحب بناء على تصوّرها ليه.. فلما تحس إن الحب بيوصلك مش بالشكل اللي أنت محتاجه.. ركز إنك تلقط الشكل اللي متقدم لك.. وتحاول تدي معنى «الحب»..

مع الوقت لما حديثك الداخلي يبقى يقول لك إنك تستحق الحب.. وواقعا بتشوف الحب بمعاني جديدة.. بيدخل لمخك معلومات جديدة عن إحساسك بالحب.. وهتبدأ تدوقه وتحسه..

الموضوع محتاج منك شوية مُعافرة مع عقلك.. وشوية تقبل للي متاح.. وانت ترجع تحس بالحب من ثاني..

وزي ما حررنا عقلنا من عدم تذوّق حب الناس لينا.. محتاجين كمان نتحرر من عدم الوضوح في طلب الحب..

لما تبدأ تؤمن إنك تستحق الحب هتبدأ تتحرر من خوفك إنك تطلبه.. وهيبقى توضيح احتياجك للحب شيء طبيعي بالنسبة لك..

وتقبلك لرفض حد مش هيوجعك؛ عشان مُدرك إن كل واحد بيحب بطريقته وباستطاعته.. فساعتها بتقبل بسهولة المُتاح في علاقتكم.. من غير ما تحكم عليها زي الأول إن رفضهم مُعبر عن عدم استحقاقك!

مش مهم!

بداخلك أنت.. لا بخارجك يكمن الوجود
بتستغرب نفسك لما ساعات بتحتاج أوي إنك تحس بمكانتك عند الناس..
وساعات بتبقى عايز تشوف نظرة التقدير لتصرفاتك..
بتبقى كأنك بتحاول تثبت صورتك وقيمتك ولدورك حواليتهم..
عايز تشوف نفسك موجود بقوة وسايب عندهم الأثر المطلوب عشان تحس بأهميتك!
والإحساس ده ممكن يزيد أوي لما تلاقي جواك أصوات بتكلمك.. بتقولك
بمنتهى القسوة إنك بس مش «مهم».. فمتحاولش!
بتضطرك تشعر بالإهانة.. بالتسفيه.. بعدم احترام لذاتك!
بيكون وقتها صعب أوي على نفسيتك لما تحس في موقف ما إن رأيك
مالوش أي أهمية.. أنت شخصيا وجودك ملوش أي أهمية!
فتلاقي مشاعرك اتضخمت.. وبقت بتلف في معاني بتهد من نفسيتك..
وكان وقت الوجد.. وقت التعرض للإهانة عقلك قفل على إن وجودك مالوش
أي اعتبار ويكسفك من نفسك.. وتبقى شايف كل تصرف وموقف بنضارة
سوداء... فتحس باهتزاز لقيمتك..
تبدأ أفكار مكانتش بتشغل حيز من تفكيرك تشغل بالك وتألّمك.. عشان
حسيت بالإهانة من وجهة نظرك!
تلاقي مثلاً الناس متجمّعة ومحدثش فكر يقولك فتلاقي نفسك بقيت حساس..
وحسيت إن ده أكيد عشان أنت مش مهم..
وممكن توصل في لقطة ما لو مشاعرك مكبوتة جواك إنك لما تبقى في
وسط الناس بتحس إن محدثش شايفك.. بتحس إن وجودك زي عدمه..
معاني كلها بتوجع أوي.. ووقت شعورك بيها بتؤذيك وتتؤذي تعاملك مع اللي
حواليك..

لو اللي قدامك بينتقدك كتير.. هتبدأ تحس بتوتر لما تبقى مسؤول تعمل حاجة قدامه.. خايف تبوظها أحسن تشوف نظرات اللوم والنقد اللي بتأكد إن مشاعرك كمان مش مهمة..

لا اعتبار لآرائك ومشاركاتك.. فلا بديل عن الانسحاب

حاسس إن رأيك مش هيتعمل بيه.. وبتقوله وتشوف بنفسك إن محدش سمعك ولا انتبه لك!

هو هيفرق معاهم إيه؟ أنت أصلاً متأكد إنك مش مهم.. وعمرك ما هتكون مهم عندهم ولا عند حد..

لغاية ما وصلت للحظة بقيت حاسس بغضب شديد عشان مش حاسس بأهميتك.. وممكن تكون حاسس من جواك بضعف وعجز شديد وصلك إنك فقدت إيمانك أصلاً بنفسك.. بقيت بتتكسف من نفسك في كل موقف حسيت بإهانة فيه..

حقك:

ووجعك ده من حقك..

حقك إنك تحب تثبت نفسك في أي شغل بتعمله..

حقك إنك تحب يبقى شكلك متقن للعمل..

حقك إنك تحس إن وجودك في وسط محيطك مهم..

جزء لا يتجزأ من إنسانيتك إنك يبقى ليك دور فعّال.. دور مهم بشكل أو بآخر يشعرك إنك موجود لسبب في الحياة..

كم تحتاج النفس لتشعر أن وجودها مهمًا في حياة البشر؟

شعورنا بالأهمية من وإحنا صغيرين كان بيتحس كأنعكاس لمدى اشتراكنا في الحياة وإدارتها.. هل كنا واخدين القدر الكافي من المسؤوليات.. هل كانوا يباخدوا رأينا بشكل يحسنا أننا مهمين ليهم.. فنحس إن رأينا مسموع ودورنا مهم..

فلو على طول إحساس الإهانة ده ماليك.. وبقي الأكثر إنك حاسس إنك مش مهم في كل شيء بتتعرض له.. يبقى أنت محتاج ترجع صورتك عن نفسك لشكل يليق بحاضرک.. وتتحرر من رؤية مضت مش معبرة عن حالك دلوقت..

لما الإنسان بيتعامل مع كل موقف لوحده.. من غير ما يركب عليها معاني قديمة.. بيقدر ينضج ويتعلم.. ويقدر يتقدم لأحسن صورة من نفسه.. لكن

الصوت اللي شغال جواك إنك مش مهم بيعطلك كثير.. ويحبسك في وقت مالوش وجود..

عدم رؤيتنا لنفسنا بشكل صح واحتياجنا العالي للشعور بالأهمية ممكن يوصلنا أننا نفقد الإيمان بأننا لينا أهمية أبدا.. ويعطلنا عن تحقيق ذواتنا..

وطبعا ده ممكن ميكونش واقعي ولا معبر عن الحقيقة.. لأننا نقدر نكون مهمين طول ما عندنا إيمان في نفسنا.. وطول ما إحنا عارفين نشوف نفسنا وقدراها صح..

إحساس عدم الأهمية ممكن يكون اتبنى من زمان.. من وقت فات.. لما كان عقلنا على قدنا وكنا بنفسر كل تصرف على إن وجودنا مش مهم.. ومحدثش كان بيعدل لنا أفكارنا..

فتحرر الواقع دلوقت من رؤية اتبنت في الطفولة ساجناك أو تجربة أليمة قريبة فاقدك شعورك بقيمتك واستحقاقك للاحترام..

هو كده اتبنى بناء على تجارب وجعتك من جواك من صغرك أو من ماض قريب.. ومعرفتش تتصالح مع الألم.. فالألم ساب علامته على قلبك.. لأن لما بتتعرض لموقف يوجعك.. يهينك.. بيكون مهم جداً إنك تنتبه لتثبيت صورتك الذاتية.. إنك تعرف تمن نفسك من جُوه عشان متشوفش الإهانة معبرة عن استحقاقك للاحترام.. فتكبر المعاني بالشكل ده جواك..

فلو الشعور ماليك.. أو لو بتتعرض له في مواقف معينة..

اتحرر من أصواتك الداخلية

لو إحساسك بعدم الأهمية مسيطر عليك لأي سبب.. هتلاقي نفسك حساس للنقد.. هتلاقي نفسك مش متقبل الرأي الآخر.. مش متقبل انشغال الناس عنك وقت ما تبقى «متصور» واجب انتباههم.. هتبقى بتحمّل العلاقات معاني أعلى مما تتحمّله.. وهيبقى العلاقة مفيهاش المرونة الكافية اللي تخليك تتقبل إن ممكن حد عادي يسمعك وميردش عشان باله مثلا مشغول..

مهم جداً إنك تعكس الصوت جواك.. عشان تعرف تلبي احتياج من أهم احتياجات تقدير الذات وهو الشعور بالاحترام..

الشعور بالاحترام بيبدأ من أنت شايف نفسك ازاي، وأنك متتكسفش أبدا منها ولا من آراءك وتصرفاتك.. بيبدأ من إنك توقن إنك تستحق الاحترام بغض النظر عن طريقة الناس معاك.. وبغض النظر عن حتى لو جم عليك وسفّوها منك..

تبقى ساعتها مدرك ومثبت قيمتك أوي.. لأنك بتقول لنفسك: تصرفهم معبر عن نواقصهم أو عن ظروفهم.. مش معبر أبدا عن ذاتي.. فتقدر ساعتها تطالب بالاحترام وأنت كلك ثقة إنك تستحقه أكيد.. فمش هتتكسف من نفسك.. ولا هتحس بإحراج تعلي صوتك وتشارك برأيك..

تقول لنفسك إنك تستحق الاحترام وأنت مهم.. تعكس الصوت ده جواك.. عشان لو صدقته هيقف في طريق علاقاتك ومش هتبقى علاقات صحية..

هتلاقي نفسك واقع في مشاعر سلبية من «هما عملوا فيا.. هما قاصدين يضايقوني».. ف وقعت في طريق الدخول في نياتهم.. وإحنا مش مطلوب منا غير إننا ناخذ ظاهر الفعل وندي أعذار كثير لو التصرف غلط.. ونوضح إن التصرف مش مقبول وبس..

لكن ده مش هيثم إلا لو أنت متصالح من جواك مع ذاتك.. واستحقاقها..

أنت تستحق الاحترام.. وإن لم تؤمن بذلك فكيف لهم أن يؤمنوا؟

معنى الاحترام

المشكلة هي هل أنت فعلاً ينقصك احترامهم؟ ولا أنت اللي حاطط شكل الاحترام في قالب محدد.. لما بيخرجوا عنه بتحس بالتهديد.. فبالتالي أي وضع آخر بيحسسك بالإهانة.. ويحسسك بعدم الأهمية؟

فيه ناس لو حد مقالهاش «حضرتك» تصايق وتحس بإهانة.. عشان محدّدة كل الاحترام في قالب «حضرتك»..

فيه ناس لو حطيت رجل على رجل قدامها يعتبروها إهانة.. بعض الستات حساسة شوية لرؤية مكانتها ورجاحة عقلها عند الرجال.. فبتبقى حاسة بعدم احترامهم لو اختلف معاها أو لو صمم على رأي مختلف..

فبالتالي هو مش بس صوت جواك محتاج تعكسه وتؤمن في ذاتك.. لا ده كمان معنى مشوّه للاحترام ساجنك جّواه مخليك مش عارف يبقى عنك مرونة وتتسع لاختلاف البشر في تطبيق الاحترام!

حقك يبقى ليك معايير للاحترام متنزلش عنها.. وحق الناس توضّح لها ده من غير ما تحكم عليهم إنهم قاصدين عدم احترامك.. فتؤكد لنفسك شعورك إنك مش مهم بس عشان أنت شايفها كده!

فلما تتعرض لشعورك بالإهانة.. محتاج تطمئن نفسك إنك إنسان مستحق للاحترام والتقدير..

أنت مش محتاج تثبت استحقاك للاحترام للناس..

لو أنت من جواك شايف استحقاقك.. هتعرف تثبتها بنفسك.. فتقدر تحميها لما تتعرض لموقف يقلل منك.. أو لو جواك شعور بالتهديد يخليك حساس في التعامل مع الناس هتعرف أنها مجرد أصوات جواك مش معبرة عن الواقع.. فتفصل شوية من الناس.. تشتغل على حديثك الداخلي وعلى نظرتك لنفسك تعدلها وترجعها لمعنى الاستحقاق.. فتبدأ تثبت من ثاني.. وتقدر تتعامل مع الناس من غير حساسيات..

مقدرش..

حين يجتمع بقلبك شعور الإحباط مع القلق الشديد..
تتحول المشاعر من مجرد أحاسيس تشعر بها..
لعجز حقيقي يُقيدك عن الحركة ويستنزف طاقتك..
شلل مؤقت عن الاستطاعة!
مش بعرف..
مقدرش..

كلمتين يفضلوا يدوروا في عقلك بشكل متواصل كل ما تحاول تتحرك في إنجاز في حياتك.. ماسكينك على طول ببيأسوك من أي قدرة أو استطاعة ليك.. بيايدوك تتحرك.. بيايدوك تحاول حتى إنك تجرب!

فاقد الإيمان في أي استطاعة.. فاقد اليقين في قدراتك.. بتحس إنك مهزوز من جُوه أوي.. بتحاول متينش الشعور ده.. بس الأصوات اللي جواك بتقتلك على طول.. بتحسسك بعجز رهيب..

الغريب إنهم مش بس بيكلموك وقت الإنجاز.. هما كمان بيكلموك في علاقاتك.. بيحسسوك بعدم الإِستطاعة إنك تبذل فيها.. إنك تغيّر من شيء.. إنك تاخذ خطوة إيجابية.. فيخلوك متمسك برويتك.. مبتقدرش تشوفها بشكل مختلف..

بتوصل إنك تلاقي بينك وبين أحلامك حاجز رهيب مش عارف تحققها..

أهدافك بتمشي فيها بالراحة جدًّا.. فبالتالي إحساس الإحباط على طول يؤلمك.. على طول مثبّطك.. حقيقي الصوت جواك اللي شايفك متعرفش أعلى بكثير من أي استطاعة إنك تقدر وتحاول!!

فاكر لما اتكلمنا عن الطفل وهو لسه يجرب نفسه.. يبشوف حدود استطاعته.. بيكتشف اللي حوالية بشغف.. ومن غير أي قيود أو إحساس إنه

ممکن يفشل؟

الإحساس ده بالثقة في نفسك اتفقد منك على مر الزمن.. اتفقد لأسباب كتير.. وكلها من غير ذكر تفاصيلها بتثبت صورة واحدة ليك عن نفسك زي ما قلنا.. إنك معندكش الاستطاعة والقدرات عشان تحقق اللي أنت عايزه.. فقد رؤية تام للقدرات اللي فيك وتقدر تستعملها ازاى..

المشكلة كلها لو أنت فقدت الثقة في نفسك.. ازاى هتتخيل إن الناس هتؤمن بيك؟

للأسف إحنا مش مدركين إن جزء كبير من رؤية الناس لينا معتمد على رؤيتنا لنفسنا..

أنت لما بتؤمن في نفسك.. كده بتأسس الأساس المتين عشان كل تصرفاتك تديك ثقة.. بتمشي بخطوات ثابتة.. بتتحرك بشكل بيدل إنك عارف هتعمل إيه.. في قوة في كلامك وآرائك.. في تحكم في نفسك لما بتضايق عشان كلامهم مش بيهزك.. كل ده بيبين أوي مدى ثقتك في نفسك..

الناس بطبيعتها بتحب تتحاوط باللي يضيف لحياتها بريق.. بهجة.. معلومة.. حياة.. يعني بيدوروا على الإضافات.. بيعجبوا وينبهروا باللي عندهم الإضافات دي..

حماية قيمك الذاتية من الاهتزاز هو أهم مرتكز لثباتك في الحياة

عشان كده الثقة في النفس مهمة جدًّا في إدارة العلاقات.. بالذات العلاقات الصحية.. لأن العلاقات الغلط بتدخل من ثغرات موجودة في رؤيتك لنفسك.. بيدخلوا منها ويستغلوها.. ممكن بشكل غير واعي وده لمصلحتهم.. وده غالبًا اللي بيسبب الألم..

الثقة.. والقيمة

المفروض إنك مخلوق -زي ما اتفقنا- قيمتك ثابتة.. وثقتك في نفسك في السماء!

اتفرج على الطفل وهو لسه سنتين.. بتلاقيه بيرغم الناس على حبه واحترام احتياجاته.. ليه؟ عشان بيتحرك من منطلق مهم جدًّا... أنا استحق الحب.. أنا أستحق الاحترام عشان أنا ليا قيمة.. وعشان قيمته ثابتة كده مدياه الأساس الآمن المطلوب عشان يقدر يكتشف بقى ويجرب من غير ما يتكسر نفسيًّا..

القيمة الذاتية المفترض ثابتة ودورنا أننا نحميها بتغيير.. هي العمود اللي شايل كل نظرتنا لنفسنا.. لو اتهد بنتهد معاه.. على الناحية الثانية بقى الثقة في

النفس مُتغيرة جدًّا.. طالعة نازلة حسب نجاح التجربة.. وحسب فشلها..

وده طبيعي لأنك ممكن تعمل حاجة لسه معندكش مهارة كافية تعملها فتفشل.. فلو شعورك بالقيمة ثابت هتلاقي نفسك ثابت وتقول أنت تقدر.. وشايف إنك تقدر.. فيلا إيه اللي محتاج أعمله عشان أقدر أنفذ!

ثقتك في نفسك مبنية على ثبات شعورك بالقيمة

رؤيتك لنفسك بتؤدي لاستطاعتك في التنفيذ والسعي.. ومرونة تقبلك إن ثقتك في نفسك بتطلع وتنزل بيخليك عندك قدرة أكبر إنك تكمل وتفضل بتحاول وتجرب..

نرجع تاني للطفل.. يعني هو لو مفيش بيئة آمنة كافية حوالية هتلاقيه مهزوز واقف مكانه.. وكان رؤية أهله ليه بتديه القدر الكافي من الأمان اللي يشحنه إنه يبدأ يتحرك بشكل مريح وواثق.. فتلاقيه يبدأ يكتشف وكله يقين إن ده من حقه.. وأنه كمان يقدر..

دخول إرشادات الناس المختلفة على مدار التربية من الأهل والمجتمع.. ممكن تخلي الطفل يحقق قدراته ويكتشف براحته في إطارهم الأمن.. وممكن للأسف تنقله هواجس عن استطاعته.. فمع الزمن.. ومع قلة محاولاته للتجربة والخروج من الحيز اللي متصور إنه آمن.. ببدا يفقد ثقته في نفسه شوية بشوية.. ثقته في قدراته!

طبعا إخفاقات الحياة كمان بتزود الجرعة عنده.. وبتأكد له إنه تمامًا ميعرفش ولا يقدر! وبكده يبقى اتعطل عنده أهم عامل هو محتاجه عشان يحقق استخلافه.. العامل القوي اللي بيخليه يتحرك وينجز ويسعى ويفضل ينتج.. عامل القوة في تكوينه.. ثقته في نفسه وقدراته!!

اتحرر من أصواتك الداخلية

أكيد أنت أدركت دلوقت إنك مينفعش تفضل معطل نفسك وقدراتك عشان رؤية اتبنت من الماضي مش معبرة عن استطاعتك دلوقت.. أو بناء على جرح جديد أفقدك الثقة في قدراتك..

بغض النظر عن كل دليل في الواقع بيبعث لك رسالة عاملة إيه عن نفسك.. مهم إنك تتفهم إن ثقتك بنفسك تبدأ في رؤيتك لنفسك من جوه من دون تقييم.. من دون أحكام.. من دون أي مسطرة تؤيد حرية الإبداع والحركة.. ثقتك في نفسك بتبدأ من ثبات رؤيتك لقيمتك..

عشان كده ابدأ ابني على شعورك بالقيمة.. وافهم إن ربنا مديك قوة رهيبه وأن علمك كله منه سبحانه.. وده فيض كبير مالوش حدود.. كل اللي محتاجه

إنك تعافر مع الصوت اللي بيهدمك.. وثبتت نفسك إنك تقدر.. وأنت هتجرب.. وهتحاول..

الفكرة كلها إن حقيقي أنت تقدر تعمل حاجات كتير.. تقدر تجسد اللي أنت تحب تظهر عليه.. بشرط إنك تؤمن إن جواك الأساس اللي تقدر تتحرك منه.. وأنت تتحرر تمامًا من الحكم عليها..

ليه نشك في نفسنا؟

السبب الأساسي إن الصورة المبنية عن الذات سلبية جدًا في رؤية مدى استطاعتها.. يعني فاقد الثقة في حدود قدراتك واللي تقدر تعمله..

والسبب الثاني المعنى المشوّه للثقة بالنفس.. الناس بتخلط بين الثقة في النفس والشعور بالقيمة.. بيشتبكوهم في بعض.. وده أكثر سبب يخلي أي إنسان يتعطل في حياته وتتأكد أصواته الداخلية أكثر..

القيمة الذاتية ثابتة كثبوت وجودك..

أما الثقة بالنفس متغيرة بتغير تجاربك

السبب الثالث: الإطارات والمعايير الغلط اللي بتتحط لتقييم القدرات والاستطاعة.. اللي هو في أحسن يتعمل مهما عملت مبتوصلوش.. فيخليك مخنوق عشان بتلف في حلقة مفرغة من تكرار إثبات الذات.. وأن زيادة كمان مينفعش تغلط أو تفشل تماما..

عشان كده.. محتاجين نفهم إن خلفية الثقة بالنفس هو شعور الاستحقاق والقيمة الثابتة اللي مبتتغيرش مهما حصل.. وأن الفعل نفسه وارد أوي إنه يتغير.. وأن مرة أعرف ومرة معرفش.. وده عمره ما كان مقياس عن رؤيتي لذاتي..

تصرفاتي مالهاش علاقة بقيمتي.. قيمتي ثابتة تماما.. وتصرفاتي ليها علاقة بالتجربة والموقف وحالتي المزاجية وقت فعلها وطباعي مع احتكاكي بالظروف.. وتعلمني أكثر عن مكتبتي.. عن مميزاتي وعيوبي.. فاقدر استعملهم بشكل أفضل..

الثقة بالنفس مش معناها أبدا إنسان ناجح طول الوقت.. مبيغلطش.. مبيفشلش..

الثقة بالنفس معناها إنسان حر.. حاسس بأمان كفاية عشان يجرب..

ولو فشل.. قوته وإيمانه في قدراته اللي في «مكتبته» اللي هي جزء من تكوينه الثابت.. بتخليه يؤمن إنه هيقدر يقوم من ثاني ويفعل التجربة بشكل

مناسب أكثر لقدراته اللي هو شايفها وبإدارة واعية لعيوبه عشان مَتَقَفْش
تاني في طريقه.. مع رؤية الظروف بشكل واقعي..
وبكده نقدر نقول الإنسان ده فعلاً واثق في نفسه!!
مش كفاية..

أين النجاح؟

أنت فقط لا تراه.. لا تتذوّقه..

وكل ما خطوّت نحوّه تشعر بإنك لن تصل!

وما دام اتكلّمنا عن الثقة بالنفس.. ورؤية القدرات.. هنلاقي إن معظم
مشكلاتنا اللي بتضرب لنا الثقة في النفس.. صوت بنسمعه بيقولنا..
أنا مش كويس كفاية.. انا أقدر أعمل أحسن من كده..

وعلى الرغم من إن الصوت ده ممكن الناس تتصالح مع وجوده عشان هو
صوت في ظاهره بيدفعك للأمام عشان تفضل تنتج في أحسن صورة..
بس الحقيقة إنه بيوقفك في مكانك.. بيزنقك في معيار مثالي أنت مش قادر
تحده أصلاً لنفسك!!

اللي هو إيه معيار الكفاية؟ إيه مقياسك اللي بتقيس عليه؟

هتعرف إمتى إنك كويس كفاية؟ واللطيف إنك مش هتعرف لأن مهما عملت
هتفضل بتجلد نفسك إنك مش كويس كفاية!!

عشان تقدر تتحرر من المسطرة الوهمية اللي أنت حاططها على رقبتك..
أنت محتاج إنك تعرف دورك إيه أصلاً..

يعني أنت مطلوب منك فعلاً نتيجة تحققها.. وتفضل تلوم نفسك إن أكيد في
أحسن؟

وهل لما جربت طريقة التفكير ديه ساعدتك تنجز بالشكل المطلوب في
الحياة؟

خمسة ثقة:

١. إتحرّر

محتاج تتحرر من رؤيتك للنتيجة تماماً.. سيدنا يونس لما لقي إن قومه مش
بيؤمنوا.. سابهم عشان يلاقي مكان تاني يعمل دعوة فيه.. فيحقق نتيجة!!

ربنا علّمه بموقف الحوت لما بلعه إن مش مطلوب نتيجة.. المطلوب هو بس العمل!

سيدنا نوح فضّل يدعي قومه ٩٥٠ سنة.. ولم يؤمن معه إلا قليل.. وابنه مات كافر رغم إنه تيقن من الهلاك بعينه وبرضه مختارش دعوة سيدنا نوح..

متخيلين الإحباط الرهيب؟ لو سيدنا نوح كان شاف إن ابنه وغرقه دلالة على فشل دعوته كان يحصل إيه؟ سيدنا نوح فهم إنه عمل غير صالح كما أخبره الله عز وجل.. وتقبل الأمر رغم شدة وجعه..

ليه؟ عشان إحنا مش علينا النتيجة أصلاً!!

يوم القيامة لو قامت وفي أيدينا زرعة.. نزرعها بناء على وصية الرسول صلى الله عليه وسلم.. ومنقولش: إيه ما خلاص الدنيا خلصت!

كل ده بيعلّمنا أننا نركز في السعي وبس.. ونتحرر من النتائج.. نتحرر من احتياجنا العالي للنتيجة لدرجة أننا نتأيد نجز.. نتأيد نقوم بالخطوة اللي بيها هنوصل فعلاً!

٢. إسعى

سعيك في الخطوة وبس.. أنت اتخلقت تسعى.. اتخلقت عشان تحقق استخلافك باستمرار السعي في طريقك دون إن يتخللك شعور اليأس!

السيدة هاجر رغم أنها كانت في صحراء جرداء.. ومعها مسؤولية سيدنا إسماعيل كرضيع.. ومفيش أي وضوح للخطة اللي ممكن تنفذها..

مفيش رؤية أصلاً غير إيمانها القوي إن ربنا لن يُضيّعها.. وده كافي إنه يتبّتها نفسياً ويرجع ثقتها إن اللي خلقها مديها القوة الكافية للتعامل مع الموقف..

فبنت على اليقين.. البناء على الثقة في الله.. اللي هي منها تنبع كل الثقة في النفس يخليها تتحرر من التأيد في نظرة واحدة معطلة للحركة.. وتبدأ تفكر إيه اللي في أيديها تعمله بشكل واقعي؟

أنها تتحرك في كل الاتجاهات وبس.. يمكن تلاقي سبب للحياة..

لما بنسعى في العمرة السبع أشواط.. الواحد بيحس بعزيمتها حقيقي.. إحنا بنسعى في أمان الطريق الممهّد المكيف.. هي كانت -رضي الله عنها- بتطلع جبل.. تنزل من جبل.. الوحشة حواليتها.. ابنها الرضيع سايباه لوحده مستودعاه ربنا في ضلّمة.. وأكد كان في شعور بالخوف من الحيوانات أنها ممكن تهجم عليه.. يعني عندها من الأسباب اللي يخليها تفقد الأمل.. والدنيا تقفل في وشها..

وعلى الرغم من إن ظاهرًا كل الأسباب مسدودة.. لما بنت على اليقين.. بنت على ثقة وَقَرَّتْ في قلبها.. إن مَن خَلَقها لن يضيعها.. من خلقها وضع فيها من القدرات اللي تقدِّرها تعيش الموقف صح.. فعشان كانت مركزة في معنى «لن يُضيعنا».. ومركزة كل قوتها في تحقيق السعي.. قدرت تعدي التحدي.

٣. حدد وغيّر..

حُط سيناريوهات متعددة للوصول للهدف.. النقطة دي هتساعدك تبقى ماشي بوضوح في طريقك من غير شتات.. أنت بتحدد هدفك وتحدد سيناريوهات مختلفة عشان توصله.. ومن ضمن السيناريوهات إنه وارد أوي إنه يفشل.. وتثبت نفسك إن لو فشلت فده بيعلمك شيء عنك.. على الرغم من شعور الإحباط الطبيعي جدًّا اللي هتحس بيه ساعتها..

هو هيجيلك عشان يقولك كَمَلَّ وجرب تاني.. أنت من جواك عايز النتيجة أوي متستلمش.. دي رسالة الإحباط لينا.. إنه بيحررنا من الخطوة اللي فشلت.. لخطوة ممكن تنجحنا.. فأنت موقن تمامًا إنك بتتعلم من الفشل اللحظي عشان تبقى أفضل..

أكيد السيدة هاجر كانت حاسّة بخوف.. بس مش الخوف اللي يجمدها.. الخوف المطمئن بإيمانها في معية الله لها.. فخوفها حرّكها للبقاء.. مجمدهاش.. واتحركت لما حسّت بأمان جواها.. وهو ده المطلوب.. القدرة إنك تثبت نفسك من جواك.. القدرة إنك تلاقي البيئة الآمنة من أفكار تشجعك وتحركك لقدام فتقدر تنطلق في الحياة..

الإحباط لا يصيبك باليأس.. الإحباط بيقولك أهمية الخطوة دي ليك.. بيقولك فكر في أفكار بديلة عشان تفضل مكمل.. أو بينبهك إنك زنقت نفسك في تصور واحد حددك أوي وسجنك.. محتاج تتحرر بسيناريوهات متعددة تحميك من الإحباط.. وتساعدك تربي مرونة في التعامل مع المتغيرات.. فيبقى نفسك أطول في الإنجاز.

٤. اتشجع

لما تقيّم نفسك بشكل سليم وتشجع نفسك برؤية ميزات حركتها في كل خطوة.. ثقتك في نفسك بتزيد.. ويتؤمن أكثر إنك بتعمل اللي عليك في الخطوة..

محتاج تدوق لذة الإنجاز في الخطوة.. فتبقى ماشي في خطواتك بإلهام وشغف.. وحاسس بمشاعر إيجابية تصبرك على الطريق.. وكمان تساعدك في نهايته إنك تحس بلذة الإنتاج لو ربنا كلل عملك بالنجاح..

لأن اللي يتحرك وهو مضغوط ومخنوق وحاسس إنه مش بيعمل اللي عليه
بيبقى أبطاً كثير في حركته.. ومييحسش بأي إنجاز باللي بيوصل ليه.. كأن
فرحته بتسرق منه!

٥. تصوّر

أكبر سبب بيخليك مسجون في إحساس إنك مش كويس كفاية.. إن فيه قالب
واحد الناس بتقيس بيه.. تحسها قوالب.. كليات القمة أحسن من باقي
الكليات.. الموظف أمان عن التاجر.. تتجوز بدري.. الجوازة يبقى فيها نيش..
كلام بيخلي كل حاجة حلوة تفسد.. ويخلي الفرح ناقص.. عشان فيه شيء
بناء على معايير مش بتاعتنا ينقصنا!!

اتحرر بقى تمامًا من القوالب عشان فيه تصورات كثير.. واعرف إن زي ما
قلنا قبل كده استطاعتك مالهاش حدود.. حدودك بس هو رؤيتك لنفسك..
والأسباب اللي متوفرة لك.. لكن أنت بالمتاح وحرية التجربة ممكن توصل
للحياة اللي فعلاً تريحك أنت.. مش هما!

مينفعش أغلط!

كُن بنفسك رحيمًا.. وتفهم زلها كل حين وآخر..

ما دام قلبك يتذكر ويندم.. فأنت لا تزال بخير

الثقة بالنفس مبنية على إنك يبقى عندك حرية التجربة.. مع الثقة في إنك لو
غلطت مش مشكلة.. هتقوم وتكمل..

بس المشكلة.. إنك جواك لما بتغلط بتموت نفسيًا!!

لما بتغلط بتحس بوجع رهيب جواك.. بيملاك لدرجة تجمدك في مكانك وتبقى
مش عارف تتصرف!

شعور رهيب بالخدلان من نفسك.. من اليأس إنك عمرك ما هتتصرف صح..

بتحس هو ازاي أغلط كده.. جلد ذاتك ميكونش ليه حدود.. وبتحس إن مفيش
أمل.. والطريق كله بقى قدامك مسدود..

كل لما بتغلط.. نظرتك لنفسك بتزيد سوء..

بتحس إنك فاشل.. وبتسمي نفسك بأسوأ الصفات والمعاني..

جواك شعور إنك متنجحش.. وفي نفس الوقت بدل ما تقوم وتتحرك وتصلح
غلطتك.. تانيب ضميرك بس بيزيد!!

الخدعة:

فهمونا وإحنا صغيرين إن تأنيب الضمير معناه إن ضميرنا صاحي.. إنسان
مسؤول واعي لتصرفاته.. بس بالممارسة اكتشفنا إننا مش عارفين نعيش
بتأنيب الضمير!

ما الإنسان ما دام بيحس تأنيب الضمير يبقى كده هو مسؤول..

ولو هو حاجة صح.. ليه مش بيحس بسلام نفسي؟!!

وكان لما تأنيب ضميرك تبقى عملت اللي عليك تجاه نفسك.. وكأنك مستنكر
ازاي تعمل غلط!

فتبدأ تلومها زيادة وزيادة..

كانك كده ربّتها بشكل كفاية عشان ترجع تحس بقدره تاني إنك تعيش بعد
غلطتك..

بس الحقيقة أنت حبست نفسك أكثر.. هزيت ثقتك في ذاتك..

فيه حد يثق في شخص بيغلط ووحش كده؟

عندما ترفض مبدأ «الوقوع في الخطأ» تهتز ثقتك في ذاتك.. فمن يضمن لك
دوام الصواب!

تأنيب الضمير مش بيفيد.. تأنيب الضمير يعتبر المسكن عشان تقدر تتعامل
مع مشاعر الغضب الشديدة اللي مالياك بسبب الغلط أو الفشل.. غضب
بتغلقه خيبات الأمل المتكررة.. والإحباط اللي مالوش حدود.. وممكن خوف
من نتيجة الغلط.. لأنك بتكون مقتنع إن مفيش أمل.. فبتتחסر!

أنت بس في وسط مشاعرك المتداخلة المرهقة نسيت إنك..

طبيعي جدًّا إنك تحبط..

طبيعي جدًّا إنك تتكسف من نفسك..

طبيعي جدًّا إنك تغضب..

ومفيش حد بيغلط ومبيحسش بإعصار الخوف الشديد..

الشيء الوحيد اللي بينجيك من كل المشاعر المحتدّة دي.. هي إيمانك في
ذاتك.. إيمانك إنك تقدر تفعل مميزاتك وقدراتك بشكل أفضل.. وإيمانك إن
في الدنيا السنة الكونية إن مهما وقعنا ممكن نقوم نقف.. مهما غلطنا ممكن
نراجع نفسنا.. مهما أذنبنا ممكن نستغفر.. ربنا خلقك معاك فرص كتير عشان
تقدر تعيش صح.. وعشان تقدر تعيش صح.. هتغلط وتقوم..

لا تجعل ذلك سجنًا يُلازمك مدى الحياة.

عارف أول قصة في القرآن حكّت لنا إيه؟ حكّت لنا عن سيدنا آدم.. خليفة الله في الأرض.. اللي رغم إن نسله ممكن يحققوا فساد كبير في الأرض.. برضه ربنا سبحانه وتعالى اصطفاه وأسجد الملائكة له وعلمه من لدنه علما.. فكرمه.. وخلقه بيديه سبحانه!

وأول حاجة حصلت إيه بعد خلقه؟ سيدنا آدم «زلّ».. رغم كل مسيرات الأمور.. وكل نعيم الجنة.. وسيدنا آدم زل أمام شجرة الخلد!! أمام افتراض زلّ.. رغم إن كل اللي حواليه بيديّه قوة إنه ميزلش..!

وتأيب الضمير أكبر خدعة انخدعناها في حياتنا..

وده يعلمك إيه؟

أنت إنسان.. ربنا خلقك قوي.. خليفة الله في الأرض ودي قيمتك الثابتة.. بس برضه خلق فيك الضعف اللي ممكن يخليك تغلط وتزل!!

هو ده التوازن عشان تقدر تعيش بشكل صح على الأرض.. أنت قوي جدًا عشان وراك مهمة السعي.. وأنت ضعيف جدًا عشان تسمح لنفسك بالغلط والسهو والراحة القليلة فتستمر بقوة أكبر.. وعشان متعتمدش بس على قوتك فتنسى اللي اذكّ القوة وقدرك!

تقبل مشاعر الإحباط المؤقتة التي تشير لك أن هناك مشكلة ما تحتاج إعادة النظر فيها.

أنت محتاج مساحة حريتك إنك تجرب وتحاول وتتعرض للفشل والغلط.. عشان حاجة واحدة.. عشان تحسن من نفسك وتبقى أحسن صورة منك فتقدر تنتج بشكل أفضل..

لأن ضعفك سر قوتك.. منه بتتعلم بالظبط حدودك وقدراتك واستطاعتك ونقط ضعفك وعيوبك اللي محتاجة إدارة.. واللي لو مغلطش مش هتشوفها وهتبقى ممكن شيء مؤذي في طريقك ليك وللآخرين.. وأنت مش مدرك عشان فضلت متصور إنك مبتغلطش {إِنَّمَا أُوتِيتُهُ عَلَىٰ عِلْمٍ عِنْدِي}.. فالغلط بيحي يصوبك.. ويخليك تتواضع لله.. ومنتغرش بعلمك وقدرتك..

أنت محتاج تؤمن إن كل غلط ممكن يتصلح بثقتك في نفسك واستطاعتك من خلال مرونة التعلم والتصويب.. لأن الشيء الوحيد اللي بيمسح الغلط.. إنك تتصرف صح بعده «وَأُتِيعَ السَّيِّئَةُ الْحَسَنَةَ تَمَّحُّهَا» (حديث شريف).

الحساب الصح

١. تقبل الخطأ.. وده هيجي بتقبل المشاعر المؤلمة اللي بتحسها بشكل مؤقت عشان تقف لنفسك وقفة حساب صحية.

٢. محاسبة النفس.. ليه غلطت؟ وأقدر أعمل إيه عشان مغلطش تاني..

٣. حاول تنجز شيء إيجابي يولد جواك مشاعر قبول.. وتنفذ خطوات حقيقية لإصلاح الغلط..

مهم أوي إدارة الوقوع في الغلط.. عشان «الكسوف من النفس» كفيل إنه يكسر شعورك بالقيمة.. فبالتالي هتختل رؤيتك لنفسك ولقدراتك..

لما تتقبل ألم الوقوع في الخطأ.. وعقلك يتحرر من شعور العجز بسبب الخطأ للتركيز على الحل.. ساعتها بس هتقدر تتحرك لقدام..

هتلاقي نفسك قادر تستعمل مميزاتك عشان تدير بيها عيوبك.. هتقدر تصلح من عيوبك باختيارات أحسن تخليك تاخذ خطوات أفضل..

اسمح لنفسك إنك تغلط.. حاسبها على الغلط.. وصلح.. وكده يبقى تمام.. عداك العيب.

الباب الثالث

العلاقة الصح

البداية لصحتها بيدك أنت.. لا بيد غيرك.

يعني إيه علاقة صحية؟

شكلها إيه العلاقة اللي متهزّش سلامك الداخلي؟

العلاقة الصح علاقة بتنور الروح.. بتغذيك وتساعدك تبقى أحسن صورة من نفسك..

هي إطار بيجمع شخصين بما يسمح بانفرادهم وتميزهم واختلافهم.. بيخلق مساحة مشتركة ما بينهم.. فيقدروا يولدوا مجموعة من التصرفات الخاصة بيهم هما الاتنين بتميز أسلوبهم في الحياة سوا عن أي حد تاني..

المقاييس لعلاقتهم استثنائية بانفرادهم فيها.. وبتنتج بناء على طريقة تفكيرهم وعلى احتياجاتهم.. والجميل إن يحصل نوع من أنواع التكامل بينهم.. وبتبقى المساحة اللي بتجمعهم مساحة مريحة ليهم.. معبرة عن علاقتهم سوا وبس..

جوه المساحة دي المفروض إن فيه مشاعر الدفء والأمان والطمأنينة.. جواها تقبل.. تفهم.. استمتع.. ورؤية للذات بشكل ينميها..

لما تشوف غلطك في عينيهم تشوف الغلط بشكل يساعدك تصلح منه.. ولما تشوف مميزاتك في عينيهم تحس بسعادة عشان شافوا فيك اللي أنت تحب إنه يظهر منك..

بتلاقي علاقتك بيهم مليانة وضوح.. مفيش مجال للتساؤلات.. لما تحس بعدم ارتياح لحاجة حصلت بينكم تقدر تتكلم فيها بسهولة معاهم.. لو اختلفتم الاختلاف بيوصلكم ببعض مش بيبعدكم..

بتبقى علاقة متينة أوي.. تحس جذورها بتمد في الأرض كل يوم.. الألفة اللي بتتولد ما بينكم.. الوقت اللي بتقضوه سوا في راحة واستمتاع وتحرر من كل قناع.. بيخليها كل يوم تكبر عشان بتسمح ليك وليهم بالوجود بوضوح من غير تزييف.. محدش فيكو محتاج يلبس دور يبسط الثاني..

مفيهاش لوم وعتاب يخنق.. فيها تواصل صحي وتقارب لوجهات نظركم عشان تعيشوا بشكل يريحكم مع بعض..

مفيش حاجة بتبقى مية مية جميلة ومريحة.. بس أهم علامة أنها متبقاش علاقة ضاغطة علينا.. ولا متعارضة مع مسؤولياتنا.. ولا تحسنا بتقصير يستنزفنا.. ولا بتهدد أننا نكون نفسنا..

علاقة فيها سعة تسمح أننا نتغير جواها للأحسن.. وتغيرنا مياثرش عليها.. فيها مساحة مرنة جدًا لذواتنا المتغيرة على مدى السنين.. لأن بيجمعنا الوضوح ومحاولات التكيف والتقبل والتفهم.. وإعادة خلق المساحة اللي تخلينا نقرب على مدى السنين منبعدش..

إحنا من كتر اعتمادنا على وجود العلاقات بنتحوّل لناس مش عارفين نعيش لوحدها.. بنحس برضه إن الحياة مستحيلة من غيرهم.. فعشان كده محتاجين نلاقي طريقة للاستغناء الصحي.. اللي يخلي وجودهم زي ما اتفقنا إضافة جميلة بتسعدنا.. ولو لأي سبب مش موجودين نقدر نتحرك ونكمل.. لأن حقيقة الحياة أننا الواقع الأساسي.. والباقي كله بيعدي علينا.. مش أساس..

خلي بالك أنت إنسان ربنا خالق فيك احتياجات كثير.. المشكلة كلها إن العلاقات بتبقى مصدر أساسي لتلبية الكثير من الاحتياجات.. فده بيبدأ يدخلنا في مرحلة «عوز» مجهدة لينا وللطرف الآخر..

الاحتياجات اللي بقدر أشبعها بنفسي بشبعها.. عشان لما الطرف الثاني أقابله أبقى مليون وشبعان، فيبقى أي إضافة بيضيفها ليا.. بتسعدني.. مش بتملاني!!

فاضي من جوه

ذاتك أحق ببناءك المستمر..

فمنها تستطيع أن تنطلق لترسم تفاصيل الحياة دون الشعور بوجع الاحتياج..
إن لم تملأ نفسك.. فلن يملؤك أحد قط..
إحساس صعب جدًّا لما تلاقي نفسك على طول محتاجة للي حوالها.. محتاجة
اللي يبسطها.. اللي يطمئنها.. اللي يسندها ويشجعها..
لما بتحس بضعف بتفضل تدوّر على أقرب الناس عشان يساعدوك تقوى..
وبتلاقي معاني الخذلان وخيبة الأمل بتتكرر عليك.. فبتزيد ضعفك ضعف..
احتياجك للناس مالوش آخر.. ودايما مش بتحس إنك واخذ احتياجك للآخر..
وتبدأ الأسئلة اللي إجابتها بتقلل منك تدور في مخك.. وتكسر في قيمتك..
وشعورك إنك مش مهم ليهم..
والوجع بيفضل يجيب وجع.. لغاية ما تحس بغربة ومتبقاش قادر تتعايش
معاهم..
إحساس الرفض بيحرج أوي.. بيخليك تحس إنك بتهون أوي عليهم.. فتبدأ
تتعزل وتحس بوحدة..
ونفضل نلف في وجع مستمر من إحساس للتاني.. وأحاسيسنا المؤلمة تمنعنا
نقوي علاقاتنا.. وتبعدنا أكثر عن الناس..
ودي مشكلة الروح لما تعتمد بس على البشر!!
محتاجين نتحرر من احتياجنا للناس.. بس المشكلة هما مصدر من المصادر
الأساسية اللي بتخليك مبسوط ومرتاح..
عشان كده محتاج تشبع نفسك أوي.. عشان مبيقوش هما مصدر الأساسي
للي بتحتاجه..
خلينا نتفق أننا مش بنكون واعيين أصلًا لكل احتياجاتنا.. وأن احتياجاتنا أصلًا
متغيرة مش ثابتة.. بس بنقدر نميز إيه أكثر احتياج مطلوب في الفترة دي لما
بنحس بالم جوانا عشان محتاجينه.. زي بالظبط الإنسان لما بيحجوع عشان
جعان.. فإحساس الجوع هو اللي عرّفه إنه محتاج دلوقت ياكل!
النفس عاملة زي العربية اللي بتسوقها عشان توصلك لطريقك.. مش
معقولة هتفضل بس تملأها بنزين كل ما يخلص عشان ده أهم سبب بيحركها؟
وتنسى بقى باقي الصيانة الخفية المطلوبة عشان العربية تكمل معاك
المشوار.. كل ما بتنسى تصون باقي احتياجات العربية.. كل ما بتقلل في
عمرها في الطريق وتخليها تعطل أسرع..

عشان كده الإنسان الذكي بيقدر يراعي العربية ويراقبها كويس ويشوف كل أجزاءها ماشية كويس ولا محتاجة تعديل وإصلاح.. وبينتبه لأقل صوت بيصدر من العربية عشان بتبقى علامة إن فيه شيء ممكن هيعطل..

اعتبر الوقود هو كل شهواتك.. من أكل وشرب وراحة وأمان وحب وعلاقات.. كل المجموعة دي مجرد وقودك عشان تقدر تكمل.. بتديك شحنة وطاقة تتحرك.. بس متديهمش مساحة أكبر يا إما هتلاقي نفسك بتلف في دوامة.. الاحتياجات دي فيها شهوة عالية داخلية.. ولو متعاملتش مع نفسك بشكل حريص في أخذ الاحتياجات دي ممكن تقع في إدمان من كتر إسرافك لحاجة منهم..

فأماً نفسك من المعاني دي بس بشكل التسديد.. اللي هو بتأخذ لقميتين أكل عشان بس تقف وتتحرك.. متقعدش شاغل مخك بالأكل طول اليوم.. هتعتل!

الاحتياجات اللي فعلاً لما تملأها بترتقي بيك هي اللي ممكن تكون مختفية جواك فمش بسهولة تلاحظ إنك محتاجها.. لأن احتياج البنزين بيكون طاغي على تفكيرك.. بس المهم إنك تعرف إن لما بتملأ باقي الاحتياجات بتقدر تخفف انتباهك على الشهوات اللي مخلياك تعبان مهما أخذت منها.. وبتديك السلام النفسي الحقيقي من جواك.. لأنها بتعزز شعورك بالقيمة الذاتية.. وبتعزز شوفانك لقدراتك وتقديرك لاستطاعتك..

احتياجك للمعرفة وسعة الإدراك.. احتياجك للجمال.. احتياجك لتحقيق خطوات في اتجاه هدفك.. احتياج لوجود ربنا في حياتك.. واحتياجك إنك تملأ نفسك بنفسك..!

محدث يملك غيرك.. تبقى واعي أوي للمعنى ده.. تخيل قلبك ده كوابية.. عمال تملأها برؤيتك لنفسك اللي مليانة تقدير واحترام وامتنان للمميزات.. عمال تملأها تقبل وتفهم لكل نقطة ضعف فيها فبتشجعها وبترحمها لما طاقتها بتخلص..

احتياجك إن أفرطت في إشباعه توخّش.. وإن سدده بتوسط هدأ وسكن.

عمال تحقق لها استمتاعها بكل لذة أو شهوة متاحة وتنفعك.. بس في نفس الوقت بتتصرف مع نفسك بحزم لما تطلب أكثر عشان عارف إن الإسراف مش من مصلحتها.. هيشتها عن إدارة نفسها صح.. ويخليها تغرق في طلبات مالهاش آخر.. النفس تعشق المزيد من اللذة.. حتى لو اللذة دي آخرها هلاك.. فمحتاجة منك تركيز ووقفة في الوقت الصح متديهاش أكثر من احتياجها..

عمال تثقفها وتوسّع مداركها.. وتوسع نظرتها للحياة.. وبتجتهدها تتبنى المفاهيم الصّحّ الّلي بتساعدّها تعيش بشكل أريح..

بتجتهدها في أنّها تبقى أحلى صورة منك.. بتكتسب طول الطريق كل معنى يضيف لشخصيتك.. وبتعرف ازاي تداري عيوبك بحيث جمالك يظهر.. وبتستعين بربنا لما تحس بتشتت أو ضعف.. ومتوكل عليه حتى في قوتك..
كده أنت كوبايتك مليانة(7).. وبايدك أنت..

منتظرتش حد يعملك أي شيء.. أنت كنت بتتحرك وتسعى عشان تدي نفسك كل معنى.. فتمليت بشكل مشيع..

هيفضل احتياجك للناس جزء لا يتجزأ من تكوينك.. بس دلوقت أنت رايح مليون جدّا.. رايح مثبت صورتك لنفسك.. حاسس بقيمة عشان اهتمامك بيها خلاك تحس أوي إنك غالي.. وعارف قدراتك عشان منتبه تحسن من نفسك وتشجعها لما تقع عشان تقوم من تاني.. كده أنت جاهز تستثمر في علاقاتك.. وبقيت جاهز تستقبل من العلاقات احتياجاتك فتضيف ليك..

كوبايتك لما تبقى فاضية بتحتاج كمية كبيرة جدّا من عطاء الّلي حواليك ليك عشان تتملي.. فبتفضل جواك معاني سلبية كتير بسبب الّوجع من النقصان فيها.. الألم بيقولك إنك محتاج أوي.. فتبدأ تحمل العلاقات بعبء احتياجاتك.. وبتنسى إنهم كمان بشر ساعات بيقوا فاضيين.. مضغوظين.. مش في كل وقت متاحين لينا ولاحتياجاتنا.. فده من أهم أسباب عطلة العلاقات.. إنك مفعول به منتظرهم هما الّلي ينجدوك..

ومن مشكلات إنك تبقى فاضي منتظر من الآخرين إنهم يملوك.. إنك بتبقى عرضة لدخول علاقات غلط في حياتك.. يدخلوا يملوك أوي في البداية وبعدين لما الدنيا تستقر ويرجعوا تاني لحياتهم.. بتحس بالوجع من جديد.. مصدر احتياجك اختفي!!

وكتير بيتأدوا بسبب إنهم معتمدين على الآخرين عشان يعيشوا مرتاحين.. فممكن يتم استغلالهم من نقط ضعفهم واحتياجهم.. فتتعلق وتدمن وجودهم.. وممكن تبدأ سلسلة من التهديد النفسي والألم الرهيب.. بسبب إنك منتبهتس وسبيت نفسك لغاية ما البحر جرفك في الدوامة..

لما كوبايتك تبقى مليانة.. كل نقطة بتتحط زيادة فيها من غيرك بتحس بيها أوي جواك وبتقدرها.. لما بتكون فاضية النقطة بتضيع مش بتحس بوجودها!

مقدرش أعيش لوحدي

لا تقف على خذلان البشر لك وقت ضعفك..

فقد يشاء الله أن يصطدم ضعفك مع ضعفهم..

فتتعلم فن الاستغناء وبذاتك تكتفي..

إحساس الخوف من الوحدة من أكثر المشاعر المؤلمة اللي بتخلينا بنفزع وندور على علاقاتنا عشان نحس بأمان وسطيهم.. والخوف من الوحدة ممكن يخلينا نصبر على علاقات مؤلمة بس في سبيل وجودهم..

وفيه ناس من كتر الخوف بيحسوا بعجز إنهم يقدروا أصلاً يعيشوا لوحدهم..
بيحسوا لو أصبحوا لوحديهم ده كأنه إنذار بالموت وهما على قيد الحياة!!

الهروب من شعور الساقعة الزائدة من غير الونس ودفا الناس اللي بنحبها..
القلق الدائم من الفقد والهجر.. اللي بيخلينا كتير نيجي على نفسنا عشان
نفضل محافظين على وجودهم..

فتبقى كل دوافعنا في علاقاتنا للحفاظ عليها.. الخوف من فقدها!

فبدل ما نحط طاقتنا أننا نستثمر فيها ونرعاهها.. طاقتنا كلها مستنزفة في
الخوف من شبح الوحدة من دونهم.. فلما يكون ده الدافع.. بتلاقي التنازلات..

العطاء الغير صحي اللي يبسحب من روحك عشان مش بيملاك.. بتلاقي
الشك في نفسك أحسن تكون أنت اللي غلطان.. فسلسلة من لوم الذات
وتأنيبها أنها المفروض تحافظ على اللي بتحبهم بشكل أحسن..

كلها معاني مؤلمة.. ومشاعر بتسجنك.. بسبب إنك على يقين إنك متقدرش
تعيش لوحدهك!

طبيعي جداً أننا محتاجين للناس.. ربنا خلق لسيدنا آدم زوجة عشان يأنس
بيها.. دي سنة الحياة.. وجود الناس تدعمك وتصبرك في الطريق.. والرسول
صلى الله عليه وسلم كان أبو بكر الصديق رفيق رحلته.. وأفضل الناس بعد
الأنبياء أصحاب الرسول.. هما سبب الصبر في الحياة.. سبب الراحة.. سبب
الطمأنينة الحقيقية..

بس نظبط استقبالنا لوجودهم عشان جهازنا لو اتشوشر بيحولهم من مصدر
راحة لمصدر تهديد نفسي مستمر.. مين ده اللي يقدر يفضل عايش قلقان
أحسن يبقى من غيرهم!!

عشان كده مهم أوي تظبط نظرتك لنفسك.. محتاج تعرف إنك فيك كل
مقومات الإنسان اللي تؤهله يعيش في أي ظروف وتحديات... بس اللي
هيقدرك هو مدي شوفانك الصحي لنفسك زي ما قلنا.. عارف قيمتك وواثق
في قدراتك.. فباي شكل هتتحط فيه هتقدر تعيش وتتحرك..

إحنا اللي بندّي الناس اللي حوالينا المعاني دي عشان مش مطبطين جوانا
رؤيتنا لحيزهم من الوجود في حياتنا..

بنحمل العلاقات معاني الاعتمادية.. فبنخنق الناس وبتخنق معاهم.. عارف زي
بالظبط كأنك راكن عربيتك وطالب من عربية تانية طول الطريق تقطرك!!
بقينا حمل عليهم.. وبقينا حمل على نفسنا.. تعبنا من كتر الألم بسبب معاني
هي أصلاً أساسها وهمي.. عش عنكبوت وصدقنا إنه سجن حقيقي.. بضربة
واحدة تقدر تهده.. ضربة واحدة لفكرة إنك متقدرش تعيش لوحدك.. تقنع
نفسك بأنك تقدر..

وعشان تثق في الفكرة الجديدة محتاج توظفها في حياتك بحيث تساعدك من
ناحية تكمل امتلاءك فتبقى مش عبء على حد ومن ناحية تانية تساعدك
تقوي نفسك من غير اعتمادية كاملة على وجود الناس!

مفهوم الاستغناء مش معناه أبدا أننا بنعزل عن الناس ونبقى مش
محتاجينهم.. مفهوم الاستغناء معناه إنني أقدر أعيش معاك ومن غيرك..
عشان محور الحياة هو إدارتي لنفسني أنا.. ده اللي بإيدي اتحرك بيه.. ده
الثابت.. لكن هما متغيرين.. ومش على طول موجودين..

فعشان كده الصح الوقاية لقلوبنا أننا نعيش كأننا لوحدنا.. فلما يوجدوا ننسب
بوجودهم من غير إلحاح الاحتياج والشعور بالافتقار للبشر..

عشان تقدر تحقق مفهوم الاستغناء بشكل صحي.. بتبدأ أول حاجة بأنك تملأ
كوبايتك زي ما اتفقنا.. فيبقى وجودهم إضافة ليك مش أساس..

ومحتاج كمان تحقق مفهوم العزلة الشعورية.. اللي هو أنت عايش بتتحرك
من فكرك ومشاعرك.. جواك عالم خاص بيك بتدخله بالتأمل والتفكير..

عندما تمتلئ من الداخل.. لن يصبح رضاك مرهونا بما يقدمون.

لما بتحقق فكرة إنك منفصل عن الآخرين نفسياً.. وإن إدارة نفسك دي
مسؤوليتك أنت.. إنك تسمعها.. وتقيم تفكيرها.. وتهذب مشاعرها.. هتحس
بصفاء نفسي في الحياة مع نفسك.. بقى في بينك وبينها تناغم ودرجة عالية
من الفهم.. لأنك بطلت طريقة الهدم والخناق مع روحك.. بقيت بتعرف
تشوف مميزاتك وتشجع نقط ضعفك عشان تقويها.. وكل ده بيتحرك جُوه
عقلك كل شوية.. عشان تقدر تدير علاقاتك مع الناس صح..

عزة نفسك كلها في استغنائك عن الناس.. أنت موجود ليهم لأن العطاء
الصحي جزء لا يتجزأ من مشاعر الرضا جواك.. بتديهم عشان ده بيسعدك

وبيحسبك بأهميتك ودورك في المجتمع.. مش بتديهم عشان تاخذ منهم..
فحتى لو كوباتيم ناقصة أنت مركز في نفسك وبس وإيه اللي عليك تعمله..

وفي نفس الوقت مش معنى إنك مستغني عن الناس إنك مش هتطلب
مساعدهم لما تبقى مليون.. طبيعي جدًا إنك برضه محتاج للي حواليك..
ساعتها هتبقى بتطلب احتياجك وأنت مرتاح.. عشان لو اترفض أو حصل له
تجاهل أنت مليون كفاية عشان تستحمل.. ومدرك كويس أوي إن الناس
قدرات وممكن ميكونش في وسعهم تلبية طلبك دلوقت..

بس المهم إنك تفهم إن مفهوم الاستغناء مش معناه أبدا انعزال حقيقي.. ولا
معناه ما أطلبش حاجة من حد.. بالعكس ربنا خلقنا بنكمل بعض.. وبنكمل
بعض دي معناها إن قوتهم تصب في ضعفك.. وقوتك تصب في ضعفهم.. بس
المهم لما يدوك يلاقوك مليون.. مش فاضي..

فبكده باني أملني نفسي.. وأحس بقدرتي على أني أعيش وحدي.. محتاج
أعمل توازن وأتعلم أحافظ على حدودي.. وأصغر فواتيري.. وأبني بقية
المفاهيم اللي بتبني عليها العلاقات الصحية عشان بتسد كل ثغرات إن
العلاقة تتحول لعلاقة مرهقة..

صغر فواتيرك القديمة

ليس عدلا أن تُلبس هؤلاء أثواب آخرين سبقوهم!

تعلّم أن تعيد العداد دوما إلى أصفاره..

بنفضل عايشين بآلام الخذلان.. بوجع الفراق.. بخيبات الأمل.. بنخرج من
علاقات وندخل علاقات مُحملين بأوجاع صعب حد يتحملها..

جوانا خوف من الفقد.. جوانا إحباط من كتر خيبات الأمل.. جوانا غضب من
حقوقنا اللي اتهدرت..

جوانا جروح هزت رؤيتنا لنفسنا وزلزلت ثقتنا في نفسنا.. وغيرت من شكل
روحنا.. وخلتنا نسخة من الأذى اللي اتأذينا.. كحماية لذواتنا بنعامل علاقاتنا
الحاضرة بنفس تعامل المؤذي في الماضي!!

الملفات كتير في منها من الطفولة.. لما بيلمس مع الواقع بيتفتح ويسبب لنا
آلام نفسية رهيبه.. اللي هو مش ذنب الإنسان اللي في حياتك دلوقت أبدا..
لكن ذنب ملف قديم مدفون جواك محاولتش تنصفه عشان تكمل حياتك..

وللأسف علاقاتك كلها هتفضل متأثرة بوجعك القديم لأنك محبوس فيه..
متحررتش..

فبقى كل شخص جديد يدخل حياتك يحاسب على فواتير شخص ثاني..
وحلقة الأذى منهم ليك.. تتحول منك ليهم.. وبقى الموضوع بيلف ويدور..
ويؤذي ناس ثانية في الطريق..

وكل ده عشان لما اتأذينا مكنناش واعيين لحدودنا النفسية، ومصرفناش الألم
بشكل صحي يخلينا نقدر نتعلم من وجوده بدل ما نشحن أفكار سلبية
لمشاعر مؤلمة مش عارفين نتعايش معاها..

ومن كتر الألم يفضل العقل يبني في أسوار.. ويبني في معاني كحيل دفاعية
يحميك بيها من الأذى ثاني.. بس للأسف بتدافع عن نفسك مع الشخص
الغلط.. وبالطريقة الغلط.. اللي تخلي علاقتكم مرهقة مش صحية..

فكل ما تدخل في حياتك علاقة جديدة.. بتحس بضياع!!
من شدة ألمك من القديم.. أصبحت مش بتحس بأمان أبدا في العلاقات
الجديدة..

الضياع اللي القلب يحسه كل ما الدنيا تتغير حوالية بيكون صعب جداً شرحه
للناس.. بالذات إن مشاعرك بتكون كلها نابعة مش من موقف ما.. أنت بس
لما بتتعرض للتغيير فيه حاجة جواك بتفتح على كل مشاعر الخوف والقلق
والترقب وفقدان الحافز والشغف.. بشكل أنت شخصيا مش فاهمها..

أمان على الجاهز

ممكن يكون محيطك جميل.. والناس فيه بتدعمك.. والكل يتمنى لك الرضا..
وانت من جواك ضايع.. مشنت.. مفزوع.. زي ورقة شجر الريح بتنقلها من
مكان لمكان حاسس إنك مش لاقى جذور تمسكك ف الأرض.. ولا قادر تحس
بانتماء..

زي الطفل لما بتضيع عروسته ويفضل يعيط رغم إن مامته جنبه.. معاني
الأمان اللي اتغيرت مش قادر يعوضها.. التغيير عامل زي البعع اللي خايف
منه رغم إنه مش شايفه.. صعب إنه يقدر يتقبل التغيير من غير ما من جواه
يحس بأمان..

والأمان اللي محتاجه محدش هيفهمه.. مش لازم يكون مرتبط بشخص.. هو
مرتبط بحالة.. حالة محددة من الدفء.. من مكونات مع بعض بتحسسه
بالهدوء..

وعلى قدّ الوجع.. على قدّ الرعب.. على قدّ ما أنت حاسس إنك مش واقف
على أرض ثابتة.. على قدّ ما أنت متأكد إنه شعوره مالوش علاقة بالواقع..
وانك تطمن نفسك على الشيء اللي خايف منه ومش مفهوم..

واللي بتكون مش متصوره أبدا.. إنك مش خايف غير من نفسك..

مش خايف غير من ثقتك وكفاءتك في إدارة التغيير.. البعيع هو نفسك من جوه.. هي مش بتقبل التغيير فيتصرخ وبتعطلك تتحرك.. رغم إن الحياة ورتك كثير.. الحياة علمتك التكيف والمرونة.. علمتك قوة التحمل والصبر.. علمتك إنك تقدر تخلق أمانك بفكرة تريحك..

لكن نفسك عايزة تفضل مرتاحة في النقطة اللي اتعودت عليها.. مش عايزة تبذل جهد ولا تتعب.. عايزة أمان على الجاهز..

الفواتير القديمة

المشكلة الثانية إنك لما بتحب شخص جديد.. الفواتير القديمة بتخليك راسم له تصور في ذهنك.. وبتفضل تحاسبه عليه!!

عندما لا تتحرر من آلام التجارب الماضية.. ستنتظر للحاضر من خلالها.

لما بتحب شخص.. بتعيش معاه في عقلك سيناريوهات من الحياة.. بتجسده بكل الصفات اللي قدرت تعرفها عنه من خلال تعاملكم..

وبيفضل عقلك يحلل وياخدك ويجيبك في زنقة من الافتراضات زنقتها لنفسك.. بسبب إنك مدّي عقلك معطيات قليلة متكفّيش كمّ الاحتمالات اللي ممكن تسبب تصرفه وياك في الواقع.. وغالب الافتراضات من كتالوج قديم معدش يصلح للتعامل في العلاقة دي.. مش مناسب لحقيقة تفرد الشخص اللي معاك!

فلما تزعل منه.. تتخانق مع صورته الذهنية اللي أنت رسمتها له أصلاً من كام معلومة.. وعقلك يقفل على الخناقة.. فبتبقى عايز تتواصل وتفهم منه تلاقي نفسك بتتخانق.. ما أنت يا مسكين مشحون أصلاً من اللي مرسوم ف عقلك!!

عشان كده من أكثر الأسباب اللي تنجّح العلاقات بين الناس حقيقي أننا نفكّ من صورنا الذهنية عنهم.. نفكّ من تصورنا لشكل اهتمامهم.. نفكّ من إننا بنبي أدلة متوهمة من عقلنا لتحليل لكل تصرف ليهم..

مش منظورك أنت..

هتقول لي طب أجيب أدلة منين أنبي بيها تصور واقعي أقدر أقيّم بيه؟

الحل بيكون في التواصل المباشر.. السؤال بوضوح.. رؤية الحياة بمنظوره هو مش منظورك أنت وبس.. تحط نفسك مكانه وتحاول تشوفها فعلاً بعينه هو

وبس..

تقبل إن الناس بتعبّر بشكل مختلف.. الناس ردود فعلها مختلف.. الناس تقيّمها للظروف مختلف..

متلزمهمش بمسطرتك وبس..

متزنقهمش في قالب من تصورك ضيق أوي أوي على حقيقتهم..

خلي علاقتك بيهم ترسم صورتها الخاص بناء على تجاربكم الحقيقية..

اكتشف الناس بناء على تعاملكم اتو مع بعض.. مش بناء على تصورك القديم عن شكل التعامل اللي في علاقة زيكم.. ولا من عقدة قديمة مأثرة ف حياتك..

متخلّوش الناس تحاسب على فواتير غيرها.. كل علاقة منفردة في جمالها.. وحقيقي لو عرفنا نصقّر العداد وإحنا بنتعامل مع العلاقات.. وأخذناها خطوة خطوة.. لحظة بلحظة.. هنتفاجئ إن بسهولة بنقرب.. عشان العلاقة اتحررت من أشباح قديمة كانت بتبعد بينكم.. مش بتقربكم..

بنبي على الواقع.. نسأل بوضوح.. نفترض حسن الظن.. نقرب لبعض بشكل يناسب الوقت الحقيقي اللي قضيناه سوا.. مش بناء على إحساسنا عن مدى قربنا عشان حسينا بدفء معاهم.. خلي الدفء يتولد في الحقيقة.. متفرضش على العلاقة الدفا قبل ما تشوفوا واقع..

فلما تحس بمشاعر فياضة من الوجد.. على موقف ميستاهلش.. افهم أنها فواتير قديمة بتدفع في اللحظة.. أوقات مخلصتش فيها حقوقك.. فبتنادي إنك تخلصها في لحظة متستاهلش..

متخافش إنك خايف.. فالخوف يزيد..

متقلقش إنك قلقان ومشتت فالقلق يقيدك..

وافق على الحالة اللي مش مفهومة.. إدّي نفسك راحة من التفكير والتدبير.. وسيبها شوية تمشي لوحدها.. لغاية ما نفسك ترمي بجذور جديدة في الأرض وتبني معاني جديدة بالتغيير.. فتلاقي خلفية الأمان اللي منها بتتحرك ومنها بتحس بقوة تحقق أحسن قدرة وكفاءة لنفسك ولعلاقاتك.. المهم تبقى واعى أن محدش يحاسب على فاتورة حد

تاني!

مش هو وبس!

لا يوجد وقاية لذاتك من الألم..

سوى بعدم التعلق المرضي بمن حولك..!

مفيش حاجة ممكن توجع أكثر من شعورك بالتعلق بإنسان!

روحك بتتسحب منك بالبطيء.. بتلاقي كيانك كله ماشي عكس طوعك.. مش قادر تسيطر على ردود فعلك ولا قادر تشوف مسؤولياتك..

بتبقى الحياة كلها مرسومة على كلمة منه.. على ابتسامة..

ولو في يوم اتضايق.. مبتقدرش ترجع تاني تعيش إلا لما تلاقيه كويس وترجع تضحكوا تاني..

طاقتك كلها معتمدة على جرعة من وجوده!

لما يبعد.. بتبقى مش قادر تتحرك.. ولا عايز أصلاً تعيش!!

كل حاجة في الدنيا بتفقد لذتها من غيره..

وطبعا درجة التعلق بتتفاوت من إنسان للتاني.. بس الغالب هيحس ببعض من الأعراض دي لما يكون مهتم بإنسان ويبدور في فلكه.. ولو هو مركز معاه ومديه الأولوية لوحده في حياته.. أقل شيء هيحس بيه.. إنه معندوش حياة من غيره!! وأن وجوده معتمد تمامًا على وجود الشخص المتعلق بيه.. ومسمى التعلق حب!

معنى الحب

الحب توازن.. الحب عمره ما بيدخل يستحوذ عليك ويعطلك عن الحياة.. لأن الحب أصلاً هو الطاقة والحافز للحياة.. الواحد مبيعرفش ينجز شيء إلا لو خلق جواه طاقة حب ليها.. شعور بشغف عشان يقدر يكمل في خطواته وسعيه..

الحياة من غير حب بتبقى ضلمة وكئيبة جدًّا.. فازاي تتخيل إن الحياة بالشكل اللي وصفته ده حب؟ دي حياة مليانة ألم ووجع وعطلة وعدم إنجاز..

وبالتالي بتأثر جدًّا على رؤيتك لنفسك.. ورؤيتك لقدراتك.. لأن أصبح مرجعيتك لرؤية نفسك.. هو شايفك ازاي!! ولو هو مش موجود.. أنك تبقى مش موجود!!

وللأسف اللي بيخلي الحب يحذف على تعلق.. إطالة المرحلة الأولى منه.. والإسراف في التمتع والتلذذ بالمشاعر الملتهبة الأولى.. من غير ما يسمح بالانتقال لمرحلة الاستقرار اللي بتساعد إنه يكمل حياته بشكل متوازن..

فيبقى الحب مُسدد.. مش مشيع لدرجة التوحش!

معاني الحب جميلة.. المفترض أنها مليانة ارتباط صحي..

يعني إيه ارتباط صحي؟

يعني شخصين بيراعوا احتياجات بعض وفي نفس الوقت بيراعوا احتياجاتهم الشخصية من مصادر متعددة..

كل شخص له حياة متوازية مع حياة الثاني.. وليهم عالم ثالث يجمعهم سوا (وقت خاص بيقضوه مع بعض).. والاتنين ميسمحوش إن العالم الثالث يسحبهم من حياتهم ويستبدلها..

علاقة تكاملية.. بتسعدنا وتلبي جوانا احتياجات خاصة (زوج - أصحاب - أولاد - أهل) فببترتاح فيها.. بس مش بتسحبنا من حياتنا.. ومش بتستبدل باقي الناس ومش بنكتفي بيها عن باقي العلاقات.. علاقة بتسمح بالتوازن..

الحب الصحي ننمي ذاتنا فيه.. لا أن نفقدها.

ليه بتتعلق؟

أما التعلق فصورة غير صحية من الحب.. هو حب تملك أكثر من إنه يكون حب حقيقي.. صورة أقرب للإدمان.. وده بيحصل لما الإنسان يكون من جواه ناقصه احتياجات كتير.. فلما يصدق يحس بنشوة إنه أخيرا حد لبي احتياجاته وكمل نقصه.. فأصبح بيرتاح جدًا حوالين الشخص ده.. ومع الوقت أصبح هو مصدره للسعادة.. بقى عامل زي الثقب الأسود يسحب كل اهتمامك وكل حياتك وعلاقتك.. ويحولك لإنسان مش عارف تعيش غير حواليه.. ده ممكن يكون مش باختياره.. ممكن يكون بسبب إنه ملئ جواك فراغ كبير عشان أنت أصلاً مكنتش متوازن في تلبية احتياجاتك..

مدمن الحب

كلنا متفقين إن الشيكولاتة أكيد جميلة.. بنحبها بدرجة تختلف من شخص لآخر.. في ناس مالهاش فيها أكيد.. بس اللي بيحبوها بيعشقوها بسبب كم السعادة اللي بيحسوا بيها لما بياكلوها..

هل ينفع تبقى الشيكولاتة استبدال لباقي الأكل؟

هل ينفع أقول أصلي بحب الشيكولاتة فأعيش عليها بس؟

هو ده تقريبا نفس قضية أي مدمن للحب.. أو العلاقات!!

من كتر اللذة اللي بيحسها.. بدأ ميطلبش غيرها.. وكأن الحياة كلها بتقوم بس على لذته.. ونسي إن فيه مقومات للحياة من غيرها ميقدرش يعيش..

اللي هيفضل ياكل شيكولاتة.. هيموت من قلة الأكل اللي جسمه محتاجه..
ويمكن نفسه متهفّوش أبدا ياكل باقي التفاصيل اللي محتاجها عشان يفضل
عايش.. بس هي كده الحياة..

مش كل حاجة بنعوزها بتفيدنا.. ومش كل حاجة بنحتاجها بنحسها فبنلبيها
لنفسنا وإننا محبوسين في شوفان اللي بنستشعر فيها لذة رهيبة زي العيال
بس.. عايزين اللذة السهلة وبس.. ومش قادرين على شوية ألم ندير بيه
رغباتنا فناكل السبانخ المفيدة جدًّا بس مش عجبانا!

اللي بيعيش بس عشان يحصل اللذة.. بيكتب وفاة كينوته بإيده.. بيتحول
بالبطيء إنه ينسى روحه ويعيش بس عشان رغباته..

المدمن لا يكتفي مهما زادت جرعة الحب.

أنت بكده معطل عقلك.. وماشي ورا مشاعر بتجرفك لتحصيل لذة.. بتأذيك..
وبتأذي أقرب القلوب ليك!

أنت ناسي إن مينفعش تفضل عايش بتلف في فلك إدمانك.. إدمانك هيخلص
عليك..

لو أنت مدمن لعلاقة.. لحب.. لشهوة ما.. أول خطوات العلاج إنك تعترف إنه
إدمان.. اعترف إنه مش حق مكتسب ليك..

اخرج من دايرة انا كده.. وبس.. ومش عايز غيره وبس!

لا أنت أقوى من كده.. أنت معاك عقل لما تستعمله صح هتقدر تهذب نفسك..
هتقدر تدير احتياجاتك..

رتب قيمك صح

أنت محتاج تعلّي قيمة التوازن.. تعلّي قيمة التحكم في تصرفاتك وقيمة
مجاهدة النفس..

القيم يعني مجموعة من الأفكار اللي مقتنع بيها.. وعايز أعيش وفقًا لقانونها
في الحياة.. وظيفتها أنها بتبقى حاكمة على احتياجاتنا فبتدينا رؤية إيه اللي
مناسب لحياتنا وإيه اللي خارج منظومة قيمنا فيحتاج مجاهدة ومعافرة..

المشكلة لما الاحتياج بيتاخذ بزيادة.. بيعلى على القيم.. بيبقى هو الحاكم.. هو
الآمر الناهي.. بنفقد عقلنا يعني قدام اللي بنحتاجه.. الشهوة والهوى هما
سيدي الموقف دلوقت!!

عشان كده بحس إن ربنا سبحانه وتعالى أدار لنا احتياجاتنا بالفروض كمثال واقعي لتهديب النفس.. الصلاة بحسها تهذب احتياجاتنا للحربة.. ننتعلم فيها تنظيم الوقت.. الحج بيعلما إدارة الراحة وتهذيب الأخلاق والتحمل والمرونة.. الصيام بيعلما تهذيب الاحتياجات الجسدية.. الزكاة بتعلما إدارة الأمان المتمثلة في الفلوس والاحتفاظ بيها..

ستحدد إدارتك لاحتياجاتك وفقًا لمنظومة قيمك.

لما بنقوم بالعبادات دي إحنا بنتدرب بشكل عملي على تطبيق قيمة التوازن.. والتوسط في الحياة بين اللي عايزينه واللي المفروض نعمله.. لأن الحياة مش جنة بتقدم لنا بس اللي عايزينه.. الحياة مسؤولية واللي مش بيعرف يدير احتياجاته المسؤولية بترهقه وتعطله عن تحقيق أهدافه..

والقيم بنعلِّها بإيماننا بيها.. وإيماننا بيزيد بأننا نحاوط نفسنا بأفكار تثبتنا.. نبقى حوالين بشر ومجتمع ببساعدنا تثبت واننا نطبق كتير عشان تثبت جوانا وتبقى أعلى من احتياجاتنا.. وأنا نبت الأفكار المعاكسة اللي بتغذي الشهوة تماما.. أقفل الباب تمامًا.. متقولش انا أقدر.. تقفل الباب عشان تبدأ تتغير..

مفيش حد عايز يعمل رجيم ويفضل يشم في الأكل؟ ولا حد المفروض يصوم يقعد في محل أكل ويقول هستحمل!

الألم الشافي

فيه ناس مبتعرفش تدير الحب عشان مبتقدرش على وجع الابتعاد أبدا..

زي بالظبط اللي بيصوم.. أول يوم صيام له يبقى رهيب ومؤلم في أعراضه.. بالذات لو هو بيحب الأكل ومعتمد على الرغبة بشكل عام في يومه..

واللي بيصبر إنك عارف إنك هتدوق الأكل في المغرب.. بتخط افتراضات إنك لازم تاكل كتير وبعدين بتكتشف إنك مكنتش محتاج كل ده.. مش كده وبس أنت كمان ممكن تكون معدتك وجعتك..

فلما بندير الحب والبعد والتوازن وإرغام النفس أنها تمشي صح بين جدولها من الناس والمسؤوليات والاحتياجات غصب عنها.. ده بيألمها.. وهيزهقها في الأول.. هتبقى فاقدة للشغف والاستمتاع عشان هي لذتها مربوطة بس باللي هي عايزاه!

محتاج تعرف إن إدارتك لأي شهوة منها الحب طبعًا هتتعرض فيها لأعراض انسحاب.. ومتتخيلش إن ده حين ولا مشاعر إيجابية..

أنت بتتعب عشان اللذة انسحبت فجأة ولسه متعودتش على الحياة من غيرها..

تقبل إحساس الضعف لأعراض الانسحاب.. كمل في مرحلة البعد من غير تردد.. ومرحلة تغذية القيم اللي هتسندك وتفكرك أنت بتعمل كده ليه..
قيم زي: متخونش ربنا بأنك تجتاح محارمه.. ولا حتى باللعب من بعيد..
حق نفسك إنك متهلكهاش..

أنت خليفة الله ف الأرض وليك دور متعطل بسبب إدمانك..
أنت أقوى من إنك تعيش متبجح.. وتقابل ربك بأعمال هتتكسف من مجرد تذكرها.. تخيل هتتحاسب عليها..
أن المواجهة صعبة جدًا.. لكن الأصعب الحياة في السواد للغلط والعكس..
والحقوق والمسؤوليات اللي بتضيع..
أن فيه حقوق عباد.. القلوب اللي بتتكسر في طريق إدمانك.. مسؤولياتك اللي بتضيع عشان لحظات انبساطك..
وثبتت نفسك بدعم يسندك طول الطريق.. حد يردد عليك المعاني دي..
ويتقبل انتكاستك ويرجعك للطريق..

تقبل الانتكاس

مهم نفهم إن التعافي مش بس الاستطاعة للابتعاد وتحصين القلب.. إن هيجي أوقات وهتضعف قدام الشهوة عادي!
وده خط مهم أوي في التعافي..

أنت تفهم قرار التوقف عن الإدمان.. مش معناه إنك تنصف تماما.. افهم إن فيه زلل.. في انتكاسات هتحسها وتوقعك..

ولو ملقتش قوة من جواك إنك تتقبل الغلطة.. وانك متكسررش نفسك وتفقد إيمانك بنفسك.. هترجع أسوأ مما بدأت!

وبكده تفهم إن خطة العلاج طويلة المدى.. اتحرك في الخطوات دي.. وأنت هتوصل..

لكن إوعى تضحك ع نفسك إنك ضعيف ومش قادر..

إوعى تقول لنفسك مفيش أمل اتغير..

افتكر أنت مين.. وافتكر إن إدمانك لذته مش هتدوم.. وببسيب بعديه جلد ذات متعب ومرهق..

افتكر إن جسمك اتعود بشكل إدماني من حب أو إنسان اعتمدت على وجوده وبس.. وإن جسمك عشان يتعود يتخلص من سمومه.. ويبدأ يكون علاقات صحية وبحب ده هياخد وقت..

اعترف إنه هياخد وقت.. تقبل الوقت ده.. وأنت هتوصل.. هتبطل إدمان.. وهتعيش إنسان.. يستحق بالفعل معنى اسمه.. إنسان عايش بإنسانية..

للمُتَعافين من إدمان الحُب

جربت عمرك إنك من كتر ما بتحب حد بتبعد عنه؟

بتحط بينك وبينه أسوار وحيطان.. وكأنك من كتر ما أنت متعلق بيه من جواك خايف تسبب تعلقك عليك بيان..

أنت اتعودت تعيش من غير ما تحس بحد أوي..

اتعودت تعيش من غير ما تتعلق أوي..

لأنك جربت تحب وعارف إن الحب ليك إدمان!

إدمان بيدمر كل مسارات حياتك.. وييدمر اللي قدامك.. مبتقدرش تعيش من غيره.. مبتقدرش يبعد عن خيالك..

وقد يظن مدمن الحب أن التعافي بالهروب والامتناع.

حواليه طاقتك كلها بتظهر.. بعيد عنه بتعيش ميت.. مفيش أكسجين تتنفسه ولا في إرادة إنك تكمل لحظة واحدة بعيد عنه..

وعشان إنت عارف قد إيه «الحب» بيعطلك.. قررت إنك تقفل على قلبك بكل الحيطان.. يمكن تقدر تعيش رغم كل النقصان..

أنت مدمن الحب.. ومن غيره في جواك فراغ.. لا ببشبع من علاقة ولا ببشبع من العطاء.. ثقب أسود ببشبع كل اللي يقرب لك.. وأنت نفسك بتتشد جواك.. فتبقى عايش في قمة السعادة بإدمانك بس عايش مش إنسان!

صعب لقلب متعلمش يحب صح إنه لما يحب يوازن.. ويحول حبه لاستقرار..

قلب زي قلبك لما الحب لهيبه بيخفت بيحس إنه فقد الحب فيفضل في بحثه عنه شريد..

والحب مبيرووحش.. والحب عمره ما كان بس إدمان.. الحب علاقة أمان وسند ودعم.. علاقة تحس فيها باستقرار.. تحس لما الدنيا تتعبك إنه ملاذك الأمان اللي فيه بترتاح.. مش بس كيميا بتحركك.. مش بس شغف بيأسرك..

وعشان الحب عندك معناه غلط.. قررت عن نفسك أنها ممنوع تاني تقول.. أنها بتحب!

على الرغم من إن حبك جارف وبيملي القلوب اطمئنان.. وقفت فيضه وقررت تعيش في سجن من اختيارك.. لأنك جربت ودقت لما الحب بيتملكك عقلك ازاي بيغيب.. بتبقى عايش عشانه بس.. عايش عشان هو يعيش..

وتتمنى تبلغه.. وتتمنى تحكيه.. وتتمنى تقرب له.. بس خايف من اللي جواك.. خايف كمان منه أصل لو عرف قوة مشاعرك مش بعيد يبعد ويحس إنك كداب..

مفيش ناس كثير بتؤمن في قوة الحب.. مفيش ناس كثير بتؤمن إنه ممكن يكون إدمان.. بس بالنسبة لك هو سبب الحياة.. ومحرك كل شيء.. وأنت رغم إدمانك لحالته بتقدر كويس تعيش من غير ما تبين.. إنك أسير الحب..

سر الحب

واللي أنت مش فاهمه إن ما دام قادر توازن إنه ميسيطرش عليك ويمسح عقلك.. ما دام قادر متعطلش عن باقي دوايرك.. الحب الغلط اتصلح.. وبقي حب من حقه يعيش..

أنت بس هتتألم عشان مش سامح إنه يغرقهم.. عشان مش سامح تظهره بشكله البدائي.. فأنت بس اللي بتتوجع.. ووجعك أمان للحب.. وجعك هيحافظ على وجودهم..

وجعك بسبب اشتياقك الدائم للمزيد وتعطيش هذا الاشتياق هيسمح لك تعيش من غيرهم.. فمش محتاج تفضل باني حوالين قلبك حيطان.. لأنك اتعلمت تعيش متوازن..

اتعلمت متكونش بحر سحاب لدوامه حب..

اتعلمت متبقاش بحر من غير شيطان..

التعلق علاقة اعتمادية

الإنسان بيحتاج يغذي عقله ونفسه وجسمه وروحه.. وكل قسم من دول مطلوب تلبيته من مصادر برضه متعددة.. فلو أنت عايش مركز بس مع

احتياجات العقل، مذاكرة وشغل وكده طبيعي إن باقي أقسامك جعانة وفاضية أي حد هيدخل هيملاها بشكل أو بآخر..

علاقة التعلق علاقة اعتمادية اتكالية.. تستنزف المتعلق والمتعلق به.. المتعلق بعد فترة يكون عايز جرعة زيادة عشان يحس بسعادة.. جرعة أكثر حب.. تأكيد تطمين فيبخنق اللي متعلق بيه.. وبيتعب لأن احتياجاته الفطرية بتلح عليه ومستحيل إنسان واحد أو حتى وسيلة واحدة بس تلبها كلها..

فبعد فترة.. عدم تسديد باقي احتياجاته بيوتره ويحبطه.. فيبدأ يزود من جرعة حب اللي متعلق بيه.. بيحاول يسكن الألم بالوسيلة اللي هو حفظها وفاكر أنها هتريحه ... وروحه ونفسه وعقله عايزين وسايل تانية خالص فيظل الألم موجود ويزيد ... فالعلاقة بتدمر بالبطيء.

نتج عن تلك العلاقة أعباء نفسية، غيرة رهيبة، تملك، سيطرة، استنزاف...

مساحة سماح

أي علاقة حب ممكن تتحول للتعلق لو لم ننتبه.. نركز أوي في الشعرة ما بين أنا بننيسط أوي حوالين الشخص.. وما بين إن طبيعة جسمنا وعقلنا وروحنا ونفسنا محتاجة باقي العلاقات والدواير عشان ترتاح.. فالتوازن هيحافظ على ازدهار الحب.. وعدم قتله بالتعلق المرضي.. وعدم تدهور الحالة النفسية بسبب تجاهل الاحتياجات في سبيل وسيلة واحدة عجبتنا وارتحنا فيها فاتعلقنا بيها وأدمنناها..

الارتباط جزء لا يتجزأ من فطرتنا.. فلما نقول نسيب مسافة بينا وبين علاقتنا.. فده عشان من خلال المسافة ديه تسمح للآخر إنه يتوازن وأنت تتوازن، فعلاقتكم تبقى أقوى وبشكل صحي ميعطلش حياتكم وأهدافكم..

والمساحة بتزيد وبتقل حسب قرب وبعد العلاقات.. يعني طبيعي المساحة بتقل بين الأم والطفل كل ما يكون صغير.. كل ما يكبر المساحة بتزيد بالتدرج.. لغاية ما يبقى له حياة خاصة بيه.. وتلتقوا في وقت يجمعكم سوى ميعطللكم مش..

وطبيعي إن العلاقة بين الزوج والزوجة هتكون قريبة أوي.. بس هيفضل هناك مساحة كافية إن كل واحد فيهم يعيش حياته مع علاقاته وهواياته بالشكل اللي محتاج ليه بالمعقول..

المهم الواحد يراقب نفسه.. وبدل ما يحاول يمنع نفسه من اللي بيحبهم، مش ده المطلوب أبدا.. هو بس يحاول يمارس بقية حياته.. وبالشكل ده كل إنسان هياخد الحيز المناسب بسهولة وتقل معدلات التعلق..

كل المطلوب أننا نعمل توازن.. عشان التعلق يباثر بشكل سلبي على الاتزان الداخلي والراحة النفسية.

النظري والعملية

المشكلة إن النظري كله يقولك متحبش أوي كده.. متتعلقش.. ركز لما تتعرف على إنسان إنه يكون فعلاً مناسب لحياتك.. لما شخص يقرب لك خليك حذر أوي عشان متبحوش لدرجة الإدمان.. متنساش الحياة كلها عشانه..

وييجي الامتحان العملي.. ويظهر لك إنسان صعب تقاومه.. صعب تمنع قريبك ليه.. بيشرح احتياجاتك.. مشغل لك فضولك ٢٤ ساعة بأسئلة تخلي حياتك حواليه مش مملة.. وجوده في حياتك بينورها.

فتفضل تبرر لنفسك.. انا مركز.. انا واخد بالي.. انا عامل احتياطي.. انا أهه بعد ويقرب بمزاجي ومفيش أي ضرر حصل يعني!

بتفضل تتمشى حوالين الغلط.. حوالين الحفرة.. وفاكر نفسك شاطر إنك منتبه متقعش فيها.. بس بتحوم حواليتها.. تدوق اللذة من بعيد كده..

ويفضل الوقت يمر على علاقتك بيه.. واللي مكنتش متخيله يحصل.. تدمنه وتتعلق بيه ويبقى غيابه وجع متخيلتش تمر بيه أبدا.. ده أنت الواعي المركز يحصل فيك كده!

كل ده عشان أنت اتخيمت في قدراتك.. افكرت نفسك جامد أوي عشان بس عرفت لك كام معلومة.. وتخيلت إن بوعيك هتقدر تسيطر.. ونسيت إن العقل والقلب لما بيدوقوا لذة بيشبكوا فيها.. وبيكوّنوا روابط رهيبه مع الوقت بشكل لا واعي أنت مش مدركها..

فكل موقف لقيت نفسك فيه قوي.. كان بيني للمستقبل.. بيني للحظة ارتباط مكنتش متخيل هتتم..

فضلت تخطي خطوة ورا خطوة.. فضلت معتمد على قوة تحملك.. لغاية ما بقيت ضحية اختياراتك.. ولما جه الوقت إنه يمشي.. اكتشفت الدمار اللي وصلت بيه روحك!

إحنا كده مش بنقدّر معنى الخطر إلا أما نجربه!

مش بنصدق إن فيه حفرة إلا لما نقع فيها!

إوعى تدوق

عشان كده لو حسيت إن فيه إنسان قُربك منه بيخطفك.. للأسف مهما
هتحاول تتوازن هتقع في الإدمان.. هو مش مناسب ليك لأنه بيحرك كل
دوافعك للتعلق..

يا إما تقسى أوي على نفسك في التوازن لغاية ما تعرف تخلي العلاقة ماشية
بشكل صح.. يا أما عليك متفتحش أصلاً الباب.. متجربش نفسك.. إوعى
تدوق.. بمجرد ما بتدوق روحك بتتسحب منك وتدمر من إلحاح نفسك إنك
تكمل.. زي الطفل اللي يبشبط في اللي يضره عشان بس ظاهره مفرح
ولذيذ!

وسبحان الله.. في قول الرسول صلى الله عليه وسلم: «ما وجدت
للمتحابين مثل النكاح».. وده عشان الزواج بيشتيع الاحتياج فيحصل تحرر من
الإدمان.. لأنه بقى في متناول الإيد..

وعشان كده المعصية ليها بريق تلاقي ربنا بينا رحيم ويقول لنا.. لا تتبعوا
خطوات الشيطان..

قد إيه ربنا حلیم بينا.. لما بيمنعنا من المعصية والغلط ويقولك ما تلقش
حواليه.. هتسحبك الفتنة لو وقفت قصادها.. ابعده.. خلي بينك وبين الحرام باب
كامل من الحلال يحميك تقرب وتشوف وتجرب.. فتدمن وأنت مش مركز..

وجع قلب المعصية والزلة بيستنزفك.. وجع قلب التعلق المرضي بيقتلك..
بياخد منك كل يوم جزء من حيوتك.. جزء من روحك..

وعلى ما تقدر تبني مكانها بتكون عايش لفترة.. شبه إنسان.. حياتك واقفة..
وفي الظاهر مكملة!

أمن نفسك

ذاتك أعز ما تملك.. دون انتباهك لحمايتها..

ستصبح هشّة لدرجة التمزق!

التعامل مع الناس مرهق بشكل رهيب.. ممكن يوصلك للانهايار النفسي.. من كتر ما بتكون مش مصدق تصرفاتهم ولا قادر تحمي نفسك من الوجود..

وتحس بتوهان.. ضغوط نفسية عشان تبقى بشكل معين هما عايزينه بغض النظر أنت عايز إيه ولا تقدر على إيه..

تلاقي ابتزاز عاطفي وشعور بعبء نفسي لو معملتش اللي بيتطلب منك..

تهديد نفسي غير طبيعي حوالهم لدرجة بتخليك تيجي على نفسك لغاية ما تتعب وتنهار..

واقع بين رضاك ورضاهم.. ومعظم الوقت ممكن تختار رضاهم عشان الدنيا تمشي.. وتكتشف إنك فعلا بتستنزف.. وبرضه بتتلام لو تعبت..

غير بقى النقد.. واللوم والعتاب اللي يوجع القلب.. وعدم التفهم أو التقدير اللي بيضرب عندك شعورك بقيمتك وأهميتك.. ويحسسك بضعف شديد..

عشان كده تبقى واعى إن مش معنى إنك بتعتني بنفسك كفاية وتتملاها بشكل كافي.. إنك مش هتتعرض لانتقاص منها.. تُحرس أوي باب روحك من إن حد يعدي ويوجعك كده..

زي ما اتعلمنا ازاي نثبت قيمتنا الذاتية.. بأننا بنثبت أوي رؤيتنا لنفسنا.. بقينا متأكدين أننا نستحق الحب.. ونستحق الاحترام لا لأفعالنا.. بل لذواتنا! وأن غلطنا مش المفروض يغيّر رؤية الناس لينا.. المفروض طبعاً يحصل فصل بين الغلط والإنسان.. الغلط متغير.. بس أنت وجودك ثابت.. وعندك فرصة التغيير والتحسين..

لكن المشكلة أننا بنتعرض بشكل مستمر لصدمات مع الناس.. ممكن تبقى إحنا الغلطانيين.. وممكن يبقى هما الغلطانيين.. بغض النظر مين الغلطان.. لو معرفتش تحمي حدودك النفسية وأنت بتتحرك في الحياة.. هتلاقي قيمتك اتهزت في عينيك.. فبالتالي هتتوه وترجع ثاني في موضع رد الفعل وتبقى مش عارف راسك من رجلك!

تكوين القيم

أنت متكون من أفكار ومشاعر.. أفكارك ينتج عنها قناعتك.. ينتج عنها معتقداتك الراسخة التي تثبتك في طريقك.. التي معتقد مثلا في الأمانة.. يبجي عند شهوة المال ولا يمكن يقع طول ما هو مثبت قيمة الأمانة جواه بدوام تذكره ليها وثبيتها كمعنى يعيش بيه.. فعلى الرغم من إنه ممكن يبقى «محتاج» للمال.. ميقدرش يمد إيداه أبدا.

حراسة الحدود النفسية من أهم ضوابط العلاقة الصحية

فبكداه القيم.. التي هي المعاني الراسخة التي مكوّنة اتجاهي في الحياة.. منظومة القيم التي مؤمن بيهها هي التي بتتحكم في تلبيتي لاحتياجاتي..

إحنا قلنا لما بنملى نفسنا بيبقى عندنا من القوة التي يخلينا نعرف نلبي الاحتياج بأي مقدار.. وهل أصلاً نلبيه ولا هو احتياج مش مهم يتلى بالشكل ده بالذات وممكن أعوضه بأشكال مختلفة مناسبة أكثر لشكل قيمي..

القيم حاكمة على الاحتياج.. وبتساعدنا نعيش بتوازن بين شهوات قلبنا وواقعية الحياة.. فنقدر نثبت قدام باقي الامتحانات التي بنواجهها في الدنيا.. ما هي دار بلاء.. مش عايشين فيها عشان تتلذذ.. عايشين فيها عشان نحقق السعي بما قدره الله لنا من أسباب.. والسعادة الحقيقية مش في لذة بتنتهي في لحظتها.. السعادة في الحياة بتصالح بين أنت محتاج إيه وهل ده يساعدك في طريقك لهدفك ولا احتياج بيعطلك؟

فكده المفترض إن القيم بيبدأ اختبارها على أرض الواقع كل شوية باصطدامها باحتياجاتك.. كل ما هتقدر تغلب قيمك عن احتياجاتك.. كل ما هتبقى أقوى في طريقك.. لأن غلبة الاحتياج الدائم بيضعف أوي من عضلة الإرادة ويسبب للأسف غلطات كتير في حق القيم.. لغاية ما تبدأ القيم تتكسر.. ويطغى الاحتياج.. تبقى أسير لشهواتك.. وقيمك تصبح مجرد أدوات نظرية بتقولها ومش بتفعلها..

أول حدودك النفسية بتبدأ من تحديد القيم التي مينفعش تسمح لظروف تغييرها.. كأنها خط أحمر مش مسموح لحد يعديها.. ربنا سبحانه وتعالى في القرآن نهانا نقعد مع أي حد بيستهزأ في الدين.. وكان ختام الآية ﴿ي ي﴾.. يعني لو محتمش عقيدتك.. قيمك هتتهز وهتتغير أفكارك وتبقى زيهم من حيث لا تدري..

ثبّت صورتك

نجي بقى لثبيت القيمة الذاتية.. تبقى مدرك إن أخطاء الناس في حقك مش معبرة أبدا عنك وعن ذاتك..

هي معبرة عن صفاتهم.. ومعبرة عن الواقع اللي بيجمعكم بالظروف اللي انتو فيها سوى..

فأهم شيء عشان تقدر تتعامل مع اللي حواليك.. إنك تحمي حدودك النفسية.. أي تواصل سلبي ميكسرش ولا يهز من قيمتك..

تفكر نفسك إن ده مُعبر عنهم هما وبس.. وتبدأ تفكر بقى في الموقف بشكل عقلاني.. ناتج عن ثباتك لرؤيتك لنفسك.. وساعتها هتتعلم من الموقف أما تثبت طريقة تصرف الآخر معاك يبقى بشكل يليق بيك وبيه.. وإما موقف عارف إنه عيب مبيتغيرش..

متتاخدش في دوامة «هما عملوا فيا».. وأحس بتقليل لقيمتي.. المهم أني أعرف إن في أيدي ريموت الكنترول واقدر أحمي نفسي وأحمي العلاقة حتى من سوء تصرفاتنا بإدارة المشكلة من غير ما ناخذها بشكل شخصي أبدا.

سد وقارب

نبقى مدركين أننا عندنا عيوب مهما حاولنا نغيرها بتكون رواسبها جوانا موجود.. وغالبًا بيتحكم فينا في وقت الضغوط الشديدة أو الضعف.. فمش عيب إنك تحط حدود وأسوار حوالين نقط ضعفك.. عشان لا تؤذي بيها ولا تتأذي..

مثلا شخص جواه غضب.. بتلمس معاه في نقط معينة من حياته.. مهم أوي يبقى مدرك للإشارات اللي بتوصله للغضب.. فيقدر يبعد تمامًا عن المؤثرات اللي بيتجدد منه العيب ده.. وده بيكون جزء لا يتجزأ من إدارة الغضب.. مجيش وأنا تعبان نفسيًا وأبقى متخيل أني هقدر أتحكم فيه.. أحمي نفسي بأني مفضلش أضغط عليها بالعافية.. سد وقارب..

متجيش على نفسك

فمن حماية حدودك إنك تتعلم إمتى أنت تعبان فعلاً ومجهد فمينفعش تيجي على نفسك..

نيجي بقى لفكرة طلبات الناس..

لما تحس إنك مليون وعندك طاقة هتقدر تلبى طلباتهم بناء على قيمك.. وبناء على استطاعتك واحتياجاتك.. فتقدر تدي وتيجي كمان على نفسك شويتين..

لكن اتعلم تقول لأ لو كوبايتك فاضية!

لأن العطاء لو طلع من كوباية فاضية.. يسحب من طاقتك أكثر ويضغطك
نفسياً هتبقى كأنك مهدد.. فعيوبك تتحرك بسهولة.. لما تدي تكون مليون أوي..
شيل شيلتك

آخر حاجة بتكون مهمة جداً في تحديد حدودك.. إنك متشيلش نفسك
مسؤوليات متوهمة.. نعرف مسؤوليتنا إيه فيها.. ودورنا إيه بس..
المهم أننا نفهم إن تحديد دورنا إيه فيها هيساعد كثير لتحديد اللي ليك واللي
عليك.. عشان غير كده أنت متستنزف في معارك كلها من صنعك..

ممكن زوج يبدأ يتحمل مسؤولية زوجته بعطاء زائد.. عطاء يمنع عنها أنها
تقوم لنفسها وتتحرك هي كمان.. عطاء بدل ما يساعدها تحقق ذاتها
وإمكانيتها يخليها تتواكل من دون قصد.. ما في حد بيعمل ليه أنا اعمل؟ وكل
ده عشان تلبس المسؤولية عليه.. بدل ما يعرف حدود دوره وحدود دورها..
تداخل الأمر فبقى بيقوم بدوره ودورها في الحياة.. وطبعاً المثال ده واضح
أكثر في الستات اللي بتشيل تمامًا البيت عن أزواجهن وبيعانوا من إنهم تحمل
مسؤوليات متوهمة بقت أمر واقع بعد كده بيتحاسبوا عليه!

ممكن أم تشيل مسؤولية نجاح ابنها لدرجة أنها تمنعه يحقق نفسه وإمكانياته
في الاستقلال الذاتي والاعتماد على النفس.. وتفضل مطحونة وهي بتذاكر له
ولا كأنها هي اللي بتمتحن!

وللأسف المسؤولية المتوهمة بتبقى على نفسك ولا كأنها مسؤولية حقيقية..
وبيكون صعب جداً التحرر منها.. محتاجة منك تعيد تقييم منظومة القيم اللي
بتحركك.. محتاجة منك تحديد لاستطاعتك واحترام احتياجاتك.. محتاجة منك
وضوح وتواصل صحي مع الآخر.. محتاجة تبقى فاهم ومُدرك أوي دورك إيه
بالظبط في كل علاقة.. ومتتعداش الدور ده..

لأن في المسؤوليات بالذات.. لو شيلت فوق طاقتك هتبقى حق مكتسب..
وهتبقى أذيت نفسك.. ومحققتش لنفسك شيء غير التعب والآخر مش
هيحس للأسف غير بالتدخل والاختناق!

حماية حدودك النفسية تبقى على قمة اهتمامك وأنت بتتعامل مع الناس..
عشان لو مستوعبتش تحديدها.. هتبقى غصب عنك وعنهم مستباح وتعرض
علاقاتك للخطر..

خليك صامد للآخر

استمرار العلاقات ليس حقًا مكتسبًا..

وإنما طريقٌ يستدعي منك السير بصبرٍ وبلا ملل

معرفة له بنجي عند علاقاتنا ونستسهل أوي..
نستسهل أننا نفضل نستنزفها لغاية ما رصيدها يخلص..
نستسهل فنسيبها تدبل مع الوقت..

والحقيقة إن العلاقات محتاجة شخص مسؤول يديرها.. ويهتم بيها ويرعاها.. يا
إما هتدبل زي الوردة بالظبط!

فمينفعش تستسلم للجفاء والذبول.. ساعتها دي إشارة إنك معملتش دورك
فيها.. مسؤوليتك فيها إنك تهتم توضح احتياجاتك عشان يحصل تقارب..
ومسؤوليتك في إدارة اللي بيضايقك وبيوجعك عشان ميحصلش تباعد وجروح
تكسر العلاقة بينكم..

قرب المسافات

لما تكون بتملأ نفسك كويس.. هتبقى قادر تستوعب أنت فعلاً محتاج إيه
دلوقت.. فتقدر تساعد اللي حواليك يفهموك ويحسوا باحتياجاتك.. فتبقى ليهم
كتاب مكشوف سهل قرابته.. من غير خجل أو كسوف.. الشفافية في
العلاقات هي الطريقة الوحيدة اللي بتساعد تقرب المسافات..

والأهم إنك تبقى مسؤول وتدير مشاعرك كويس في العلاقة.. فتخليك
مسؤول عن مشاعرك..

المشكلة إن خيبات الأمل.. والجروح.. بتسبب غضب وبناء حيلة زعل صعب
جدا كسرهما.. نفس الوقت اللي خدته عشان تتبني بتاخده عشان تتهدم..
ومفيش علاقة للأسف بتستحمل تدي وقت للتعافي.. الناس نقسها قصير..
فعشان كده مهم أوي إنك متسمحش بحيلة الزعل أنها تتبني ما بينكم.. كل
ما يبدأ الطوب يتجمع.. تكسره على طول وتشيله من طريقكم..

اللي بيهد العلاقات أكثر من المشكلات الكبيرة.. التراكمات الصغيرة.. بتفضل
تتبني واحدة واحدة.. وفجأة تبقى جبل..

وعدم التعامل بمسؤولية يسبب الجفاء..

مش كل حاجة بتضايقنا محتاجين لها وقفة وكلام.. ده بيزهق أوي الطرف
الثاني.. ساعات بنبقى محتاجين بس نغير طريقة تفكيرنا فيها.. فلما نتغافل..
منبقاش بنبي حيلة زعل.. نبقى فعلاً بنشيل الطوبة من طريقنا.. بس بشكل
ميخيلش الآخر يحس إنك مركز في كل تصرف وبتضايق على أقل شيء..

إدارة مشاعرك مسؤوليتك.. إنك تقدرها لما تتعب.. تسمع نفسك كويس..
وتعرف إيه اللي مضايقها بالظبط.. وتديها حق أنها تضايق.. وكمان تفهمها أنها

متكلمش إلا لما تكون هديت ولقت قرار يربحها ويربح الآخر..

حط نفسك مكانه

الموضوع مش بيلف بس حوالينا.. محتاج تحط الآخر في حساباتك..

حط نفسك مكانه.. بس بطريقه تفكيره هو مش بطريقة تفكيرك.. تحترم الفروق اللي بينكم.. وده كله مش هيتم إلا لما تدي نفسك وقت كافي.. عشان تقدر تدير اللي مضايك جواك الأول.. فتقدر تحكم إن كان يستاهل إنك تقف وتبين.. ولا ممكن بس نتغافل..

الاحتياج للأكثر

مشكلة تانية بتحصل لبعض الناس.. إنهم كل ما علاقة تخفت بريقها.. صحاب ولا أحبة حتى.. بيدوروا على علاقات جديدة.. مش عشان يوسعوا دواير علاقاتهم.. لا عشان زهقوا وحسوا إنهم محتاجين يستبدلوها..

مينفعش كل ما يدخل حياتنا علاقة جديدة.. نمسح اللي قبلها.. نتعلم نبي في علاقاتنا.. نفهم إن العلاقات اللي بتدوم هي السند والوتد الحقيقي في حياتنا..

وفيه بيحس باحتياج الاستبدال ده حتى في علاقة اضطرارية زي الحب!

مش عايزة أصدملك.. بس أنت عارف إنك طول ما أنت ماشي في الحياة هتقابل ناس جامدة جدًا.. تتمنى قربها وتتمنى تبقى جزء من حياتك.. بس للأسف وجودهم مش مناسب لشكل حياتك دلوقت أبدا..!

خليني أبسط لكم معلومة إحنا عارفيناها كويس بس مش مدركين قوتها في التأثير!

لما مثلا بنعمل شوبنج.. وبنقرر نشترى جاكيت سعره تحفه فنطير بيه.. لو فضلنا نعمل شوبنج يوميا هنشوف جاكيتات تكررنا في اننا اشترينا الجاكيت نفسه!!

بالعكس ده اللي هيحصل كمان إنك هتبدأ تحس إنك اتسرعت..

هتخس إنه مش حلو عليك.. عينك شافت الأمل فبقت شايفة الحلو قليل أوي!!

هو كده.. ده كتالوج نفسك.. الاشتهااء المستمر.. الاحتياج للأكثر.. العلو لنيل الأفضل..

فمش معقولة تفضل معروض نفسك لسوق الجاكيتات.. وترجع تقول انا ليه كاره الجاكيت اللي في يوم حبيته واخترته بإيدي؟

الالتزام في العلاقة هو أسمى معاني المسؤولية

عارف.. أنت ممكن كمان عشر سنين تغيرات الحياة ترغمك فعلاً تغير الجاكيت.. تشتري واحد أضيق أو أوسع مناسب لاختلافك دلوقت.. أو ممكن تلجأ بس إنك تغير فيه تضيقه وتوسعه عشان يناسبك دلوقت.. بس الأكيد إنك مش هتفضل سايبه ف دولابك.. قرفان منه.. وبتتفرج على غيره.. ومش بتسببه حتى لحد ثاني يستمتع بيه..

خلي بالك إن عينك تتزغلل بفرصة أحلى حقيقي هتكسر تمامًا من انبهارك الأولاني بيه.. مهما كنت مقتنع قناعتك هتتغير عشان حصل مقارنة.. والمقارنة هتخسرك اللي في إيدك وتخليك تطلع للي لسه جديد.. وتستسهل الهروب على إنك تبدله وتتعب عشان وترجعه زي الجديد..

وأن الواحد هيعرف بس إن جاكيتته مبقاش مناسبه.. لما يكون بيلبسه ويبستعمله ومالي عينه بيه مش بيدور على بديله.. ساعتها هيقدر يحاول يظبط قياسه عشان يناسب اختلافه.. لغاية ما يحس إنه مبقاش ينفع.. الاختلاف أعلى من إمكانية الاستمرار لوجوده ف حياتك..

لكن لو عينك زغللت.. مش هتبقى لديك فرصة أبدا إنك تحاول.. إنك تفضل مقتنع وراضي بالموجود.. لغاية ما يظهر استحالة الوجود..

النفس بتميل للجديد.. بتميل للطريق السهل.. الترميم صعب أوي.. لكن الاستبدال سهل!

عشان كده الحياة مشوارها طويل..

لو عينك مش شاغلها باللي معاك.. عينك هتجيب كل حاجة وتخليك تحس بنقص شديد.. صعب إنه يتملي..

لو عقلك مش شاغله باللي يفيد هيفضل يلاقي تطلعات تخرّجك من راحتك النفسية وتودّيك طريق السخط..

راعي أوي إن مشاعرك لما بتتحرك تجاه شيء.. لو تجاه شيء غلط.. هتوديك سكة التشتت!!

اكسر عينك.. متمدهاش أبدا..

املاً عقلك بهدفك واللي يفيدك.. وبس..

عيش مشغول باللي موجود..

ابدل قصارى جهدك في دوايرك الحقيقية الموجودة..

غير كده.. أنت بالظبط طفل في الملاهي مش قادر يبطل لعب وشيطان في كل حاجة بتلمع وبتوعده بالسعادة.. وهي في حقيقتها ثقب أسود مبيشبعش.. بيزيد روحك توحش وهلاك!

متهريش للبريق..

متزغللش عينك بالجديد..

وقتها بس هنقدر نقول إن برنامجك العقلي بقى متزن كفاية إنه ياخذ قرار.. يسبب ولا يفضل للآخر..

ألم تاني

ساعات من كتر العلاقات اللي بتديرها.. تحس إنك مستنزف.. فتبطل تدير وتسبب الألم يتملكك!

أصل الحياة فعلاً صعبة.. كل ما بنقابل حد ونحس إن خلاص فيه أمل نتحقق أحلامنا معاهم.. فيه أمل نقرب أوي من غير وجع.. فيه أمل نتعلم من اللي فات فنحدد العلاقات بشكل ينجحها.. بنكتشف إن الوجع الجديد مكنش أبداً ممكن نتصوره.. ألم من نوع مختلف!

ألم نابع من قلب ناضج اتعلم كثير في حياته.. فبنى أسوار وأسوار من حدود وأفكار تحميه إنه يتوجع زي زمان.. والقلب الواعي ده عشان يرجع يأمن تاني.. يرجع يقرب.. يرجع يظهر روحه الحقيقية لأي إنسان.. بيكون حذر جداً.. وياخذ أيام وشهور عشان يسبب نفسه.. ويحب من تاني..

فيتفاجأ بالخبطة.. يتفاجأ بهدم كل أحلامه من الأمان.. من إنه علاقته أكيد مختلفة.. من إن الحياة هتديه القرب والاحترام والونس والدفا إلى قلبه بيدور عليهم.. فيلاقي ساقعة.. وجفا.. بتملاه للآخر..

فيفهم إنه من تاني وقع في نفس الحكاية.. برضه قلبه حب اللي محبوبش.. قلبه عاش في علاقة وهمية نفسية مع قلب ميفضلوش.. قلبه احتاج اهتمام من اللي أصلاً ميفكرش فيه.. رجع بمنتهى السذاجة يحط نفسه في مكانة محدش إدهاله.. ولا حد وعده بيها.. افكر نفسه غالي.. وهو كان في عينه رخيص أوي..

فتبيجي لحظة وبتفهم.. إن قلب زي قلبك مش عارف يلعبها صح.. مش عارف يدخل في علاقات مرسومة زي ما بيتمنى من غير جروح..

قرب وواجه

لأن مفيش حياة من غير جروح.. مينفعش كل ما نتوجع نجري ونهرب..
مينفعش كل ما نتأذي بفضل نبي في أسوار.. مينفعش كل ما نحس بعدم
أمان نستخبى ونسجن أرواحنا ونرمي المفتاح لعل قلبنا من وجعهم يرتاح!

مينفعش بفضل تتخيل إن اللي ملبّاش أحلامنا أكيد مبيحبناش.. ولا ينفع نقول
إن عشان خذلنا في لقطة أكيد إحنا رخاص!

عمرها ما كانت أبيض وأسود.. ممكن تبقى إشارة على تحديد بعض الأولويات
عندهم.. ممكن تبقى إشارة إنك اتسرعت في رسم مكانة عالية أوي هما لسه
محسوش بيها.. بس الأكيد إن لو علاقتك بيهم مكتوبة.. مع الوقت وبس
يهحصل قرب حقيقي.. وبإدارة الأوجاع والخذلان صح هيبقى مسطرة حقيقية
لعلاقة مكملة برعاية من غير إهمال..

الحياة مش هتقدم لك علاقات من الجنة.. الحياة مش هترسم لك توقعاتك
على الأرض وتمشيك على ورد.. الحياة مليانة ناس موجهة.. ناس مصدومة..
ناس ماشية بتدفع ناس فواتير غيرها من الجروح.. لو كل ما هتتأذي هتجري..
مفيش علاقة هيتولد لها روح!!

افضل للآخر..

قرب.. اقتحم.. واجه.. اشرح نفسك لغيرك.. وسيب له حرية الاختيار قريبك
مرّحه ولا يبعد.. ولما تحس بتساؤلات أسأل واستفهم عشان تعرف مكانتك
عنده.. ولما تتجرح اشرح جرحك من غير ما تحملها أكثر من حيزها.. مجرد
قول مشاعرك وإحساسك من غير ما تلوم ولا تعاتب.. واللي يبحك فعلا..
اللي فعلاً شاربك.. هيلقي طريقة عشان يكسبك..

القلب الشجاع

واللي يقرر يسبيك مهما فضلت للآخر.. متقاومش.. سيبه براحته.. لو ليك
مش هيروح لبعيد..

العلاقات غالية أوي.. والحياة صعبة أوي.. عايزة قلب شجاع بيحمي حبه..
بيحمي علاقاته بفضل عايشة..

يحب الناس بعيوبها.. قبل مميزاتها.. مينيّش توقعات من رؤيته لوحده من
غير ما يشاركها معاهم.. ميقاش عارف عيوب اللي قدامه ويفضل منتظر إنه
عشانه التصرف هيكون مختلف.. تبقى واقعي وتفهم إن التغيير بييجي بعد
وقت طويل من الإيمان.. من التشجيع.. من الصبر على الأذى وبيانه عشان
تساعده يغيره..

اشتروا علاقاتكم.. للآخر..

متستسهلوش الجفا.. بلاش تسيب إلا لو اللي قدامك ميقدمش أي محاولة
إنه يمسك معاك..

غير كده.. بطل بقى هروب.. وقف على ناصية علاقاتك وقاتل.. مفيش
علاقات بتيجي بالساهل.. فافضل صامد للآخر..

حُب.. بس من غير شروط

الحُب الغير مشروط ليس خضوعا واستباحة لذاتك..

فإن ذبت فيهم.. تلاشيت!

وإحنا صغيرين كنا بنحلم بعلاقات مليانة سعادة.. مليانة مشاركة.. مليانة
اهتمام..

بنحلم بفارس الأحلام بشكل معين مرسوم في عقلنا.. وهو بيحلم بالبنت اللي
هياقي فيها كل اللي بيتمناه..

بندور على الصديق اللي نرتاح معاه.. وفي أفكارنا بنحس إنهم هيشاركونا كل
تفاصيل حياتنا.. وهيقضوا معنا كل أوقاتنا.. ودايما موجودين مهما حصل لما
نحتاجهم..

مخنوقين من البيت وحاسين إنهم ضاغطينا ومش مدييننا الحب بالشكل اللي
بنحلم بيه.. وأن أكيد لما نختار إحنا هنلاقي الحب بالظبط اللي على مقاسنا..

ونكبر وتكبر أحلامنا معنا..

ونبدأ نحس بجروح مالهاش أول من آخر.. خيبة أمل مستمرة.. توقعات
مبتحصلش زي ما رسمناها في عقولنا.. فنفقد الأمل في الحب..

ازاي قدر يعمل كده!

هنت عليه؟ ميبحبنيش؟

بنحس بخيبة أمل.. بجرح للخيانة لتوقعاتنا وإنه ملناش قيمة عندهم.. دايرة
مفرغة من ازاي وليه.. وأنا استاهل كده!!

ده الوجد اللي بنحس بيه لما نشوفهم بيعاملونا عكس ما رسمنا وتخيلنا!

من تعقيدات العلاقات إن كل إنسان بيكون له رؤيته الخاصة عن الحياة.. عن
المتوقع في المواقف.. عن الحب.. عن العطاء.. عن الحياة بشكل عام..

فلما اتنين يدخلوا في علاقة مع بعض.. وتتوحد رؤاهم بتقارب (ليس بانصهار)..
بيبدأ كل واحد يحس بشعور ال (bewilderment).. عدم التصديق!

كل موقف بكتالوجي مش قادرة اتخيل ازاي بكتالوجه ممكن يكون وصل بيه لرد الفعل ده.. عدم تخيل رد فعل غير اللي مؤمنة بيه.. عدم استطاعة الشخص إنه يقلع نضارة صورته ويلبس نضارة تصور الشخص الثاني بتحتك في سجن من الشعور بالخيانة النفسية..

والأصعب لما بتكون في علاقة مع شخص مختلف تماما.. تفضل منتظر المتوقع منه.. وهو بيتصرف بناء على رؤيته.. فبتتجرح منه.. وهو يستغرب ليه مجروح.. ما انا أهه طبيعي!

تيجي تقول له أنت ليه مش موجود.. عشان الوجود معناه عندك تواصل ومشاركة مستمرة.. يقوم يقولك أنت غريب! ما انا موجود أهه! أصل الوجود بالنسبة له إنك أصلاً بتمر في خاطره وإنه بيعتبرك من الناس اللي بيتواصل معاها «لما يفضى».. تقوم أنت تحس: ده أناني.. يقوم هو حاسس: لا أنا واقعي..

فتلاقي المشكلة بتتعدد لأن كل واحد مصمم يفرض تصورته على الثاني.. محدش بيحاول يتفهم!

والمشكلة كلها في أننا محبوسين في تصور معين لشكل الحب.. فمش عارفين نستقبل غيره.. وأنا لما بنحب.. بنحب بطريقتنا اللي ممكن متكونش محسوسة ليهم..

فتلاقي كتالوج الحب نازل مليون شروط كده.. شروط عشان يتحس!!

ولما نقول تعالوا نجرب نتحرر من الاشتراط.. الناس بتفتكر أننا بنتنازل عن حقوقنا.. وبنحبهم مهما عملوا فينا.. اللي هو يا إما علاقة مليانة تشترط ومش بتراعي الاختلافات والظروف أبدا.. يا أما علاقة مستباحة ماليانة خضوع وإرهاق..

الحب من غير شروط بيحررك من كل ده.. بيعلمك إن الحب في علاقة بين اتنين بيكون رايح جاي.. توازن بين حبك لذاته.. عيوبه قبل مميزاته.. وبين حبك لنفسك وأنت وباه..

الحب عشان يتعاش بين اتنين في كل أنواع العلاقات يبقى رايح جاي.. ليك وليه.. هو عاجبك زي ما هو.. وحابب نفسك حواليه.. متدخلش ف علاقة وانت متخيل إنك تقدر تمشي بيها وهي مش متوازنة بجناحين الحب.. حبك ليه.. وحب نفسك وأنت معاه.. هو ده الحب اللي بيستحمل مع طول الحياة..

ولو أنت في علاقة وجناح منهم اضرب.. خليك بس واعى.. عشان من هنا هتقدر تشتغل على نفسك وعلى العلاقة.. بحيث إنك توصل للتوازن المطلوب..

الوضوح

لتفادي ده في العلاقات.. محتاجين إننا أولا نشرح توقعنا للطرف الثاني فنساعده يشوف تصورنا.. ثانيا محتاجين إننا نبص لتصرفاتهم من خريطتهم هما.. مش بتصورنا إحنا.. فساعتها هنقل إحساس خيانة التوقعات شوية.. وده بيتفهم بالسؤال المباشر وطلب توضيح ليه بتتصرف كده ومع الوقت بتبدأ تفهم الآخر..

مسؤوليتك تكمن في مساعدة الآخرين لفهم توقعاتك منهم.

اللي حكيت ده بيساعد أوي وقت الانفصال للتعافي؛ لأن العقل هيعيشك إحساس عدم التصديق بأنه يترجم كل حاجة بفكرك أنت! لو بنقول إن رؤانا مختلفة وإحنا مع بعض ومحتاجين مجهود للتقارب.. طب تخيل بعد الانفصال وكل واحد بقى مش بيحاول أصلا.. لو فضلت تتوجع عشان مش متخيل ازاي اتصرف أي تصرف.. مش هتتعافى.. عشان تتعافى محتاج تفكر نفسك بحاجتين.. هو مش بيحسبها زيك.. هو ليه رؤية مختلفة.. والرؤية دي مش بتعكس قيمتك.. لا هي بتعكس فكره وقيمه وأخلاقه وبس!!

لما بتشوف الدنيا بعين الآخر بتقرب له.. وبتبعد عن ذاتك أنها تتشيك في ردود فعله.. لأنك فهمت إن تصرفه معبر عنه مش عنك.. وده مهم أوي لسلامة نفسك وحماية ليها من الوجد..

مجرد تصميمك إنك تشوف تصرفات الآخرين بعينك وفكرك أنت بس.. ده بيعرضك لخيبات أمل متتالية.. فكر بعقلهم ترتاح وتريحهم!

ثلاثي الأبعاد

المشكلة أننا بنفرض تصورنا على الطرف الآخر.. بنرسمهم بالشكل اللي يريحنا.. وده عمره ما كان حب خالص.. ده إحنا في وهم حب صورة رسمناها.. حتى ولادنا بنعمل فيهم كده.. راسم صورة لطفل هادي.. فلو طلع بيتحرك كثير تبدأ تضغط وتتعب وتبقى كمان رافضه ساعات..

راسم صورة إن صديقك بيفضي نفسه عشانك.. فلو صاحبت حد بيحب الإنجاز ومديه أولوية.. بتفترض على طول إنه مبيحبكش لما يتأخر عليك عشان مشغول ساعات!

المشكلة إنك مش عارف تحب الصفات اللي مش بتريحك.. وفي نفس الوقت هي مش عيوب.. هي مجرد صفات فيهم مش حابها أنت..

يعني لو ست عاطفية.. بتتعب لما جوزها يبقى عملي.. وتبقى عايزة تغيره
لشخص عاطفي من الدرجة الأولى..

توقعات وتصورات بتشترط على الآخر إنه يتشقلب عشان يرضيها!

العلاقات مبنية على مميزات وعيوب.. مينفعش تيجي عند العيوب وتقفش
وتبقى مش قادر تحبهم بيها..

ومينفعش برضه تيجي عند كل أخطائهم وتحس إنك اتكسرت عشان مش
متقبل ضعف فيهم..

فاللي بيحب على شرط «متغلطش وتتغير» في كل عيوبك.. ده بيسجن اللي
قدامه في قالب مش بتاعه..

تحرر من رؤيتك المحدودة لهم.. لتذوّق جمال انفرادهم.

محتاج تتحرر من رؤيتك لتصوراتك المحددة ليهم.. عشان تقدر تستمتع
بوجودهم بكل اللي فيهم.. هما باكيدج على بعض.. مش صورة بُعد واحد
بس.. تشوفه ثلاثي الأبعاد..

العلاقات مش محتاجة غير شوية استثمار منك في الحب عشان ترعاها
فتكبر.. لازم يبقى عندنا مرونة للتعامل مع العلاقات المختلفة.. ومش كل
علاقة نتصور أنها مرهقة عشان بس مش على مقاسنا بالظبط.. محتاجين
نفهم أننا بس حبنا يتحرر من شروطنا..

جت فيك

زي ما اتفقنا أننا نصقّر فواتيرنا عشان منبقاش بنتعامل فيهم بأشباح
الماضي.. ما زالوا هما ممكن يكونوا مش واعيين للمعنى ده.. وأن فيه أوجاع
ماليهم ممكن تأثر على تصرفاتهم معاك.. عشان كده أنت محتاج لما تشوف
الغلط تدور على الدافع.. اتحرر من إنه يقصدك.. وشوف غلطاته كرداء
بيحميه من أوجاع الماضي.. ممكن ميكونش صقّر فواتيره القديمة.. وجت
فيك..

لما تعامل الناس من جواهرهم.. متحاولش تتحبس في صورتهم الخارجية.. خلي
همك تدور على الحلو اللي جواهرهم اللي مترب بسبب عوامل الزمن.. بسبب
الرياح اللي بتمر بيهم بتخليهم مش ملاحقين يلمسوا أنفسهم ويشوفوا روحهم
الحلوة الحقيقية..

خليك سبب إنهم يؤمنوا بنفسهم تاني.. إيمانك بيهم.. إصرارك إنك تتعامل مع
اللي جواهرهم حلو وتتغافل عن اللي بيصدروه ليك وحش (طول ما بتعمل ده
بقلب صافي ومش بتضايق).. بيخرج أحلى ما فيهم.. نصّفت التراب شوية..

مرة في مرة الخير اللي جواهم هيطلع.. لأنه إنسان من حقه يتشاف.. من حقه يتحس.. من حقه حد يؤمن إنه يقدر.. يعيش كإنسان قيمته جواه.. مش مختزل بس بتصرفات نابعة من وجع وآلام..

هي مش سهلة.. وممكن كمان تتأذى أوي وأنت بتشيل حبة التراب.. ممكن يقاوموك.. ممكن يخونوك.. ممكن يلبسوك تهم ناس قبليك اتأذوا منهم.. فتدفع فواتير قديمة.. بس لو أنت مقوي حبك إنك تشوف حلوهم.. هتبقى ثابت.. وهتبقى شايفهم إنهم بيعملوا كل ده كطريقة بئسة من حماية نفسهم اللي اتبهدت.. ما أنت اتبهدت زيمهم برضه.. وبكده أنت عرفت تحبهم من غير شروط.. من غير إلزامهم يتصرفوا بس بشكل يرضيك.. وكنت سبب في إنهم كمان يتعافوا من وجع قديم.. بسبب إيمانك بيهم..

قالب الحب

من أكبر المشكلات اللي بتواجه العلاقات اتنا بنتخيل ونتصور إن الكل بيحب بنفس المعاني.. حطينا الحب في قالب واحد.. وتخيلنا إنه البشر كله يتحاكم بناء على القالب ده!

بغض النظر عن إن كل واحد أصلاً عنده أسلوب بيحب بيه.. وعنده أساليب بيستقبل بيها الحب فيقدر يحس بشعور الحب.. الحوار ده الناس بدأت تفهمه.. بدأت تفهم إن أسلوب إظهار الحب بيعتمد على انفراد كل شخص عن الثاني.. وبناء على استطاعته أصلاً في التواصل مع مشاعره وفي توضيحها بشكل صحي..

المشكلة الأكبر.. إن مش كل اللي يقول.. بحبك.. بيحبك بالشكل اللي أنت هتخيله!

يعني هو لما يقول بحبك..

أنت تلقائياً بتتصور الحب اللي عقلك متعود عليه.. الحب اللي متوقع إنه يحصل بين قلبين.. فتبدأ بشكل لا مباشر تحاسبه على صورتك الذهنية دي.. فتزعل وتتقمص وده ببسب شروخ كتير في العلاقات بجد.. غير إنك بتلوم نفسك إنك مش بتتحب بالشكل اللي أنت بتتمناه.. وتبدأ تعتبر إن العيب فيك ومتستاهلش الحب.. والحلقة تبقى مفرغة..

ووصل إحساسك

فيه من البشر اللي انفعالاتهم عالية أوي.. الإيكواليزر الشعوري عندهم فوق المستوى الطبيعي للناس الباقية.. شعورهم مضروب في مية مثلاً.. فدايماً اللي بيحسوه جواهم مختلف جداً عن الواقع وعن الطبيعي.. الناس تحب

تسميهم المأفورين.. (هما اللي يقولوا مش أنا).. فبقى حبهم مشروط إنهم يتفهموا رغم كتمانهم! ولو حد معرفش يفهم بيتجرح حبهم ويحسوا إن محدش بيحبهم..

فعشان علاقتهم تتوازن يحرروا نفسهم من شرط الفهم من غير ما يوضحوا عشان يحسوا بالحب.. مش كل إنسان عنده قدرة يفهم اللي قدامه.. تساعدهم..

لو أنت انفعالاتك عالية كده.. هتبقى المشكلة إنك مبتعرفش توصل إحساسك للناس.. بتتكسف أو بتتجمد لما تحس!

مشكلة المشاعر أنها بوصلة منها بنقرأ نتعامل مع الواقع ازاي.. مشاعرنا بتحكي لنا ازاي نقدر نتواصل مع مجريات الحياة بما يناسب تفكيرنا واللي بنحتاجه.. فنبداً نتحرك في الحياة بشكل يريحنا ومناسب لمسلمات الأمور في الحياة..

طبعاً في أمور كثير ممكن نحكي فيها عن النوعين دول من الناس.. بس أنا عايزة اتكلم الأول عن النوع اللي بيتجمد لما بيحس.. وعايزة اتكلم بشكل خاص عن استقبالهم للحب!

لما بيستقبلوا الحب.. شعورهم بيعلى بشكل رهيب فيخليهم يتكتموا خالص.. مبيعرفوش يعبروا عنه.. مبيعرفوش يستقبلوا الحب ومبيعرفوش يوصلوه رغم إنهم حاسينه بكل ذرة في جسمهم..

منهم اللي بنى جواه معاني كمان غلط خلّت موضوع استقبال ومنح الحب بقى معطوب بشكل مخلي حياتهم واقفة.. متعطلين جدّاً.. علاقتهم بتدمر بسبب إن اللي جواهرهم مش مقري.. والناس طبعاً مبترحمش ولا بتحاول توصل للي مش واضح جواهرهم.. بيحكموا بس ع الظاهر.. ناس باردة وبس.. فينتج عن كده اغتراب في العلاقات وشعور بوحدة شديدة..

لو أنت من النوع ده.. تفهم إن دي طبيعتك وإن طبيعتك دي جميلة.. الحساسية الشعورية ممكن تستغلها في القرب جدّاً بس لو عرفت تظبط ال (equalizer)..

تتقبل فكرة التواصل مع مشاعرك.. تتقبل جمال تكوينك الحساس.. وتتعلم إنك تبقى شفاف مع مشاعرك من جوا.. تحس بيها.. تسمعها.. تدركها.. تطمنها وتهديها.. وتلاقي إجابة ليها تخليها مرتاحة فتقرر بشكل واعٍ..

ده محتاج منك في اللحظة دي إنك تكون يقظ.. هتحتاج إنك تدرك أفكارك لما بتحس بتروح في أي اتجاه..

حاول تلقط مخاوفك عشان تقدر تحولها لنقط أمان.. حاول إنك تشرح لنفسك إنك تقدر تغير طريقة تفكيرك.. أنت وحدك اللي مسؤول عن فكرك وبس.. حاول إنك تشوف إيه اللي مضايقتك.. وتتعامل معاه بشكل يريحك.. من غير ما تزود المعاني السلبية.. ولا تكتمها.. مجرد تسمعها تفهمها.. وتغيرها لمعنى تقدر تعيش بيه بسلاسة.. وده بيهدي الانفعال إنك تعرف تعمل حديث مع نفسك إيجابي كده..

وبعدين محتاج بقى بعد ما عرفت تهدي انفعالك.. إنك تتعلم ازاي تضبط شكل رد الفعل.. هنضطر يا باشا ننحته مع بعض! أيوه زي

ما بقولك.. أنت مبقتش عارف إيه التصرف المناسب لما تحس.. من كتر تعطيل ردود الفعل بقيت بتبان بارد.. ومن أسهل الطرق لرسم ردود الفعل لغاية ما يبقى أنت وجزء منك طبيعي.. إنك تختار طريقة كلامك وتعبيراتك.. وتتمرن عليها فعلى المدى البعيد هتلاقيها جزء منك..

لما رد فعلك يبقى معبر عن إحساسك عشان اخترته بشكل واعى.. هتحس بقوة نفسية رهيبه تخليك عندك ثقة أكثر في التعبير عن نفسك ومشاعرك..

المشكلة كلها إنك وأنت صغير لما كنت بتعبر عن مشاعرك كنت بتتواجه بطريقة أو رفض عشان انفعالاتك عالية.. فلما بتطلع زي ما هي بتخض الناس للأسف.. وعشان الناس لطيفة بطبعها فكانوا بيقلوك بتعليقهم.. ساعتها تربّي عندك شعور بالإحراج إنك تظهرها..

وعندك حق.. هي انفعالاتك من حقا.. لكن تواصلك مع الناس من حقا وحقهم.. ومهارة الحياة إنك تعرف ازاي تديرها في المواقف تطلع بشكل مريح ليك وللي حواليك..

لما تتعلم رد الفعل اللي يعبر عنك.. تواصلك مع الناس هيتحسن.. وشعور الغربة هيقبل أوي..

الفكرة كلها إن الانفعال يتروض يبقى بشكل مسالم لنفسك وللي حواليك.. فتقدر تعبر عن نفسك من غير أفورة زي ما بيسموها.. ولا كتمان..

هو مش صعب.. هو محتاج منك ثقة إنك طبيعي جدّا.. ومشاعرك من حقا.. وردود فعلك سهل ترسمها ما دام هديت العاصفة اللي جواك.. بعد كده كله سهل صدقني.. بس أنت حاول..

اسمح لي أحبك..

فيه ناس لما تحبها.. تحس إنك مرفوض في قلوبهم.. تبقى لاقط في عينيهم احتياج رهيب ليك.. لاقط اشتياقهم إنهم يوجدوا معاك.. وإنهم يقربوا ليك

ويعيشوا وياك.. بس.. تحس إنهم أول ما يحسوا بانجرافهم ناحيتك.. يبعدوا ويجروا الناحية الثانية!!

اطرق باب الحب.. وانتظر حتى يُفتح لك.

أنت متأكد إنهم عايزينك.. متأكد إنهم يتمنوا وصالك.. ومش قادر تفهم سر الهروب.. ولا قادر تجمع إيه اللي ورا الخوف اللي ماليهم من قربك..

الناس دي بتشوف المشاعر ضعف.. ولما بتحس بحب حقيقي بتخاف تقرب أحسن تنجرح أوي.. غالبًا بيكونوا خارجين من علاقة مؤلمة.. فمش قد القرب والرفض.. يبقوا خايفين من الصدد.. عندهم هشاشة نفسية متسمحش ليهم إنهم يحطوا نفسهم في مخاطرة حب جديد.. فمهما عشقوك.. بالنسبة لهم الحميمة مش أمان.. وبعدهم عنك رغم إنه وجع.. بس وجع البعد أرحم من إنهم يعيدوا تجربة الخذلان..

لو حد قريب منك عامل كده.. مش هتقدر تكسب ثقته إلا بأنك موجود.. وتكون مصدر أمان.. وتبعد عن أي شيء ممكن يحسسه بتهديد.. تصبر على العلاقة لغاية ما تنضج وتدخل في حيز الخد والهات..

لأن في فترة هشاشته النفسية منتظرش منه أي حاجة.. لأنه كل اللي شاغل عقله إنه يهرب وميسلمش مشاعره أبدا..

بالصبر.. والحب.. بس هتقدر تخليه يقعد.. وتفتح قلبه ليك.. وعلى قد حبك له.. على قد ما هتقدر تستحمل الشد والجذب اللي بيعرضك ليهم.. كأنه بيحطك في اختبارات تأكد له إنك فعلاً عايزه وبتحبه..

فبوجودك ليه.. وتحملك.. كأنك بتقوله.. ممكن تسمح لي أحبك.. وبحبك له بس هتقدر تكمل.. وتحتوي مخاوفه.. فيسمح بقربك.. وحبك.. ويطمئن..

التحدي الصعب

من أصعب الأمور لما تكون إنسان جواك طاقة حُب غير مشروط للي قلبك اختارهم.. إنك تعرف تتوازن لما تشوف غلطاتهم في حقك.. إنك تعرف تفصل بين إنسانيتهم اللي بتخليهم بيغلطوا.. وبين احتياجك لحماية حدودك النفسية..

إنك تتأدّي في الطريق وهما بيتصرفوا مش مستوعبين قدر المعاناة اللي جواك عشان تفضل موجود.. تفضل على عهدك اللي قطعته على نفسك إنك بتحبهم بحلوهم ومُرهم.. والأصعب كمان إنك ساعات بتحتاج تتصرف بشكل حازم عشان تساعدهم يتحرروا من الغلط..

القبول الغير مشروط لا يعني الموافقة على الإساءة.

أصل مش معنى إنك بتحبهم من دون اشتراط.. إنهم يتسابوا بيظلموا
نفسهم.. وغيرهم.. وهنا بييجي التحدي الرهيب.. إنك تعرف تحمي شعور
الحب اللي جواك ميتأثرش.. وإنك تفضل مثبت قيمتهم جواك رغم الوجد..
وإنك في نفس الوقت تتصرف بشكل يساعدهم يتغيروا للأفضل ميفضلوش
مستمرين على الغلط.. بس بوعى إنك تحسسهم بوجودك ودعمك وتقبلك
وحبك.. مشوار صعب وطويل.. ولكنه يستاهل..

لأن القلوب تستاهل تلاقي قدر الحب ده.. القلوب محتاجة تفهم إن غلطها
مش هيمنعك تشوف إنسانيتهم وضعفهم..

القلوب محتاجة تحس بانتماء لقلوب تانية بتحس بيها.. قلوب تديها أمان
واطمئنان إنهم يقدروا يعيشوا ويجربوا.. ويغلطوا ويقوموا من فشلهم أقوى..
بس عشان في عيونك إيمانك المطلق.. إنهم حقيقي يقدروا.. يقدروا يبقوا
أحسن من كده.

يا رب يقدرنا نفضل دعم وسند.. نفضل مراية للقلوب اللي فقدت بوصلتها
فبقت مش شايقة نفسها غير صورة مشروخة من روحها.. يا رب يقدرنا
نحمي حدودنا النفسية ومننساش حق نفسنا في طريقنا وإحنا بنحبهم بنتواجد
ليهم..

معركة رهية بين حماية نفسك.. حماية حبهم.. حمايتهم من أنفسهم..
والاستمرار ف الوجود رغم كل المخاطر.. بس عشان أنت متأكد إن جواهرهم
حاجات جميلة.. هتطلع أكيد في يوم.. لو بس شافوا في عين حد الإيمان
بيهم.. فتبقى سبب إنهم يكبروا الخير اللي جواهرهم.. ويردموا على منابت
الشر..

الحياة مش هتهون وتعدي.. إلا بوجود الحب الحقيقي اللي يقوي من الروح..
العلاقات الإنسانية الخالية من المصالح.. الرابطة اللي بتجمع القلوب
متبطلوش إيمان فيها مهما لقيتوا ناس بتستهون وبتتريق وبتدوس.. اعرفوا
إنهم بس فقدوا الأمل.. بس حسوا بهوانهم مدة طويلة.. فمش مؤمنين إن
فيه حد ممكن يفضل موجود ليهم.. بكل اللي فيهم..

جددوا إيمانكم باللي بتحبوهم.. دي أكبر هدية ممكن تقدموها.. لو فعلاً حبيتوا
بصدق هتكملوا معاهم الطريق.. بمنتهى الصبر.. والحلم..

المهم تبقى عارف صعوبة الطريق.. بس جمال الشعور.. جمال إحساسك إنك
بتساعدهم يؤمنوا مرة تانية بنفسهم.. لو تقدر على كل التحديات هتبقى
قدمت للحياة اجمل هدية.. قدمت لهم بني آدمين حقيقيين.. مش أشباه بشر
من كتر الوجد بيأذي ويخبط من غير شعور..

إحنا نستاهل نحب ونتحب بس عشان إحنا خلق الله.. خليك مؤمن بده.. وأنت تبقى نور لنفسك ولغيرك..

دواير

مَن يوجد قُربك.. يجب أن يكتسب قربه بدرجة تصرفاته..

وليس فقط بجميل حبك!

في حياتنا ناس كتير متقسمين في دواير بشكل طبيعي.. ناس منقدرش نشيلهم من حياتنا.. وناس خليناهم فيها باختيارنا..

ناس صلة الرحم جمعتنا بيهم.. دايرتهم إجبارية.. بنحبهم جدًّا.. هم الأمان لينا.. بس ساعات يببقوا أكبر مصدر لآلامنا ووجعنا.. وناس تانية اخترنا وجودهم في حياتنا..

الدواير الإجبارية

لما الإنسان يببقى حاسس إنه مضطر.. وأنه فاقد الاختيار.. فيحس بالقهر والظلم والاضطهاد..

ولما بنؤمن إن الدواير الاضطرارية مش هتروح في حته.. هما اللي اتربينا معاهم وكبرنا في وسطهم من أب وأم وأخت وصلة رحم.. فيكونوا أقل دايرة بنبذل فيها أو نستثمر فيها ونرعاها..

بالعكس بننساها وننهلها.. مش بنيجي على نفسنا عشان نوضح وتتواصل ونقرب المسافات..

كأن القلب عشان مطمئن إنهم جزء لا يتجزأ من حياتك بيعامل وجودهم على إنه من المسلمات..

وبعدين يفضل يشتكي.. «مش فاهميني.. مش حاسين بيا.. مش مهتمين بيا.. مياخدوش رأيي.. دايمًا منسية.. بيسيطروا عليا»..

كأن أنت موجود مفعول به، وأن الطبيعي إن الحياة تمشي بالشكل اللي يريحك.. افكرت إن بذك وعطاءك وتغييرك بيكون بس في الناس اللي بتتعرف عليهم جديد في حياتك أو الدوائر الاختيارية!

فبتفضل عايش معاهم.. وأنت موجد ومتألم.. لا بتحل المشكلة جواك.. ولا بتحلها معاهم وتتكلم!

خليك معاهم

كل واحد له دوائر أساسية هيفضل عايش معاها.. وغالبًا بيكون في محاور كثير مؤلمة في علاقتنا بيهم.. وصعب جدًا أننا نسيبها.. ممكن تكون صلة رحم.. زواج صعب إنهاؤه لأي سبب.. المهم إن مفيش اختيار غير التعايش..

ناس كثير بتبقى مضطرة للتعايش.. ومش عارفة تتخلص من قدر الألم اللي بتحس بيه جُوه العلاقة.. وده كده مسموش تعايش.. ده كده اسمه غضب بيتكّوم جواك.. ده لو متصرفتش فيه صح ممكن يسببك أمراض عضوية أو نفسية..

ويُخطئ البعض حين يظنون أن الدوائر الإجبارية مضمونة بلا بدل.

عشان كده أنت بتحاول في الأمور اللي تقدر تحاول فيها عشان يحصل تقارب في وجهات النظر تتواصل.. وفيه أمور بتضطر تتقبلها.. وتتغافل عنها من غير ما تكّوم جواك مشاعر ألم..

تخيل معايا موقف مُتكرر بيألمك من اللي قدامك.. حاولت تتكلم فيه ومفيش تغيير.. هل يُعقل تفضل مضايق نفسك عشان عيب لا يخصك أصلاً؟

إدراكنا أننا مليونين عيوب بيساعدنا كتير نتقبل عيوب اللي عايشين معاها من غير ما نفضل نطالبهم بمثالية مالهاش وجود على الأرض..

الألم بنحس بيه لما نحس بتهديد نفسي.. فلو أنت غيرت رؤيتك للي مضايقتك في علاقتك بيهم..

واقتنعت إن غالبًا دي عيوبهم.. مالهاش أي علاقة بيك.. ولا بشخصك.. ساعتها بس هتلاقي نفسك قادر تعذرهم من غير ما تحس بتهديد ولا ضيق..

هتلاقي نفسك كسبت في علاقتك بيهم مساحة من التفهم.. مساحة من الرحمة واللين.. عشان بس مبقتش بتأخذ الأمور على نفسك.. فبكده يبقى اسمك فعلاً بتتعايش ومتقبل.. لأنك حليت وجعك اللي جواك واستقرت على معنى يريحك في علاقتك بيهم..

الوجع نقول إنه إشارة إن في شيء محتاج يُعاد صياغته في حياتك أو تفكيرك عشان تعرف تعيشها صح.. بس بدل ما ندير الوجع ونوصل للتعايش.. ساعات بنهرب لركن جديد!

دي معركتك

الحياة صعبة على الناس كلها.. بتدينا اختيارات محدودة من وجهة نظرنا.. بتفرض علينا دواير مخترنهاش والمفروض نتعامل معاها اضطرارياً..

وتبقى الدواير دي سبب كل ألم نفسي بنعيش بيه، وبالتالي بيدفع فاتورته كل دايرة بنقرب لها بقى باختيارنا ونكوّنها وإحنا متخيلين أننا هنعيش في الحياة نسخة جديدة من إخراجنا، وبعدين نكتشف إننا بنعيد السيناريو الموجه.. وكأننا فاقدين الاختيار!

إحنا تخيلنا لما نسيب اللي مضطرين نتعامل معاه ونهرب لركن جديد.. ركن من إنشائنا.. هنقدر نحقق فيه سعادتنا وراحة بالنأ.. ولكن لقينا الموضوع أصعب من تصوراتنا..

فجأة بدأنا نفهم أخطاء الكبار معانا.. وبدأت الصورة توضح لكل دايرة اضطرارية أثرت فينا ازاي.. عشان إحنا بقينا بنوجع اللي حوالينا بنفس الشكل لما كبرنا ووصلنا لنفس اللي وصلوا ليه من مسؤوليات واحتياجات متوحشة في ظل كل الضغوط..

الحمل الثقيل بيخلى إدارة الحياة صعبة والكل بيربح في أقرب دوايره.. دواير الأمان اللي عمرها ما هتبعد ولا تتأثر المفروض بسلبياتنا.. ولكن اللي إحنا مش متخليه أنها أكثر دايرة بتتكسر وأكثر دايرة بتتشوه من جواها..

لما الواحد يفكر ليه مش قادر يعمل سيناريو جديد.. عشان حضرتك ما خلصتش الفيلم للآخر.. مخلصتش دورك! أنت سايب الفيلم مفتوح.. فييسف.. وبيوظ المشاهد والأدوار..

سيدنا يونس لما فقد الأمل في دايرته اللي ربنا بعثه ليهم نبي.. وقرر يكون دواير جديدة تسمع رسالته.. ربنا سبحانه وتعالى ابتلاه بالحبسة في بطن الحوت.. ومخرجش منه إلا أمّا فهم الدرس وعرف إن معركته الحقيقية مش في دايرة مريحة تسمعه.. وتقدره وتمتن لمجهوده.. معركته الحقيقية في الدايرة اللي اتخلق يتعامل معاه.. دي معركتك..

لما تسببها وتروح تحاول تكون دواير أريح.. هتتحبس زيه بالظبط.. أنت سببت معركتك ورحت لمعركة مش بتاعتك.. فعشت فيها نفس حبسة معركتك..

ليه بنهرب؟

ليه مش بنواجه؟

ليه مش بنتحمل دورنا في معركة الحياة..

الفكرة إن كل ما هتنجح في إدارة الدواير الأساسية في حياتك.. كل ما هتعرف تحافظ على باقي علاقاتك الاختيارية كمان..

لو محلتش ملفات الدواير الاضطرارية.. غصب عنك هتلبسها للعلاقات الاختيارية!

متصالحتش مع سلطة الأب المفرطة.. تقوم شايفها وملبسها لأقرب علاقة
ليك.. فتحولها لعلاقة مرهقة..

متصالحتش مع إهمال الأم.. فتيجي مع الزوجة تهملها!

وتدفع العلاقات الاختيارية فاتورة وجعك من اللي فات.. لا حصلت علاقات
أساسية مريحاك.. ولا حصلت علاقات جديدة مستوعباك.

ونسيت إن دورك إنك تفضل تحاول وتحاول.. حاول تنجح علاقاتك مع أقرب
دوايرك اللي بالذات مضطر ليهم.. ولو دوايرك معطوبة فعلا.. لو مينفعش
تنفصل عنها عشان صلة الدم.. يبقى تشوف دورك إيه في حدود المستطاع
فيها..

متديش زهرك لعلاقاتك الأساسية وتفقد الأمل فيها.. خليك تفضل تزرع
وتصلح.. وتبذل للتقارب عشان تعرف تعيش باقي حياتك بشكل صحي.. حاول
تتعافى من أوجاع قديمة وتتصالح مع الذكريات اللي واقفة في طريق
التقارب.. وتقرب وتنمي المساحات المشتركة..

لما بنتقبل.. وبتغافل.. بنتعايش صح.. فنعيش باقي حياتنا صح..

المهم تعمل دورك مهما تقلص الدور ده عشان هما مش مساعدينك.. تعرف
إنك مش هترتاح في حياتك وأنت مدي زهرك لدواير اتكتبت عليك.. تتحمل
مسؤولية دورك..

وتفهم إنك لو مصلحتش حياتك باللي فيها.. مش هتتصلح لما تختار ناس
جديدة تعيشها معاك.. لأنك واقف مكانك مش بتتغير..

الناس موجودة في حياتنا عشان تحسن منا وتوصلنا لأحسن صورة من
نفسنا.. فلما نفضل نرمي الغلط كله على الآخر ومنتعلمش حتى فنون حماية
النفس.. فنحدد ذواتنا في قالب ميتأديش ويعلمنا قوة التحمل في باقي محاور
الحياة.. يبقى إحنا اللي بنضيع الدروس المستفادة من الناس.. ونظن لما
نختار ناس جديدة هنعيش أفضل..

الدوائر الاختيارية

غالبًا بنبقى عندنا توقعات عالية إن الدوائر الاختيارية هي بر الأمان.. فالخذلان
بيكون مضاعف..

لأنهم ناس من فكر مختلف.. وليهم فروق فردية مش بسهولة العلاقات..
هيحصل فيها تقارب.. إلا لو قدرت تبذل وتراعيها وتنميها بمجهود.. ووقت

طويل.. وأهم شيء تصفير أوجاع العلاقات الأساسية عشان نحافظ على الجديد ميتأديش..

مشكلات كثير بتواجهنا في علاقاتنا الاختيارية.. المشكلات اللي بتقف بينكم والعيوب الشخصية اللي بتظهر في الطريق.. بتحتاج لإدارة قوية.. وعدم تطنيش عشان متتراكمش وتهد العلاقة..

ويهرب البعض من ألم الدوائر الإجبارية بالانغماس في توقعات خيالية من الدوائر الاختيارية.

ولما بتتعرف على إنسان وتحبه أوي بتتمناه يكون في أقرب الدواير.. فتبدأ تحس بالأم.. وده له معنى أكيد.. ازاي تتصرف مع الألم؟ ازاي تحدد مين في أقرب دايرة ومين بعيد؟

أجمل شيء لما تعرف تلاقي في كل شخص مساحة تجمعكم.. فمتخسرش حد.. وتعدد دوايرك وأصدقائك..

الشاطر يتقبل

محتاجين في علاقتنا نغير فكرنا في المشكلات.. المشكلات مش معناها إن العلاقة مرهقة.. ده كده يعتبر الطبيعي.. لأن كل مشكلة بتعلمك عن نفسك واللي أنت محتاجه.. وتعلمك عن الطرف الثاني واللي محتاجه..

كل ضيق بيمر عليكم بيعلمكم عن أخلاقكم.. وعيوبكم.. وقيمكم.. المهم متحملهاش فاتورة علاقات اضطرارية فترهقها بحمل ميخصهاش..

والشاطر اللي يعرف يبني مع اللي حوالية مساحة مشتركة.. اللي بيحب من غير ما يتشرط على الطرف الثاني إنه يبقى صورة محددة.. أو تصرفات محددة.. يتقبل الإنسان بعيوبه قبل مميزاته.. ويبقى مدرك إن ربنا بيحط الناس في طريق بعض عشان يتعلموا من بعض!

يعني أنت بوجودك وحسن إدارتك لعيوبه ممكن تبقى سبب إنه يتغير.. وممكن لأ.. مش دورك بقى إنك تغير حد أبدا.. دورك إنك تبقى سبب إنه ممكن ينور من جواه فيقدر على التغيير في بيئة داعمة أمانة تقدر تسنده وتشجعه في الطريق.. وده كل اللي إحنا محتاجينه وإحنا عايشين عشان نقدر على ضغوط الحياة..

فكل مشكلة بتحصل بينكم بتسبب لك ألم.. تقف مع نفسك.. تدير الألم.. تدي نفسك الحق أنها تتألم.. تحس بيها.. وتتعاطف معاها.. حديث نفسك لما بيكون إيجابي وقت الألم.. الانفعال بيهدي.. وعقلك ببدا يقدر يعقلها تاني..

وقتها اسأل نفسك اتعلمت إيه من الوجد؟ اتوجعت إيه؟ محتاج منه إيه؟ لو تقدر توضح له احتياجك يبقى خير.. لو متقدرش.. يبقى تلاقي معنى بديل للي سبب وجعك.. علشان كل ما يتكرر الموقف ده متتوجعش..

غالبًا أنت مقدرتش تقوله اللي ضايقك.. ممكن يكون عيب ميتغيرش.. فلو عرفت تدير نفسك زي ما قلت.. مرة في مرة هتلاقي نفسك متقبل العيب ومش بيهزك تماما.. عشان أنت مبقتش بتشوفه إنه تهديد نفسي.. أنت حاطط تصرفه في الحيز الطبيعي.. بشر وفيه عيوب.. ومع تركيز مع الجميل اللي فيه.. العلاقة بتكمل..

لو مقدرتش تقول عشان اتكسفت.. أو خفت من رد فعله.. دي بقى علامة مش صحية بالمره.. وممكن تخلي العلاقة تنحرف بسبب سوء الإدارة لعلاقة غلط تأديك.. لأنك هتكون استياء جواك إيه.. وهتلاقي نفسك غصب عنك اتغيرت في طريقة ردود فعلك.. كل رد فعل ليك هيبقى مصبوغ بالاستياء.. والطرف الثاني هيحس.. وهيبدا يكون برضه رد فعل بناء على شعوره إنك مضايق أو كارهه.. وتفضل الحلقة المفرغة.. اللي مع الوقت تكسر العلاقة تمامًا..

فإحنا مبنسكتش عن حاجة ضايقتنا إلا لو قررنا من جوانا نسامح ونسمح تصرفهم من قائمة الحاجات اللي بتضايقنا.. فلما يتصرفوا بالشكل ده تاني.. بتلاقي نفسنا بشكل تلقائي مبنشوفش تصرفهم على إنه حاجة تضايق أبدا..

مساحة مشتركة

المساحة المشتركة من المفاهيم اللي ممكن تجمعك بدواير كتير.. وتحافظ على معارفك من إنك تخسرها.. مش الناس يتصنّفوا عندك يا قريين يا بُعاد.. أوجد مساحة مشتركة تجمعكم.. فتقرب المسافات..

مساحة بتتفاهموا فيها على نفس المبادئ.. وفيها أقل ضرر من المشكلات بسبب اختلاف شخصياتكم..

بتقدروا تخلقوها في دوايركم الاضطرارية.. فبتقويها.. أو تخلقوها في الاختيارية عشان تحافظوا على معارفكم.. مش يبقوا أقرب الأصدقاء.. بس جميل إنك تعيش محافظ على اللي حواليك أو بتكسب كل يوم صديق..

أنك تكسب العلاقات من أجمل الكنوز.. متضيعش علاقة وتقرر إنك تنهياها إلا لو هي صفر تمامًا في محاولة البقاء في حياتك.. أو أذى متحقق محتاج تقفل بابك عليك وتبعد عنه..

دوائر محددة

ساعات بعد ما تتعرف على حد.. وتبقى بتحاول تبني في علاقتكم وتقرب.. بتدير المشكلات بشكل صح.. بتتفهم وتتعدر.. بس ممكن مع الوقت تحس إنك استهلك.. وده بيحصل لما يبقى استثمارك في العلاقة أكثر من استثمارهم..

ساعتها حاول إنك متخسرش علاقاتك..

اتعلم تحددهم جُوه عقلك.. مش كل الناس يبقوا في أقرب الدواير.. علاقة زي دي.. الوقت أظهر أنها ممكن تبقى في دايرة أبعد شوية.. تحمي طاقتك.. وتحافظ برضه على وجودهم..

تحديد مكان الناس في الدواير بيكون غالبًا نتاج تصرفاتهم معاك.. وقدر تعبك في إدارة ذاتك معاهم..

كل ما درجة الارتياح ما تعلق.. كل ما درجة الفهم مع التفهم ما تقوى.. هتلاقي نفسك بقيت مرتاح في علاقتك بيهم.. والعلاقة بتقوى مع الوقت بشكل طبيعي وصحي.. مش خالية من المشكلات.. بس قوتكم انتو الاتنين في التواصل.. والتماس الأعذار.. وتقبل العيوب.. بيخلي كل عقبة بينكم بتعدوها بتقوى علاقتكم أكثر..

الوضوح في التواصل بيكون مهم جدًا.. بيسهل كثير على إنك تشرح احتياجك.. تثبت قيمة عايز تعيش بيها وحسيت إن الطرف الثاني مش شايفها.. فيحصل توافق أكبر.. أو الاتفاق على مساحة مشتركة..

تحديد الناس في دواير بيساعد أوي في ضبط توقعاتك.. فبالتالي بتخفف من تركيزك عليهم.. وتبدأ تنشغل بباقي دواير حياتك.. فيرجعوا لمكانهم بشكل صحي مفيهوش خساير..

لو رايح مش جاي

أهم حاجة لما تحس إنك حبيت فعلاً شخص.. وبتتمنى قرينه بس هو مش مساعدك.. مش بيستثمر.. مش بيتغير.. مش بيستوعب احتياجاتك.. فمش معنى إنك حبيته.. إنك هتتعرف تحب نفسك حواليه!!

وعشان علاقة تكمل في أقرب دايرة في حياتك.. تبقى رايح جاي بينك وبينه.. قدّ اهتمامك هو يهتم..

لكن تفضل تخطي أنت خطوات.. وهو واقف في مكانه.. مستمتع بوجودك ممكن.. مرتاح لمعرفتك جاي.. بس الأكيد أنت مش في أولويات علاقاته.. وإصرارك إنه في أقرب دايرة بيستهلك روحك وطاقتك.. لأن نفسك عندها احتياج بتحتاج تستمدها من الطرف الآخر مهما كانت نفسك مليانة.. فلما

يبقى مش شايفك تمامًا بالتالي أنت مش هتقدر تتواجدَ حواليه إلا وأنت مليون.. يعني هتكتشف إنه صعب جدًا يشوفك فاضي!

الدواير القريبة بس اللي بتسمح إنك إنسان.. وتتقع.. وتتعب.. وتتفضى ساعات ومبتلحقيش تتملي وتتضطر تتعامل معاهم.. فساعتها التقبل والحب الغير مشروط بيملاك.. لغاية ما تلاقي وقت تملأ نفسك من ثاني.. فالعلاقات اللي مفيهاش غير رايح منك أنت.. مفيش جاي خالص.. صعب تشوفك وقت تعبك.. وقت ضيقك.. هما علاقات بتسمح بس بوجودك في المساحات المشتركة.. مش وقت احتياجك..

فهتلاقي نفسك عشان تقدر تستثمر في علاقتهم غصب عنك بتضطر تنسحب علشان تتملي لما تتعب.. وتقرب لما تكون عرفت تدير نفسك وصلحت أفكارك.. وارتحت نفسيًا وحسيت بسلام كفاية يخليك تقرب وتكمل في استثمارك في دايرتهم..

عشان كده لما قلبك يحب حد.. وأفعاله توصلك إنك متحبش نفسك.. عشان مش شايفك.. احفظ روحك وقلبك بأنك تستسلم للمكانة اللي هو قررها بأفعاله.. متضغوطوش عشان يعلي مكانتك.. لأن مع كل ضغطة عشان تاخذ منه الحب اللي بتتمناه هتكره نفسك في الآخر.. سيب نفسك تعذره بس بوعي.. عشان فعله ميسببش ألم من جواك ويغير روحك لروح بتكره وتؤذي..

فكل مرة تحس بخذلان بسبب توقعاتك اللي اتحطت في دايرة غلط.. غصب عنك هتلاقي مكانته بتقل درجة.. ووعيك هيخليك تدرك إن ده كله عشان مكانتك عنده أقل..

وده مش معناه إنك بطلت تحبه.. ده معناه إن علاقتك بيه مش علاقة رايح جاي..

فناحفظ على قلبنا بأننا نمشي في العلاقة بشكل يخلينا نسمح لنفسنا نقيم تصرفاتهم في العلاقة وربما ده يساعدنا أننا نحطهم في مكانة متناسبة.. أو نسيب الحياة تزهدنا في العلاقة بالبطيء فيرجعوا لمكانهم الطبيعي فيها.. ناس حلوة تتحب بس مش لينا..

منتتظرش

واعلم أنك بعطائك للآخرين تملأ نفسك أولًا.

الشخص المعطاء اللي بيجهد في إسعاد اللي حواليه.. يتصل بيهم.. يجيب لهم هدايا.. يهتم بيهم وقت مشكلاتهم.. بيقتضي مشوارهم ويبساعدهم وقت الزنقة..

هو اتقال له إن بكده هيعيش سعيد جدًا.. العطاء سر الحياة.. العطاء عين الرضا.. العطاء.. العطاء.. بس هو ليه مش عارف يرتاح ولا حاسس إنه مبسوط؟

مشاعر رهيبة سلبية عمالة تتبني جواه.. بتاكل في روحه.. بينكر وجودها عشان عايز يحقق معاني العطاء.. عايز يدي الناس اللي هو اتحرم منه.. فمش بيسمع نفسه لما تقوله: «كفاية بقى.. وشوف نفسك».

حاسس من جواه بالخذلان.. حاسس إنه موجود للناس كلها ومحدث موجود ليه..

عشان كده نتعلم إن مش معنى أني بلبي احتياجات الناس وإني شاغل وقتي بالعطاء إنني أنسى نفسي.. وأنسى أني محتاج أدير احتياجاتي واتوازن فيها.. محتاج أعرف ازاي مخلص العطاء يوهمني أني اكتفيت بيه عن الاحتياج الناقص عندي..

امسك عقلك

كل السر في طريقة تفكيرك وأنت بتعمل العطاء.. ركز أوي جواك في الصوت اللي طالع في عقلك.. هتتخض لأنك هتكتشف إن عطاءك اتحول إنه بقى عمل منتظر له مقابل ولو نظرة الرضا!!

أعطهم فقط عندما يحتاجون العطاء.. لا عندما تريد أن تشعر بالقيمة.

عقلك بيستعمل العطاء عشان يلبي تقديرك لذاتك وشعورك بالقيمة.. ومن هنا كل المشكلات بتظهر جواك.. نيتك اختلطت وباطت وأنت مش واعي.. لأن العطاء غلط يتربط بشعورك بالقيمة أبدا.. أنت قيمتك ثابتة متخليهاش مرتبطة بأفعالك.

عشان العطاء فعلاً يكون عمل مثمر يشعرك بالسعادة.. مهم أوي تمسك عقلك وانت بتعمله.. وتجدد نيتك أوي.. وتفكر نفسك إنك مش مستني مقابل.. وأن فكرة سعادة الآخر وراحته بس هي النتيجة المطلوبة..

العطاء بيتعمل مش عشان يحقق رؤيتنا وتقديرنا لنفسنا..

العطاء بيتعمل عشان أنت جواك فطرت على حب نفع الآخرين حتى لو مش هيعود عليك بنفع متبادل..

حتى لو مش حاسس المعاني ديه.. مجرد إنك قلتها لنفسك بصوت عالي جواك فأنت كده بتضبط البوصلة.. ومنعت إنه يتجمع جواك مشاعر سلبية بسبب توقعاتك وانتظارك لرأي الآخرين فيك.

النفس البشرية صعبة جدًا.. محتاجه حد مصصح لها.. عاملة زي السفنجة.. اللي أنت بتقوله ليها بتحفظه وبتترمج عليه.. فمحتاج تحفظها القيم اللي عايز تعيش بيها.. ومع الوقت هتلاقيها عايشة بالقيم ديه من غير ما تضحك عليك وتستعمل تصرفاتك عشان تلبى حاجة ناقصاها.

كنت منتظر تقدير

لو مخدناش بالناس وركزنا في شكل العطاء الصح المناسب ليك، هتلاقي أكبر حيلة وجع بتبني جواك لما تيجي أوي على نفسك فترة.. وأنت بتصبرها إنك بتعمل عمل جليل.. بتضحى تضحيات معتبرة.. فبتستحمل وتكمل.. وبعدين تكتشف إن تضحيتك اتقلبت حق مكتسب! وكمان اتقلب اسمها من تضحية لواجب ولا بدا!

بعد فترة كبيرة.. بتفاجئ بغضب رهيب بيتكون جواك..

كل ما تكون بتتعامل بعشم إنك متقدر.. إنك أكيد هتتشال على الراس.. وتتفاجئ إنه بيتداس عليك أكثر.. أصل أنت من كتر ما ضحيت.. تصوروا إنك مرتاح كده..

تصوروا أن ده الكتلوج الطبيعي لعلاقتكم.. فبأه لما بدأت تبين إنه مش الطبيعي.. وأن من المفترض يحصل تقدير لموقفك.. يحصل تقدير لكم الخذلان اللي حاسس بيه بسبب نكرانهم لكل لحظة جيت فيها على نفسك عشانهم.. بدؤوا ينكروا عليك مشاعرك.. ويستغربوك.. ويحملوك أعباء نفسية فوق أعباءك.. ما أنت مش المفروض أصلاً تتوجع ولا تتألم.. والمفروض على طول تظهر قوة تحمل ووش بشوش بيستحمل..

للأسف ديه النتيجة الطبيعية لاختيارك.. أنت ضحيت.. وكنت منتظر تقدير.. منتظر تفهم.. وعشان كده اتوجعت.. لما تضحى اعرف إنك بتيجي على نفسك بس عشان ده الصح اللي قررت تختاره واللي نفسك تاخذ ثواب عليه.. مش عشان هما يحسوا بتقدير أو فخر بيك!!

انا بس بحط لك تضحيتك في مكانها الصح عشان متفضلش تتوجع بسبب توقعاتك.. لأن غالبًا اللي مش بيطالب بحقه بيفتكروه مرتاح كده وميركزوش إنه بيجي على نفسه..

ما دام منتظر يشوفوا عملك.. فاللي اتعمل ده مش تضحية.. ده اسمه تبادل منافع.. علاقة متبادلة..

أنت جيت على احتياج معين وسبته عشان تريحهم ومنتظر في المقابل إنهم لما يجي الوقت المناسب يجوا على احتياجهم ويرحوك بأه.. عشان أنت

تستاهل ده.. بس المشكلة إنك كنت بتعملها في قالب التضحية..
في قالب العمل الخفي اللي مش محطوط في إطار يتفهم.. محطوط على
شكل إحساس براحة رهية تجاه تخليك عن حَقِّك..
فمينفعش فجأة بعد ما عودتهم على الراحة ديه معاك تبدأ تضايق إنهم اتعودوا
تريحهم.. لأنك معودتهمش هما كمان يريحوك!!

عالج زعلك

متجيش على نفسك إلا لو وضّحت أنت بتعمل إيه وعشان إيه.. عشان اللي
قدامك يفهم إن سلم واستلم.. علاقة رايحة جاية.. مش رايحة بس وجاية
عليك!!

ولو يوم قررت تعمل عمل بطولي وتيجي على نفسك.. اتأكد إنك تشتترط
على نفسك إنه عمل بلا مقابل معنوي ولا مادي.. إنه عمل خير وبس.. وأنك
متوقع محدش يفهمه ولا يقدره عشان تعبك ميروحش هدر في حيطة من
الوجع والزعل وفي معاني زي الخذلان.. رغم إن الطرف الثاني مش فاهم
كل اللي جواك.. مهما شرحت هتكون شرحت متأخر.. فهددت أمانه معاك بعد
ما كان مطمئن..

عالج زعلك اللي اتبنى بسبب تصرفك اللي موضحتش لنفسك فيه إنه أكيد
مالوش مقابل بأنك تفكرها إنك موضحتش ليهم تضحياتك.. وأنهم طبيعي
ميفهموش احتياجاتك طول ما هي مستخية جواك.. صعب تحاسبهم على
جروح أنت اللي سببتها بسبب توقعاتك.. لأن مش كل البشر بيفهموا يقدروا
تضحياتك!!

أربع تاءات

بال«تواصل.. التغافل.. التقدير.. التسامح»..
تُبنى العلاقات.. وتصير كنزًا لك مدى الحياة.
أصعب شيء لما تحس إن المشكلات في علاقاتك مالهاش حل.. لما يغلطوا
في حَقِّك وحق نفسهم.. لما عيوبهم تخنقك وتخليك مش قادر تقرب..
بتحس بيأس رهيب.. بتضايق.. وتزعل..
بتنتقد وتلمح.. يمكن الآخر يحس فيتغير..

بتفضل المشكلات اللي بتكبر بينك وبين الآخرين تبني في حيطة بالراحة..
مشكلة بسيطة على مشكلة بسيطة.. عيب على عيب.. خطأ ورا خطأ..

الفجوة بينكم بتزيد..

وفجأة العلاقة بتدوب.. بتختفي.. معدش في مساحة للاستمرار.. معدش في طاقة للاستثمار..

لما التراكمات تزيد.. وبتستسهل متتكلمش لما تضايق.. وبتملي زعل وتشحن استياء.. كل ده اللي بيضيع العلاقات!

العلاقات لو متمش رعايتها.. عاملة زي أشواك الوردية.. لو متهدبتش تجرح فيك!

محتاج تبني جواك التقبل.. تبني جواك الموافقة والسماح إن كل علاقة هتواجه فيها تحديات.. وإن التحديات دي نتيجة مواجهتك ليها اكيد هتقربكم.. لأنك من جواك من غير ما تشعر رافض!

أنت عايز ترتاح في علاقاتك.. تصورت إن العلاقات مجرد مساحة استمتاع.. دايرة أمان تنساها وتروح لها لما تبقى عايز.. منطقة تاخذ منها احتياجاتك.. ونسيت إن التعامل مع الناس بشكل عام مرهق.. ومينفعش تبقى رافض وجود أي نوع من أنواع المشكلات.. لأنك بكده بترفض بشريتك وبشربتهم.. بترفض ضعفكم اللي هو جزء لا يتجزأ من وجودكم..

المشكلات بتعلمنا أكثر عن الحياة.. وعن ازاي نعيشها فنقوي مهاراتنا.. وبين الناس بتعلمهم أكثر عن نقاط قوتهم ونقاط ضعفهم.. وبمحاولة الحل بيحصل إن كل واحد في العلاقة بينضج أكثر.. بيستوعب أكثر.. بيبقى عنده طاقة تحمل أعلى!

العلاقات هي السبيل لنضوجك النفسي.. في مساحة آمنة جدًا تسمح بالإنتاجية والازدهار..

البيئة الآمنة اللي بتوفرها العلاقات الصحية بتساعد الإنسان يلتفت للأهم في حياته ولأهدافه.. من مجرد محاولة تأمين نفسه طوال الوقت بسبب استنزاف العلاقات..

الإنسان لما بيتهدد في علاقاته.. بدل ما يركز على تحسين وتجويد أخلاقه وتصرفاته.. يركز على حماية نفسه.. ومش كل الناس بتحمي نفسها وبتأمينها زي ما اتكلمنا بشكل صحي.. في ناس بتستعمل طرق دفاعية مرهقة بشكل لا واعي لحماية ذاتها.. فالمشكلة بتزيد تشابك.. وبتتعدد!

لما تحقق بيئة آمنة في المساحة المشتركة اللي بينك وبين الآخرين.. أنت بتساعدهم ينضجوا وبتساعد نفسك تتغير للأحسن.. كأنك حطيت قواعد متينة

عشان الحياة لما تضغطك تعرفوا تديروا مشكلاتها بأقل خسائر نفسية ممكنة..

ربنا خلقنا لبعض وسخرنا لخدمة بعض.. سخرنا لصحبة بعض.. عشان بس نعين بعض على الحياة.. باختلاف أدوارنا.. باختلاف أشكال علاقاتنا.. إحنا مجرد بنساعد بعض نعيش.. فيبقى كل واحد فينا محقق استخلافه وقادر ياخذ بالأسباب عشان يسعى.. مش قاعد مشغول بمشكلاته في علاقاته فمتعطل!

أكبر مشكلة بتواجهنا أننا نفضل محبوسين في نظرة.. هو كله عليا بس؟

ودايمًا بيكون ردّي لأ.. في العلاقات أنت عليك تبقى محقق إنك فاعل ومسؤول عن الحلول عشان مؤمن إن بإيدك تتصرف.. متفضلش بس محبوس في إنك رد فعل لتصرفاتهم..

لما بيحصل أي موقف.. بتحقق فيه تثبيت قيمك.. مراعاة احتياجاتك.. ثم الذكاء الكافي في إدارة العلاقة بحيث انتو الاتنين تبقوا راضيين ومرتاحين.. دي المعادلة السليمة لعلاقة صحية بينكم..

وده عشان نقدر نوصله محتاجين نرسخ مفاهيم التواصل.. التقدير.. التغافل.. والتسامح.. فعلاقاتنا تبقى في أحسن صورة ممكنة ليها.. مش هتبقى مثالية.. بس هتبقى على الأقل هينة لينة.. مريحة لينا إحنا الاتنين..

التواصل

الكلمة ممكن ترفع نفسيتك أو تحطمها.. الكلمة أثرها رهيب على النفس.. وللأسف هي أكثر شيء بنستهون بيها..

الكلمة لما بتتوزن بتحقق نجاح رهيب في استثثار القلوب.. وتأليفها.. وتفتح أبواب التواصل والتفاهم.. بدل الجمودية والخناق..

لما تشوف اتنين بيتخانقوا.. اعرف إن اللي بيتخانق بينهم هو «الإيجو».. الذات!

لما النفس تبدأ تحمي نفسها بشكل سلبي.. لما تتمحور حوالين طلباتها.. احتياجاتها.. أفكارها عن الصح والغلط.. وبس.. ساعاتها بيحصل فجوة بين الناس..

والخناق بيبقى معناه.. إن الذات هي اللي بتحكم الموقف دلوقت.. فتخيل لما اتنين كل واحد قاعد في فقاعة من صنعه مليانة بأفكاره لوحده ومشياعره.. ازاي ممكن يوصلوا لبعض؟ كل واحد معمي بـ: هو عايز إيه وبس! وبيعلّي عند الآخر الشعور بالتهديد إنه مش مفهوم..

الآخر ليس عرافًا معه بلورة سحرية حتى يعلم ما تريد وحده..
غالبًا التصادم بيزيد.. والمشكلة بتتعمق..

أول طريقة للتواصل الصحي بين اثنين.. الموازنة بين مراعاة طلبات نفسك..
ومراعاة طلباتهم.. رؤية أفكارك وأفكارهم..

أكثر وقت التواصل فيه يكون مؤذي هو وقت الضغط النفسي.. وقت الشعور
بالتهديد.. لأن العقل المنطقي يياخذ إجازة.. واللي بيحكّمك هو عقلك الباطن..
اللي بيحمي ذاتك من غير تفكير بأساليب مش مناسبة تمامًا للتواصل.. العقل
الباطن مصمم إنه يحميك في مواطن اللي بتهدد حياتك حقيقي.. فبتحتاج فعلاً
تتحرك سريع.. محتاج قوة.. محتاج تهرب.. محتاج تتجمد.. لكن دي أساليب
متنفعش لنفوس البشر أبدا.. في التواصل الرحيم بينها.. فعشان كده بتتحول
خناقة..

ثبتت مبدأ لنفسك.. متتكلمش مع حد إلا وعقلك واعى.. إلا وأنت هادي.. لما
تحس بضغط خد وقتك لغاية ما تقدر تتكلم.. ولو اضطريت للكلام وأنت
مضغوط يبقى اتنفس كويس عشان تسمح لعقلك يرجع يفكر.. ومتاخذش
قرار أبدا إلا وأنت هادي..

التوضيح لأفكارك ومشاعرك بيحسس الآخر بسهولة التعامل معاك.. بيسمح
لهم يقربوا ويتصرفوا بشكل يريحكم مع بعض.. فلما تتكلم بصيغة «أنا
حاسس...» بتوصل للآخر تصورك عن الموقف.. وبتسهل عليهم يتصرفوا
بشكل صح..

لما تعبر عن إحساسك أنت بالموقف بالذات وقت الأخطاء.. أو الكلام عن
العيوب لتصليحها... بتحرر الآخر من رؤية ذاته.. وتستدعي منه التعاون إنه
يسمع وينتبه فيغير.. ساعدته يركز على الحل.. مش الدفاع عن نفسه..

ولما تيجي تحل مشكلة بينك وبينهم.. اتعلم تأكّد مكاتتهم في قلبك.. عمرك ما
تتكلم في عيهم.. ولا تتكلم في مشكلة من غير ما توصل تطمين عالي هما
إيه بالنسبة لك..

هي دي أكثر حاجتين بتهد التواصل.. «أنت السبب».. وعدم تأكيد الحب
والأمان

لما تتحبس في هما عملوا فيك إيه فتحكم وتلوم بدل ما تتكلم عن إحساسك
إيه بالموقف.. بيخليهم يدافعوا عن نفسهم وبس.. فيتشتتوا من الحل ويركزوا
أكثر مع المشكلة..

ولما متأكدش علاقتك وقت المشكلة.. إحساسهم بالتهديد بيعلى.. وممكن يآثر على قرارهم فيستسهلوا الهروب بدل من الحل أو الجروح تتبني جواهرم وتربي استياء.

التغافل

فيه مشكلات بتواجهها العلاقة بيبقى حلها التغافل.. عشان الدنيا تمشي من غير شحن سلبى..

التغافل مش هو الكتمان.. ولا هو التطنيش ومن جواك موجوع.. التغافل ببساطة هو إنك بكل معنى الكلمة تغض الطرف عن العيب.. عشان متحرجش اللي بيعمله.. وعشان وقوفك عليه ضرر أكبر من مواجعتك بيه.. تهذيب أي فعل خاطئ ٢٠ في المية منه توجيه للصح.. و٨٠ في المية منه تغافل..

محدثش بيتغير بسرعة جدًّا.. محدش بيقدر يقوّم الخطأ بين يوم وليلة.. كلنا بنتعرض لمراحل مختلفة من التجربة والخطأ.. ومحتاجين أكبر قدر من التطمين في طريقنا..

التغافل يعني الصبر على التغيير وليس عدم الاكتراث.

من أقوى اللي يسند العلاقات.. التغافل.. إنك تدي شوية مساحة للي معاك إنه يجرب يتصرف من غير ما تكون مركز معاه.. ادّيه مساحة بعد ما تكون وجهت ووضحت بتواصل صحي الغلط والمتوقع لتصلحه.. إنه يتصرف بشكل حر.. فيقدر يوصل بنفسه لأحسن صورة منه.

لو مثلاً صديقك غضوب.. ممكن تعبر عن مشاعر تجاه التصرفات العدوانية اللي بتحصل في المواقف بينكم.. ممكن تأكد علاقتكم وأهميتها عندك وأنك تتمنى إنه يهدى قبل ما يتكلم معاك.. فلما يحصل موقف يفقد فيها أعصابه.. من شيم الكرام إنك تتغافل.. لغاية ما الموقف يهدى.. ترحمه وقت وقوعه في الخطأ.. وتنتظر لوقت هادي بعده.. وتأكد عليه بتشجيع إنه يفضل يحاول يملك غضبه.. وأنه اتحسن كثير.. من غير ما تشير للموقف ده بعينه.. مجرد بتكمل التوجيه والنصيحة بعيد عن الموقف اللي تم فيه الغلط.. فتساعده يحسن من نفسه من غير ما يشعر بكسوف من ذاته..

عمرك ما تنصح حد جُوّه الغلط ولا توجّهه.. إحراجه من نفسه كفيل إنه يخليه يدافع عن ذاته ويتشنت بيها عن إنه يصلح غلطته..

فالتغافل ببساطة إنك متخليش الطرف الثاني يشعر إنه مخنوق.. أو يحس بضيق المساحة.. بتديه المساحة المطلوبة للنضوج من غير ضغط نفسي..

ومع التواصل الصحي وقت الراحة النفسية وبشكل عام.. ومع التغافل وقت الضغوط ووقت الأخطاء.. بتبني مناخ آمن للتغيير.. وللتقارب..
بيتعلم معاك بشكل المراية لتصرفاتك.. إنه يشجع نفسه يتصرف صح..
ويتغافل وقت الضعف ولما يقوى يشجع نفسه يتصرف صح..
ومع شوية تقدير لمميزاته.. هتبقى عرفت تبني معاه خطوة قدام لتعزيز ثقته
في قدراته وأنه فعلاً يقدر يتغير..

التقدير

غالبًا بيكون بسبب عيوب جوهرية في الآخر.. حاولنا كثير نوضح ونساعد
للتغيير.. بس ما زالت بصممتها بتأثر على علاقتكم وتوقع أوي..
وغالبًا ميكونش في حل إلا إنك تأكد لنفسك هل أنت فعلاً حابب وجوده في
حياتك رغم العيوب؟
ولا ضعفه بيضعفك أنت كمان..

المهم إن ساعات بنضطر تتعايش مع عيوب تنتقص من الآخر ومن اللي إحنا
محتاجينه منهم..
نعمل إيه لما نصطدم بالعيوب؟

نديرها ازاي؟

عشان كده مينفعش تفضل مركز على الناقص في الطرف الآخر وبس..
مينفعش تفضل تتواصل على نفس النقطة لغاية ما تبني حيلة استياء بينك
وبينه.. مضطر تعيش معاه ومش طايقه.. وهو مش قادر يبقى إيجابي معاك
لأنك بتستدعي منه الشعور بالرفض.. وأكد ده إحساس يقفل أي إنسان إنه
حتى يحاول!!

دايما النظر والتركيز على شيء بيكبر منه أوي جُوه عقلك.. ويبدأ ياخذ حيز
كبير جدًا من اهتمامك.. فيبدأ يآثر على دوافعك وقراراتك..

إن اعتدت رؤية الجمال في الآخرين.. غمرك من كل اتجاه.

عشان كده من أهم الحاجات إنك تتعلم تسيطر على أفكارك.. وتركز أوي أنا
ليه بفكر في الفكرة دي.. الفكرة دي بتفيدني ولا بتضرني..

ودايما الحل في السيطرة على الأفكار إن من أول لقطة لو مش مفيدة..
أشنت نفسي بفكرة بديلة..

لأن الفكرة لو اتسابت.. بتبدأ كمان تحس بيها.. وتبدأ تعمل ارتباطات مع مشاعر تانية.. وأفكار قديمة.. فترسخ جواك.. وتبقى عامل مؤثر على حياتك..

محتاج تحاول إنك تقوي عضلة التقدير للحلو اللي في الناس.. تحاول نستدعي منهم أحسن ما فيهم.. بتأليف القلوب والمعاملة الطيبة.. ولو حد غلط فيك بتلتمس له عذر وقتها ولما يهدى تتكلم معاه عشان تظبط الحدود بأدب وود..

لما دي بتبقى طريقتك في التعامل مع دوايرك.. غالبًا عينك بتألف الحلو.. فبالتالي بدل ما كانت بتمسك في كل العيوب.. بقت بتشوف العيب اللي يستحق الوقفة بجد.. عشان نصفت نظرة رؤيتها للتصرفات.. فبقى العيب اللي ممكن يتم إدارته ويتم تغييره هو بس اللي بنتكلم فيه..

العلاقة اللي مليانة تقدير تخلي اللي قدامك حاسس بأمان في وقت ذكر العيب.. فيساعدك فعلاً تحققوا تغيير..

التقدير مش بس عشان نحمي عقلنا من اصطياذ العيوب.. التقدير جزء لا يتجزأ من شحن العلاقة..

زي ما قلنا القيمة الذاتية ثابتة جدًّا.. وبتحتاج عشان تتحس نورها بالحب لنفسنا والتقدير والاحترام.. وبكده بنتملي كويس.. فلما نبدأ ناخذ التقدير في العلاقات.. ده بيخلي شحنا يزيد ويفيض فندوق السعادة..

علم نفسك تشوف الجمال فيهم.. تشوف التفاصيل الحلوة.. متاخذش أبدا حد كدايرة أمان وتنسى إنه موجود.. وتنسى اللي بيعملوا عشانك..

زين علاقاتك بكلمة حلوة.. بإشارات توضح مدى تقديرك لوجودهم في حياتك..

وده بيكون أفضل سلاح تحارب بيه الشعور بالملل من الناس.. ومن شعور فقدان الشغف بيهم..

لو فضلت تمرن عينك على رؤياهم.. عينك هتفضل شايفة أوي الحلو اللي فيهم.. وده بس اللي هيغفر لهم المساوئ وبخليك أسهل تتسامح..

التسامح

بعض الناس في طريق تكرار الخطأ.. في طريق النضوج والتغيير للأفضل.. الوجدع بيملاهم غصب عنهم.. ويبدووا يحسوا إنهم مش قادرين يستحملوا خلاص.. مش قادرين يسامحوا تاني ويدوا فرص!

وساعات بيبقى الطرف الآخر أصلًا مش مساعدك.. العلاقة مرهقة وأنت استنزفت.. تتعامل بقيمك في استثمارك فيها عشان تزدهر.. وبرضه بعدم

استثماره في العلاقة بتقف وتبدأ عليك أنت لوحدك تحمّل!!

وتبدأ أخطاؤه تعلّم على روحك.. لغاية ما تحس بضيق وعدم قدرة على الاستمرار.. بقى قايد في قلبك نار مفيش شيء قادر إنك تعمله عشان ترجع تاني تستكين..

ومن هنا يتبدأ كل المشكلات في العلاقات.. بدأنا بنقول صقّر فواتيرك القديمة.. لأن من هنا بيبدأ العداد يفضل شغال.. فيحاسب على فاتورة زعلك الشخص الجديد اللي المفروض ياخذ فرصته كاملة معاك.. بدل ما تديه فرصته من الأول للآخر.. بقى نفسك قصير ومن أول غلطة بتلمّس في وجعك.. بتفرمل!

فلو أنت مكمل في نفس العلاقة.. أو العلاقة انتهت بسبب شدة إهمال الآخر لمساندتك في الاستمرار..

لما نقول نسامح بتحس بغضب شديد وكأننا بنسلب حقك اللي اتسلب فيها من شدة الخذلان..

التسامح بيتفهم غلط.. بيتنظر له على إنه استباحة للذات.. خضوع.. وضعف.. وكأنك بتقوله اجرحني كمان..

وقد تُسامح اعتقاداً أنه لأجلهم.. بينما هو في الحقيقة لك.

والتسامح معناه الحقيقي إنك شفت غلطاتهم في حيز طبيعي.. فصلت الغلطة من شعورك بالألم منها.. داويت شعورك بالألم بالتطمين وبوضع معاني سليمة تساعدك تتعافى من وجعك.. وبدأت تعامل الموقف بموضوعية.. وفهمت إنه اختيارهم هما.. غلطتهم هما.. ضعفهم هما.. فوقتها بتحس إنه مش معبر أبدا عنك.. مش بيقلل منك.. ولا بيأثر عليك..

لما بتفصل الغلط من نفسك.. وتشوفه جزء من تصرفات اللي قدامك.. ساعتها بس بتحس بتفهم.. الإدراك بيخليك تعرف إنك مش المقصود.. وأن دي سوء عاقبة العيوب.. لو بتحمي نفسك كويس كده وبتمتنها.. هتلاقي نفسك مع الوقت نسيت إن الغلطة دي بتوجعك أنت.. وبتشوفها بعين التعاطف إنهم مش قادرين يتغيروا.. وهي دي درجة التسامح..

أنت لما بتفكر في تصرفهم مش بتتوجع لنفسك.. أنت بتتعاطف بس معاهم.. وكأنك مسحت الغلطة من دفترك.. وصقّرت فواتيرك.. فبقى عندك قدرة أعلى للإدارة والتعامل..

فلو كملت حتى في علاقتك بيهم.. بقى في فرصة أكبر للتقارب.. لأن العلاقة مش محملة بالغام الغلطات وأثرها في النفوس..

ولو علاقتكم انتهت.. مش هتاخذ أحمالها لعلاقة جديدة تمنعها تاخذ منحنياتها
بحرية عشان تبقى علاقة أحسن..

∞ ∞ ∞ ∞ ∞



الختام

ممكن تكون وصلت لنهاية الكتاب.. لكن الحقيقة أنت بتبدأ الحكاية من الأول.. مع نفسك ومع كل علاقاتك.. وعشان تعدي بيها لبر الأمان.. محتاج تتحمل مسؤولية إدارتها..

المسؤولية عمرها ما كانت تعب.. التعب الحقيقي الغفلة! الغفلة عن إدارتها بتحولها لوجع مستمر يغير مفاهيمنا عن نفسنا وبهز استمرارية علاقاتنا..

إحنا تعبنا أوي من المعارك اللي بنعيشها جوانا بسبب المواقف اللي بنتعرض ليها مع الناس.. كل موقف بيخبط جوانا ويفكرنا بوجع قديم.. بي فكرنا بشريط الذكريات عن إحنا مين والناس بتعاملنا ازاى.. فالألم يعيد نفسه من جديد..

وعشان مش كل الناس بتعرف تدير نفسها وعلاقاتها.. فمممكن في طريق استثمارك فيهم تتوجع وتتألم.. بس الجميل إن الألم لو اتعدى صح هيكسبك علاقة تستحق صبرك وتعبك.. وتقوي أكثر منك.. وفي النهاية العلاقات المرهقة يا إما هتتصلح لما اللي قدامك يثق فيك يا إما تتحول لعلاقة مؤذية واجبة الإنهاء..

لما تعدل نظرتك للإشارات اللي بتوجعك في كل علاقة هتتعرف تصلح علاقاتك.. لأن مفيش علاقة مفياش عيوب.. المهم إن العيب يتشاف في حجمه السليم.. من غير ما ندّيه معنى أكبر يرهق رؤيتنا لنفسنا وليهم..

مهم في الختام تكون عرفت إن العلاقة الأهم هي علاقتك بنفسك.. وإن منها بتتولد كل علاقاتك الثابتة في الحياة.. لما بتتعلم تثبت نفسنا أوي بنقدر نثبت علاقاتنا ونبني فيها.. مفيش علاقة واحدة بتمشي بمسطرة مثالية.. ومفيش علاقة واحدة هتبقى فيها سلام نفسي على الجاهز..

إدارة العلاقات هي اللي هتوصلك تفهم أكثر نفسك.. لما بتتحرر من نظرة الضحية.. وتبدأ تتحمل مسؤوليتها.. هيبدا يظهر لك مميزاتك وعيوبك.. هتبدأ تشوف كمان حاجات جواك محتاجة تتصلح.. فالعلاقات تبقى علامات على الطريق.. بيساعدوك توصل لأحسن صورة من نفسك فبالتالي تعيش الحياة حوالهم بشكل صح.. وده بس لما فهمت أهمية علاقتك بنفسك.. فسعيت لتثبيت ذاتك وقويت شعورك بقدراتك..

العلاقات بتبني بامتلاءك الداخلي مش باحتياجك ليهم.. لما قدرت تعيش بإستغناء صحي بقيت نور يفيض عليهم سعادة مش استنزاف.. عشان بقيت أقوى في تحمل الصدمات اللي بسبب التحديات والاختلافات.. وشفت الألم في حيزه صح من غير ما يبقى معول هدم للعلاقات..

أنت بكده عدلت نظرتك في العلاقات لنظرة صح تخلي العلاقات تتقارب.. وصلت الطرف الآخر إنه حتى لو مش بيستثمر في العلاقة زيك فهو من جمال أفعالك معاه مرة واثنين وتلاثة بيتعلم عن نفسه أكثر ويتستدعي منه «معاك» إنه يكون أحسن صورة من نفسه..

مش كل حد بتحبه هيبقى في قالب واحد في القرب والوجود.. قدرت تصنف الناس بحيث تكسبهم في حياتك في أنسب صورة لشكل علاقتك بيهم.. كله على حسب استطاعتهم واستطاعتك في الوجود والبذل.. مش كل الناس لازم تبقى قريبة ليك بنفس الدرجة.. ومش بس العلاقة الحلوة هما أقرب الناس.. في ناس بعيدة لكن في القلب عايشة بقرب ودفا بتملاك..

فمش بس سببت جميل الأثر في علاقتكم.. لا أنت حققت أجمل مفهوم ممكن يتحقق بتعامل اثنين سوا.. إن انتو تبقوا حقيقيي صحة تعدوا تحديات الحياة من غير ما تبقوا كمان شايلين هم علاقتكم فتبقوا حمل على بعض..

العلاقات القوية حقيقيي محتاجة قلب شجاع مستعد إنه ياخذ المخاطرة عشان يستثمر في علاقته بغيره..

وأنه ميقولش ليه أنا اللي ابذل مجهود.. ببدا بنفسه.. وهو عارف إنه بيزرع وسعادته كلها في سعيه..

الحياة مش كلها أحلام وردية ومعاني حالمة.. في سبيل إقامة علاقة واحدة حلوة ممكن تتعرض لخذلان كتير.. المهم أكون قوي كفاية وجاهز للمحاولة..

آخر نصيحة اسيبك معاها.. متفقدش نفسك في الطريق!

متفقدش نفسك عشان حبيب قرر يغيريك لصورة اقرب لحلمه ومحاولش يشوفك صح..

متفقدش نفسك لصديق تفضل تبذل من روحك عشان تفضل جنبه.. وهو مبيبذلش..

متفقدش نفسك للنجاح فتطحن نفسك وتنسى إن لنفسك عليك حق..

متفقدش نفسك لقدوة عاجبك فتقلده وتنسى إن اختلافكم هتطلع منك نسخة مميزة مش على مقاسه..

متفقدش نفسك لصدمة وجعتك.. فتغيرك وتخرج أوحش ما فيك..

متفقدش نفسك لما تفقد إيمانك بناس تصورتهم حاجة وبينت لك الأيام إنهم ولا شيء..

متفقدش نفسك..

خليك منتبه..

متغيرش لوجع.. متغيرش لتقليد.. متغيرش للاختباء..

اتغير عشان تحسنها وتبقى أحسن صورة منك في كل موقف ومع كل شخص يمر عليك..

نفسك غالية تستاهل تحافظ عليها.. متدمرهاش بأنك تخليها أهون النفوس عليك..

متفقدش نفسك.. عشان لو فقدتها.. مش هتعرف تعيش تاني حوالهم في أمان!

العلاقات كنز.. للي قادر يستثمره..

الشكر

الكتاب ده يعتبر مختلف جدًا لقلبي؛ لأنه بيعبر عن أسلوب حياتي شخصيًا في إدارة العلاقات.. طريقة لو عرفت تعيش بيها هتحس بسلام نفسي مع كل الناس.. ولما أحب أشكر هلاقيني باشكر كل شخص مر بحياتي.. اتعلمت منكم كتير جدًا.. مروركم كان سبب إني أتغير للأفضل.. حتى العلاقات اللي ظاهرها مرهقة.. خرجت منها أقوى.. خرجت منها أقدر على إدارة باقي العلاقات.. ومُمتنة جدًا لكل شخص سبب لي أي ألم.. فمن باطن الألم تذوقت قوة الصمود..

الشكر الأكبر المرة دي لزوجي عشان تفهمه الشديد.. الكتاب بيتكتب بعزلة شعورية كبيرة.. بتحتاج حقيقي دعم كبير من اللي عايشين حوالين الكاتب عشان يقدر يحقق إنجاز في الكتابة.. شكرًا لتفهمه ولثقتة اللي يحاول رغم كل شيء أبقى قدها.. لولا دعمه وتشجيعه كنت ممكن مقدرتش أكتب كتاب جديد السنة دي..

ماما كمان ساعدتني شهر كامل عشان تفصّي لي وقت أركز في الكتابة فيه.. وده أمر كبير أوي عندي.. ربنا ما يحرمني من جمال وجودها أبدًا.. وطبعًا بابا اللي استحمل بعدها واستحمل إني أنا شخصيًا تفوقعت وبطلت أتواصل خالص ولا اتضايق.. ولا حسسني بتقصير.. مدركة جدًا قدّ إيه كنت بوخشه.. وقدّ إيه مكنش بيحسسني إني بعيد عشان مُتفهم إني بكتب.. وكمان أختي المشجعة الدائمة لي اللي بتبنتني وبتحسسني بقوة رهية بسبب قوة إيمانها باللي يقدمه..

«حبيبة» بنتي.. جمال طلتها عليا في المكتب وتشجيعها المستمر.. وطبطبتها عليا كانت بتديني دفعة كبيرة وإلهام في العلاقات.. «حبيبة» أصلا هي سبب

بداية كل ده.. من ساعة ما طلعت عليا في الحياة وانا زدت ذكاء عاطفي بس
عشان أبقي على قدر التفهم المطلوب لاستيعاب روح منفردة زيبها..

طبعاّ البطل الأول في كتابة كتبي هو أستاذي ومعلمي أيمن عبد الله..
مفرداتي من مفرداته.. بنفكر بنفس الشكل.. والوحيد اللي من غير ما أفكر
بسمع كلامه.. هو اللي بيساعدني في إخراج كتابتي.. ويوضب أفكارى..
ويوجه إلهامي عشان أخرج من حالة فوضوية فلسفية في أفكارى لنظام
يوصل للقارئ بشكل مريح له.. يعتبره حقيقي شريك في كل عمل ليا؛ لأن هو
عقلي المنظم.. لولا وقته ومجهوده كنت ممكن أتأخر كثير في إنتاج أعمالى..
حقيقي قلّ من البشر اللي بيوقف وقفات جدعة كده مع اللي حواليه.. بس
أيمن شخص بطبعه معطاء وعمره ما استنى شكر.. وجوده كنز حقيقي في
الحياة..

سارة سليمان وشيماء الجمال.. الدعم والسند والوجود والتشجيع المستمر..
لولا وجودهم حواليا أنا كنت اتعطلت كثير عن إنجاز أعمالى.. بس هما دايرة
أمان حقيقية منها بنطلق للحياة..

«يسرا» و«نور» و«ياسمين» و«علياء».. دايرتي الافتراضية اللي بتحبنى
بشكل غير مشروط بوجودى.. سند ودعم مستمر.. مهما غبت عنهم يرجع
ألاقي حبهم بيزيد..

وطبعاّ قدوتي في الدعم النفسى هم الأطباء النفسيين اللي حقيقي بيفيضوا
عليا بنصائحهم لما بطلبها.. أعتز جدًا بمعرفتهم الشخصية.. وبتوجيههم ليا على
مدار الطريق.. وشكر خاص لدكتور إسلام حمروش المشرف والموجه بشكل
عام لعملى..

وأخيرًا وليس آخرا.. شكر خاص لكل المتابعين اللي بسبب إيمانهم بيزيد إلهام
في الطريق عشان أقدم المزيد.. انتو حقيقي سبب تقدمي للأمام، وسبب إن
الواحد بيحاول دايما يبذل مجهود عشان يبقى عند حسن ظنكم.. ربنا ما
يحرمني من جمال وجودكم.

ريهام حلمي:

- باحثة وكاتبة متخصصة في مجال الذكاء العاطفي وتطوير العلاقات الزوجية
والتربوية.

- تخرجت من بكالوريوس الاقتصاد جامعة أمريكية.. وعملت بالتدريس لعدة
سنوات مما أثار شغفها بتعلم التربية السليمة.

- حصلت على عدة شهادات معتمدة من دكتور جون جراى، جين نيلسون،
ريتشارد بولستاد ومايكل هول بالولايات المتحدة الأمريكية وتحضر الآن

للماجستير في علم النفس.

- اشتركت في انشاء مؤسسة فاميليا لتطوير الأسرة بمصر في ٢٠١٢..
وقامت بتقديم الكثير من الكورسات في مجال التربية الإيجابية والعلاقات الزوجية.

- تقوم بتدريب المجموعات على تطبيق التربية الإيجابية من خلال مجموعة الدعم «هرنيهم سوا» التي تستمر في المرة الواحدة ٦ أشهر.

- كما تقوم ايضا بتقديم كورس شامل عن الذكاء العاطفي «بحبني» حيث يتم تدريب النساء في ثلاثة ايام لمدة ١٥ ساعة عن معنى حب النفس الحقيقي وفهم المشاعر والاحتياجات والافكار والوصول للسعادة بما هو متاح لها.

- تحاضر في إيفنت مش جوازة والسلام عن معاني الحب في الزواج وكيفية رعايته.. والايفنت مشروع تطوعي يهدف لتقليل نسبة الطلاق بزيادة الوعي عن المعاني السليمة لمنظومة الزواج.

- وتعمل حاليا في تقديم الدعم والإرشاد من خلال كتابتها وتسجيلاتها على مواقع السوشيال ميديا ومن خلال كورسات تدريبية وجلسات استشارية خاصة.

- صاحبة الكتاب الأكثر مبيعًا، سكن، صفاء الروح في حلو المشاعر ومرها.

∞ ∞ ∞ ∞ ∞

(تم الكتاب بحمد الله وتوفيقه)

∞ ∞ ∞ ∞ ∞



متميزون للكتب النصية



لينك الانضمام الى الجروب - Group Link

لينك القناة - Link

فهرس المحتويات

عن الكتاب..

إهداء..

التقديم

العلاقات..

المقدمة

الباب الأول

إشارات خطر

لازم تنتبه لما تتوقع!

اختطاف

جمال البدايات

الرسائل المتناقضة

اظبط علاقة

الكون لا يدور حولهم فقط..

الغموض..

درجة الغموض الطبيعي

درجات الغموض

الفيلم

إزاي أعرف؟

ليه كده؟ أتصرف إزاي؟

عد الجمال

طب وبعدين؟

اتعامل مع إحساسك صح..

اشكرهم وبس

مش مضطر تدفع!

الغيرة

الخطر

ليه بنغير؟

إيه اللي بيشدك في الناس؟

لو الغيرة عليك...

إشارة أمان..

سوء الظن

سوء الظن.. شطارة؟

شوف طرف ثالث:
لو لسه مصمم على الأحكام:
العقاب الصامت
ببواجهك ولا ببيريك؟
اكسر الدائرة المفرغة!
بيقل منك..
الأصعب من الإهانة..
شوف نفسك صح..
ضحك.. وسكوت
الاستغلال
احتياج.. ولا ابتزاز؟
شيل العشم..
قول لأ..
دايرة الدعم..
الإهمال
كفاية كده؟
توقعاتك بتخيب؟
الانتقام
التشفي..
الغضب المرضي..
مهمتنا ذواتنا
الباب الثاني
العلاقة الأهم
«مستحقش»
اتحرر من أصواتك الداخلية
مرفوض
اتحرر من أصواتك الداخلية
مش مهم!
حقك:
معنى الاحترام..
مقدريش..
الثقة.. والقيمة
اتحرر من أصواتك الداخلية
ليه نشك في نفسنا؟
خمسة ثقة:
لا تجعل زللك سجننا يُلازمك مدى الحياة.

الحساب الصح
فاضي من جوه
مقدريش أعيش لوحدى
الفواتير القديمة
مش منظورك أنت..
تاني!
معنى الحب
ليه بتتعلق؟
مدمن الحب
رتب قيمك صح
الألم الشافى
تقبل الانتكاس
للمتعافين من إدمان الحب
سر الحب
مساحة سماح
النظري والعملى
إوعى تدوق
أمن نفسك
تكوين القيم
ثبت صورتك
سدد وقارب
متجيش على نفسك
حط نفسك مكانه
الالتزام فى العلاقة هو أسمى معانى المسؤولية
ألم تانى
قرب وواجه
افضل للآخر
ونكبر وتكبر أحلامنا معانا..
الوضوح
ثلاثى الأبعاد
قالب الحب
القبول الغير مشروط لا يعنى الموافقة على الإساءة.
دواير
الدواير الإجبارية
خليك معاهم
دي معركتك

الدوائر الاختيارية
الشاطر يتقبل
مساحة مشتركة
لورايج مش جاي
منتتظريش
امسك عقلك
كنت منتظر تقدير
عالج زعلك
أربع تاءات
التغافل
التقدير
التسامح
الختام
الشكر

Notes

[1-]

(1) هنتكلم عن مفهوم «املا نفسك» بالتفصيل في الباب الثالث, فصل «فاضي من جُوّه».

[2-]

(2)وغالبًا ده بيكون الشخص اللي في كتاب سكن اتكلمنا عنه إنه «بير».

[3-]

(3) هتتعلم أكثر ازاي تثبت نفسك في الباب الثاني «العلاقة الأهم».

[4-]

(4) الحب من غير شرط.. الباب الثالث «العلاقة الصح».

[5-]

(5) كلنا بنقع في إننا نجمال الناس بشكل مبالغ فيه تأكيداً لأهميتنا عندهم.. لما الموضوع يبقى واصل إنه جزء لا يتجزأ من الشخصية.. اقرأ فصل «النهر الفياض» في كتاب سكن هتفهم تتعامل ازاي أكثر.

[6-]

(6) أي تصرف من كل الإشارات الخطر اللي اتكلمنا عليها في الفصول السابقة ميمش إدارته لمعنى صحي يحمي ذاتك، بيحرك شعور الغضب والرغبة في الانتقام.. وبتتحول في العلاقة لشخص بينتقم بشكل معنوي بسبب الهزات النفسية اللي اتعرضت ليها.

[7-]

(7) اقرأ أكثر عن ازاي تملأ نفسك في كتاب سكن الباب الثالث فصل «صاحب نفسك».